

O LE EKALESIA A IESU KERISO O LE AU PAIA O ASO E GATA AI • IUNI 2014

O Le Liahona



**O Tali i Fesili e Fa e
uiga i le Perisitua, i. 18**

**Filifili Faafiafiaga e Talafeagai
ma Lou Taimi, i. 14**

**Fausiaina o Siona i le Mea
o e Nofo ai, i. 30**



"Ua i ai i le tama le pule ma le tiutetau-ave e aoao lana fanau ma ia faama-nuia ma tuuina atu mo i latou sauniga o le talalelei ma isi puipuiga uma faaleperisitua e tatau ai. E tatau ona ia faaalia le alofa ma le faamaoni ma ava i le tina ina ia mafai ona vāai le la fanau i lena alofa."

Peresitene Boyd K. Packer, Peresitene o le Korama a Aposetolo e Toasefululu, "O Nei Mea Ua Ou Iloa," *Liahona*, Me 2013, 7.



O SAVALI

- 4 Savali a le Au Peresitene Sili: Faanatinatiina o le Galuega**
Saunia e Peresitene Thomas S. Monson
- 7 Savali a Faiaoga Asiasi: O Le Misiona Paia a lesu Keriso: Auauna Atu**

TALA FAAALIA

- 14 O Ala o Faasalalauga e Taua**
Saunia e Katherine Nelson
O a tatou fegalegaleaiga ma faafiafiaga e mafai ona avea ma filifiliga faamoemoeina, ma faapaiaaina.
- 17 Aveesea, Faalematua**
Saunia e Jan Pinborough
Ao tatou mulimuli i le Faaola ma gauai atu ia tatou fanau, o le a tatou tapeina, se'i le palaka, ma le toe fesoottai atu ma mea faalavefau.


I LE FAAVAA

Luma: Ata na tusia e Jerry Garns. I totolu o le faavaa pito i luma: Ata na tusia e Bradley Slade.

- 18 O Le Mana o le Perisitua— Ua Avanoa mo Tagata Uma**
Saunia e Linda K. Burton
O le perisitua o se talitonuga paia ua tuu mai e faamanuita ai alii, tamaitai, ma fanau ina ia mafai ona tatou nonofo o ni aiga e faavau ma le Atua.
- 24 O Paionia i Atunu Uma: O Au Paia o Aso e Gata Ai i Italia: O Se Talatuu o le Faatuatua**
Saunia e Lia McClanahan
O le fausiaina o se malumalu i Italia o se taunuuga lea o se talafaasolopito umi o Au Paia faamaoni.
- 30 O Le Valaau ia Faapei o Keriso**
Saunia e Elder Jeffrey R. Holland
O le taimi lenei mo i tatou e faatulaga ai Siona i nofoaga ua tatou i ai—e tusa lava pe o tatou i ai i le lotolotoi o Papelonua.

MATAGALUEGA

- 8 Tatou te Talanoa ia Keriso: Maofa i le Alofa o lesu Mo Au**
Saunia e Cesar Lima Escalante
- 10 O Tatou Aiga, O Tatou Auiga: O Luitau O Faamanuiaga la**
Saunia e Rachel Harrison
- 12 O Perofeta o le Feagaiga Tuai: Samuelu**
- 13 Aoao Atu Mo Le Malosi o le Autalavou: Sefuluai ma Taulaga**
- 38 O Leo o le Au Paia o Aso e Gata Ai**
- 80 Seia Tatou Toe Feiloai: O Le Mana o le O Afea**
Saunia e Kelly Louise Urarii
I totonu o le 24 itula, sa mai tigaina ai lou toalua. E tasi le upu na fesoasoani ia i matou ina ia tumau i le faamoemoe.



42

- 42 Mulimuli i le Ala o le Fiafia**
Saunia e Epikopo Gérald Caussé
E mafai e nei mataupu faavae e tolu ona fesoasoani ia te oe e fuafua ma ausia lou fiafia.

- 47 Faasoaina Atu o le Talalelei i Luga o le Initoneti**
Saunia e Maria Mahonri-Yggrazil
Arduo Andaca
Sa ou matamuli i taimi uma e faasoa atu e uiga i ou talitonuga, ae sa fesoasoami ia te au se metotia fou ina ia ou naunau e talanoa ma tagata (e uiga i le talalelei).



57

- 48 Faitalia ma Tali: Iloaina o Faaaliga**
Saunia e Elder Richard G. Scott
Ina ia tuputupu ae, e ao ona tatou aoao ia talitonuina o tatou gafatia e faia ai filifiliga sao.

- 52 Ae Faapefea pe Afai Ou Te Le Lagonaina se Mu i le Loto?**
Saunia e Rachel Nielsen

- 56 Mulimuli i Musumusuga Laiti**
E te leiloa lava pe o afea atonu o le a tele ai se aafiaga o se musumusuga laitiiti.

- 57 O Se Faamanuiaga mo Lou Uso**
Saunia e Jesse Jones

Sa aafia lou uso laitiiti i se faalavelave tau pasika ma sa i ai i le falemai. Sa ou lagona le mai i le popole.

- 58 Fesili ma Tali**
O le a le mea e tatau ona ou mafausau i ai i le taimi o le faamanatuga?

- 60 Mo Le Malosi o le Autalavou: E Tuuina Mai e le Sefuluai se Malosiaga i Totonu**

Saunia e Elder Anthony D. Perkins
O le totogiina o lau sefuluai o le a fesoasoani ia te oe ia iloa ai e tauisia e le Alii Ana folafolaga uma.

- 62 O Le Mauaina o Lou Auala e Toe Foi ai i le Ekalesia**
Saunia e Doug Boyack

Sa ou manatu ou te le manaomia le Ekalesia, seia oo ina aoaoina au e se faigamalaga ma le sefuluai.

- 63 Pepa O I Ai Se Savali: E Le Mafai ona Solia**



66

- 64 O Se Faamanuiaga mo Mamá**
Saunia e Susan Barrett
Sa fai ma tiga le tua o Mamá. E faapefea ona fesoasoani Reupena?

- 66 Molimau Faapitoa: E mafai faapefea ona ou avea o se faifeautalai i le taimi nei?**
Saunia e Elder Neil L. Andersen

- 67 O Le Tamai Mamoe Migao**
Saunia e Elder Scott D. Whiting
Sa ou manao ia migao ina ia mafai ona ou maua se mea faapipi, ae sa tupu se mea e sili atu ona lelei.

- 68 Uo i le Salafa o le Lalolagi: O Au o Loredana mai Italia**
Saunia e Amie Jane Leavitt

- 70 Gaoioiga Faifaatusa: Massimo mai Italia**

- 71 Mulimuli ia lesu: Ia Fesoasoani**

- 72 Fatuina o Musika i lukana**

Saunia e David Dickson
O le taitaiina o le musika i luma o tagata uma e mafai ona taufafefé, ae e leai la mo Siaosi!

- 74 Aumaia o le Peraimeri i le Fale: O Sauniga o le Perisitua ma Galuega o le Malumalu e Faamanuiaina ai Lo'u Aiga**
Saunia e Jennifer Maddy

- 76 O La Tatou Itulau**

- 78 Mo Tamaiti Laiti**

- 81 Atatosi o le Perofeta: Gordon B. Hinckley**

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Apostolo e Toasefululuua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Jose L. Alonso, Mervyn B. Arnold, Shayne M. Bowen, Stanley G. Ellis, Christoffel Golden

Pule Faatonusili: David T. Warner

Faatonusili o le Lagolago mo Aiga ma Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Au Tusitusi ma Faatonutonu: Brittany Beattie, David

Dickson, David A. Edwards, Matthew D. Flitton, Mindy Raye Friedman, Lori Fuller, Garrett H. Garff, LaRene Porter Gaunt, Jennifer Grace Jones, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, Mandie M. Bentley, C. Kimball Bott, Tom Child, Nate Gines, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolumoga: Craig K. Sedgwick

Faatonusili o le Tufufatuga: Stephen R. Christiansen

Mo le okaina o mekasini, alu i le store.lds.org po o le Faletusi Tutotonu i Pesogia, Telefoni 64127. Totogi o le Mekasini: \$0.55 (Samoa) i le kopii. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po se "faatonu") e lomia i le faa-Alepania, Aminia (Sasae), Pisilama, Palekeria, Kemupotia, Sepuanu, Saina, Kalaotia, Siekisolvakia, Tenimaka, Take, Igilisi, Esitonua, Fiti, Finelani, Farani, Siamani, Eleni, Hanikeri, Initu, Iselani, Initoniesia, Italia, Iapani, Kiripati, Korea, Latvia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafagofineia), Silovenia, Sipaniolu, Suetena, Swahili Tagaloka, Tahiti, Tal, Toga, Lukureini, Urutu, ma Viatename. (E eseese lava gagana.)

© 2014 Puletaofia e le Intellectual Reserve, Inc. Ua taofia aia tatau uma. Lomia tui le lunatei Setete o Amerika.

E mafai ona kopii tala ma ata o le *Liahona* mo le toe faaaogaina i lotu po o le aiga ae ia le faia ai ni pisini. E le tatau ona kopii ni tala po o ni ata pe afai o faasa mai i le laina o loo ta'ua ai le e ona lea faatuifugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

June 2014 Vol. 38 No. 6. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo i ai tusiga ma gaoioiga e mafai ona faaaoga mo afiafi faaleaiga.
O ni manatu nei e lua.



"O Le Mana o le Perisitua—Ua Avanoa

mo Tagata Uma, itulau 18: Ao lei faia le afiafi faaleaiga, faiatau fesili e fa o loo fesili-gia e Sister Burton i lenei lomiga. Aumai se tamai moli i le afiafi faaleaiga (ia mautinoa ua se'i le palaka). Tuu atu i tagata eseese o le aiga e taumafai e faaola. Faatusa le eletise e manaomia e faaaoga ai le moli i le mana o le perisitua. Palaka ma faaola le moli ma talanoaina pe mafai faapefea ona tatou manuia uma mai le malamalamia o le moli, po o le mana o le perisitua. Tuu atu i tagata o le aiga e mafaufau i auala ua faamanuiaina ai i latou e le perisitua. E mafai ona e amata taulotoina ia mau o i le Mataupu Faavae ma Feagaiga 84 lea na fautuina i tatou e Sister Burton e taulotoina.

"O Le Manatu Maoae a Vili," itulau 78:

E mafai ona e amata i le usuina o le pese "Ou Te Fia Vaai i le Malumalu" (*Tusipesa a Tamaiti*, 95) po o se isi pese e uiga i malumalu. Faitau ma talanoaina o se aiga lenei lomiga pe aisea e taua ai malumalu. Fai atu i tagata taitoatas i le aiga e tusi se ata o le malumalu, atonu o se tasi e pito sili ona latalata i le mea o e nofo ai. Mafaufau e tautau i luga ata na tusia ma le ata o i le itulau e 79 i totonu o lou fale i le mea o le a latou vaiai ai i aso uma. Talanoa pe faapefea e le vaiai o se ata o le malumalu ona faamanatu ia i tatou le faia o ni filifilia o le a tausia ai lo tatou agavaa e ulu atu i le malumalu.

I LAU GAGANA

O loo maua le *Liahona* ma isi tusi a le Ekalesia i le tele o gagana i languages.lds.org.

AUTU I LENEI LOMIGA

E ta'u mai e numera le itulau muamua o le tusiga.

Agaga Paia, 48, 52, 56, 67

Aiga, 10, 17

Ala o faasalalauga, 14, 17, 47

Atuatuvale, 39

Auauna atu, 71, 72

Faaaliga, 18, 41, 48, 52, 56

Faaipoipoga, 10

Faamanatuga, 8, 58

Faamoemoe, 80

Faapaiaina, 14

Faatuatua, 80

Faitalia, 14, 48

Feagaiga Tuai, 12

Fiafia, 42

Galuega faafaifeautalai, 24, 30, 47, 66

Hinckley, Gordon B., 81

Iesu Keriso, 7, 8

Liua, 24, 62

Malumalu, 10, 24, 74, 78

Migao, 67

Musika, 72

Paionia, 24

Perisitua, 18, 64, 74

Perofeta, 12, 41, 81

Poloaiga, 30

Sefuluai, 13, 60, 62

Siona, 30

Talafaasolopito o aiga, 4, 6, 38

Tatalo, 48

Taua o le tagata lava ia, 42

Taulaga anapogi, 13, 60

Togiola, 8, 58

Upu o le Poto, 40

Usiusitai, 18, 56

Valaauga, 72



Saunia e Peresitene
Thomas S. Monson

FAANATINATINA OLE GALUEGA

Oe silafia e 98 tausaga o le Ekalesia toefuataiina ao lei atoa le 100 o ona siteki? Ae e i itiiti ifo ma le 30 tausaga mulimuli ane, ae faatulagaina e le Eklesia ona siteki e 100 lona lua. Ma e na o le valu tausaga ua mavae talu mai lena taimi ae ua silia ma le 300 siteki a le Eklesia. I le aso ua tatou maua le silia ma le 3,000 siteki malolosi.

Aisea ua tupu ai lenei tuputupu ae i se tulaga faavavevave? Pe ona ua sili atu lo tatou silafia? Pe ona o le aulelei o o tatou falelotu?

E taua nei mea, ae o le mafuaaga ua faatupulaia ai le Eklesia i lenei vaitaimi ona sa faailoa mai e le Alii o le a [tupu]. I le Matapu Faavae ma Feagaiga, ua Ia fetalai mai, “Faauta, o le a Ou faanatinatiina la’u galuega i lona taimi.¹

I le avea ai o i tatou ma fanau agaga a lo tatou Tama Faalelagi, ua auina mai i tatou i le lalolagi ina ia mafai ona tatou auai i le faanatinatiina o lenei galuega maoae.

E lei faailoa mai lava e le Alii, i lou malamalamamaaga, faapea o Lana galuega e gata i le olaga faaletino. Nai lo lena, o Lana galuega e aofia ai le faavavau. Ou te talitonu o loo Ia faanatinatiina Lana galuega i le lalolagi o agaga. Ou te talitonu foi, o loo saunia e le Alii, e ala i Ana auauna iina, le toatele o agaga ia maua le talalelei. O la tatou galuega o le sailia lea o o tatou tagata ua maliliu ona o lea i le malumalu ma faia ia sauniga paia ma maua ai e i latou o i tua atu o le veli ia lava avanoa e tasi ua tatou mauaina.

Sa saunoa Peresitene Polika Iaga faapea, o Au Paia o Aso e Gata Ai lelei uma i le lalolagi o agaga o loo pisi

(1801–77). “O a a latou mea o fai iina? O loo latou talai atu, o loo talai atu i taimi uma, ma saunia le ala mo i tatou ina ia faanatinati ai la tatou galuega o le fausiaina o malumalu iinei ma soo se nofoaga.”²

Ia, e le faigofie le galuega o talafaasolopito o aiga. Mo outou na mai Scandinavia, ou te lagonaina la outou faavaivai. Mo se faataitaiga, i lou itu Suetena, o le igoa o lou tamamatua o Nels Monson; e le o Monson le igoa o lona tama ae o Mons Okeson. O le igoa o le tama o Mons o Oke Pederson, ma o le igoa o lona tama o Peter Monson—toe foi ai ia Monson.

Ua faamoemoe mai le Alii ia te oe ma au ia faia ma le lelei a tatou galuega o talafaasolopito o aiga. Ou te manatu o le mea muamua e tatau ona tatou faia pe afai o le a tatou faatino ia lelei a tatou galuega o le i ai lea o le Agaga o le Tama Faalelagi e faatasi ma i tatou. Pe a tatou ola amiotonu e pei ona tatou iloa le auala e ola ai, o le a ia tatalaina le auala e faataunu ai faamanuiaga lea tatou te naunau ma filiga e sailia.

O le a tatou faia ni mea sese, ae e leai se tasi o i tatou e mafai ona avea ma se polofesa i galuega o talafaasolopito o aiga e aunoa ma le avea muamua ma se tagata faatoa amata. O le mea lea, e tatau ai ona tatou filiga e faia lenei galuega, ma e tatau ona tatou saunia e fetaiai ma faigata ao faia. E le faigofie lenei galuega, ae ua tuuina atu e le Alii i ou luga, ma ua Ia tuuina mai i ou luga.

Ao e faatinoina le galuega o talafaasolopito o aiga, o le a e aafia ai i faigata, ma o le a e faapea ifo ia te oe lava, “E leai se isi mea e mafai ona ou faia.” Pe a e oo atu i lena



tulaga, alu i lalo i ou tulivae ma ole atu i le Alii e saunia se vaifofo, ma o le a Ia tatalaina le auala mo oe. Ou te molimau atu i le moni o lenei mea.

E alofa le Tama Faalelagi i Lana fanau i le lalolagi o agaga e pei lava foi ona Ia alofa ia te oe ma au. Na saunoa mai le Perofeta o Iosefa Samita e faatatau i le galuega o le laveaiina o o tatou tagata ua maliliu faapea, "Ma lenei a o televave mai le faataunuina o faamoemoega silisili o le Atua, ma faataunuina mea o loo tautalagia i Perofeta, a o faatuina i le lalolagi le malo o le Atua, ma toefuataiina le

faatulagaga anamua o mea, ua faaalia mai e le Alii ia i tatou lenei tiute ma le avanoa."³

Na folafola mai e Peresitene Iosefa F. Samita (1838–1918) e faatatau i o tatou tuaa o e ua maliliu e aunoa ma se mala-malamaaga o le talalelei e faapea, "E ala i a tatou taumafaiga mo i latou, o le a pauu ese mai ia i latou filifili o noanoataga, ma o le pogisa o loo siosiomia ai i latou o le a matafi ese, ina ia susulu mai le malamalama i o latou luga ma o le a latou faalogo ai i le lalolagi o agaga i le galuega ua faia mo i latou e a latou fanau o loo iinei, ma o le a latou olioli faatasi ma outou ona o lo outou faataunuina o nei tiute."⁴

E faiatau miliona ma miliona fanau agaga a lo tatou Tama Faalelagi o e e le i faalogo lava i le suafa o Keriso ao lei maliliu ma o atu i le lalolagi o agaga. Ae ua aaooina nei i latou i le talalelei ma o loo faatalitali mai i le aso o le a faia ai e oe ma au le sailiga e moomia e faamama ai le ala ina ia mafai ona tatou o i totonus o le fale o Ieova ma faataunu le galuega mo i latou lea e le mafai e i latou lava ona faataunuina.

Ou uso e ma tuafafine, ou te molimau atu o le a faamainuaina i tatou e le Alii ao tatou taliaina ma tali atu i lenei luitau. ■

FAAMATALAGA

1. Mataupu Faavae ma Feagaiga 88:73.

2. Aoaoga a Peresitene o le Ekalesia: Polika Iaga (1997), 289.

3. Aoaoga a Peresitene o le Ekalesia: Iosefa Samita (2007), 436.

4. Aoaoga a Peresitene o le Ekalesia: Iosefa F. Samita (1998), 252.

AOAO ATU MAI LENEI SAVALI

Mafaufau i se tala e te fiafia lava i ai mai le talafaasolopito o lou aiga ma faasoatatu i latou e te asia. Atonu e te manao e faaaoga fesili o i le vaega a tamaiti i le Savali a le Au Peresitene Sili (itulau 6) e faamalosiau ai ia i latou e te asia e faasoatatu i latou tala. Mafaufau e faitau le Mataupu Faavae ma Feagaiga 128:15 ma talanoaina le taua o le faatinoina o sauniga faalemulumalu e fai ma sui a o tatou tuaa.

Mata Ou Te Fiafia e Faavasega ia Igoa?

Saunia e Emma Abril Toledo Cisneros

Sa ou auai i la matou sini o le siteki e faavasega igoa e 50,000. I le taimi muamua sa faigata. O nisi taimi o vaega ia sa ou sii maia i faaputuga o igoa sa faigata ia tusitusi, ma o nisi taimi sa ou manao e toe faafai ae sii mai se isi faila. Ae sa ou iloaina afai e mafaufau uma tagata faapena, o le a tuu na faaputuga seia oo i le taimi mulimuli. Sa ou vaai faalemafau-fau atu i le tele o laina o tagata o loo faatalitali i le lalolagi o agaga, ao ou filifili e faaauau pea ona taumafai e faitau na igoa ma faamaumau i latou e aunoa ma le faia o se mea sese.

Sa ou aoao ia i ai le alofa mo na tagata. Sa ou iloa latou te manaomia moni le fesoasoani, ma e tatou te manaomia foi

le fesoasoani mai ia i latou. Sa oo ina ou malamalamo atili o le fuafuaga atoatoa a le Tama Faalelagi e manatua ai tagata uma. Pe a tatou mulimuli i unaiga ma faatonuga a Ona tai-tai filifilia, o le a tatou molimauna Lona alofa mutimutivale ma lē gata.

Ua avea le faavasegaina o igoa ma se aafiaga matagofie mo au. Ua ou aoao e faataua ma fiafia i le tele o mea e uiga i le talafaasolopito o aiga. Sa ou mauaina foi meaalofa o le faatauaina sili mai lo tatou Alii e ala i le usitaia o se mea faigofie e pei o le auai i le faavasegaina o igoa.

E alala le tusitala i Veracruz, Mekisiko.

TAMAITI

Iloa Au Tala

Sa i ai i ou matua ma matua matutua le tele o mea na tutupu—e aofia ai ma nisi mea na tutupu e te le iloa! O nisi o a latou tala o le a e ata ai, ma e mafai ona latou fesoasoani ia te oe ia i ai le faatuatua i le Tama Faalelagi. Ae e oo lava i tagata matutua e lagona le matamuli i nisi taimi. Faaaoga fesili nei e fesoasoani ai ia i latou ia manatua nisi o a latou tala e sili ona fiafia i ai ma tusi i lalo pe tusi ni ata o a latou tali.



Ia suesue ma le agaga tatalo i lenei mataupu ma saili ia iloa le mea e faasoa atu. E faapefesa e le malamalama i le sofiuaga ma le misiona a le Faaola ona faateleina ai lou faatuatua ia te Ia ma faamanuia ai isi e te tausia e ala i faiaoga asiasi? Mo nisi faamatatalaga, alu i le reliefsoociety.lds.org.

O Le Misiona Paia a lesu Keriso: Auauna Atu

O se vaega lenei o se faasologa o Savali a Faiaoga Asiasi e faauatu i vaega o le misiona a le Faaola.

Ao tatou uauna atu i isi, ua avea i tatou ma e mulimuli moni ia Iesu Keriso, o le sa faia le faataitaiga mo i tatou. Ua saunoa mai Peresitene Thomas S. Monson e faapea: “Ua siomia i tatou e i latou e manaomia lo tatou gauai atu. . . . O i tatou o lima o le Alii i luga o le fogaelele, ua i ai le tiutetauave e uauna atu ai ma siitia Ana fanau.”¹

Sa aoao mai Sister Linda K. Burton, peresitene aoao o le Aualofa, e faapea: “Ae a faata’ita’i i ai, e mafai e i tatou taitoatasina ona avea atili e faapei o le Faaola pe a tatou uauna atu i fanau a le Atua. Ina ia fesoasoani i le faaleleia atili [o le uauna atu] i le tasi ma le isi, ou te fia fautuaina atu ni upu se fa ia manatua: “Muamua matau, uauna ai.” . . . A tatou faia lena mea, ua tatou tausia feagaiga ma o la tatou uaunaga, e faapei ona saunoa Peresitene Monson, e molimauna ai lo tatou avea ma ni soos.”²

E mafai ona tatou tatalo i taeao taitasi ia iloa avanoa e uauna atu ai i isi. “O le a taiala oe e le Tama Faalelagi



ma o le a lagolagoina oe e agelu,” sa saunoa David L. Beck, peresitene aoao o Alii Talavou. “O le a tuuina atu ia te outou le mana e faamanuia ai olaga ma laveai ai agaga.”³

Mai Tusitusiga Paia

Mataio 20:25–28; 1 Nifae 11:27–28;
3 Nifae 28:18

FAAMATALAGA

- Thomas S. Monson, “O Le A Se Mea Ua Ou Faia mo Se Tasi i le Aso?” *Liahona*, Nov. 2009, 86.
- Linda K. Burton, “Muamua Matau, Ona Auauna Atu ai Lea,” *Liahona*, Nov. 2012, 78.
- David L. Beck, “O Lou Tiute Paia e Auauna Atu,” *Liahona*, Me 2013, 56.
- Lucy Meserve Smith, i le *O Afafine i Lo’u Malo: O Le Talafasolopito ma le Galuega a le Aualofa* (2011), 39–40.
- George Albert Smith, i le *O Afafine i Lo’u Malo*, 83.



Faatuatua,
Aiga, Toomaga

Mai Io Tatou Talafasolopito

I le konafesi aoao ia Oketopa 1856, sa faasilasila atu ai e Peresitene Polika laga (1801–77) faapea o loo sopoia pea e paionia o taavaletoso ia laufanua valevalenoa ma e ao ona fesoasoani tagata uma i le aoina o sapalai mo i latou i se taimi vave. Sa tusia e Lusi Meserve Samita e faapea sa “to ese e fafine o latou ofuloto [o laulavalava tetele o se vaega o sitaili, i na ona po ma sa maua ai le mafanafana], o totini, ma mea uma lava sa mafai ona latou faavanoaina, iina lava i le Tapeneko, ma faaputu [i latou] i totonu o taavaletoso.”

Ao amata ona taunuua paionia sa laveaiiina i le Aai o Sate Leki, sa tusia e Lusi faapea, “E leai se isi galuega sa . . . ou faia i lo’u olaga sa sili ona faamalieina ai au, e tusa ma le autasi o lagona sa i ai. Sa na ona ou alu lava i se faleoloa ma faailoa atu i ai lo’u manao; afai o se ie, sa na ona fua lava ma ‘oti mai e aunoa ma se totogi.”⁴

Sa saunoa Peresitene Siaosi Alapati Samita (1870–1951) i le uauna atu i isi: “O le a tutusa lo tatou fiafia e faavavau ma le ala tatou te tuuto atu ai i tatou lava e fesoasoani ai i isi.”⁵

Mafaufau i le Mea Lenei

1. E mafai faapefesa ona taitaia i tatou e le tatalo ia avea ma meafaigaluega i aao o le Alii?

2. E mafai faapefesa e le uauna atu i isi ona fesoasoani ia i tatou e tausia a tatou feagaiga?

MAOFA I LE ALOFA O IESU MO AU

Saunia e Cesar Lima Escalante

Se tasi o Aso Sa ao lei faia le sauniga faamanatuga, sa sau le epikopo ia te au ma fesili mai, "E mafai ona e fesoasoani e faamanua le faamanatuga?" Sa ou fai atu ioe e mafai ona ou faia.

Sa ou alu ma aumai lau tusipese ma fufulu ou lima ae ou te lei nofo i lou nofoaga i le laulau faamanatuga. Sa ou tatalaina le tusipese, ma o le viiga muamua sa ou vaaia o le "Ou Te Tu Ma Ofo" (*Viiga*, nu. 107). E lei amataina le sauniga i lena taimi, o lea na amata ai ona ou fatauina le laina muamua: "Ou te tu ma ofo i le alofa o Iesu." Na vave ona faatumulia lou loto i se lagona o le alofa loloto.

O le po na tea sa ou fatau ai i le Tusi Paia e uiga i taimi mulimuli o le soifuaga o Iesu Keriso—o vaega e aofia ai le Talisuaga Mulimuli, le Faatoaga o Ketesemane, ma Lona Maliu ma le Toetu. Sa ou vaai faale-mafaufau i le faatigaina, sauaina, ma tauemuina e i latou na faasatauroina o ia. Sa ou vaai faalemafaufau foi o faataunuina e Iesu Lana taulaga togiola i le Faatoaga o Ketesemane ao momoe Ona soo.

Sa ou iloaina o lea o le a ou faamanuiaina le falaoa ma le vai ua suitulaga i Lona tino ma le toto.

O le faamanatuga e faataga ai i tatou ia faafou le feagaiga sa tatou osia ina ua tatou papatiso, lea ia manatua ai pe a Ia, ia taus i Ana poloaiga, ma tauave i o tatou luga Lona suafa.

Ina ua amata le sauniga faamanatuga, sa i ai i lou mafaufau nei manatu uma. Sa ou matua lagona le faagaeetia faapea sa puapuagatia Iesu i se auala tiga ma ofoofogia e le oo i ai lo tatou malamalama. Ona oo mai lea o

se manatu ia te au faapea sa Ia ono-saia mafatiaga ona o Lona alofa mo i tatou—mo au.

Sa ou lagonaina le alofagia e le Alii sa le mafai ai ona taofi ou loi-mata. Sa ou lagona e pei ou te le agavaa i le mea sa faia e le Faaola mo au. Ae sa ou lagona foi e atoatoa Lona alofa mo au. O le a tuuina atu e se ue lona ola e sui a'i ana uo (tagai Ioane 15:13). Ina ua amata le pese



O SE AAIFIAGA MAMA FAALEAGAGA

"Mo le faamanatuga ina ia avea ma se aafiaga faaleagaga o le faamamaina i vaiaso taitasi, e manaomia ona tatou saunia i tatou lava a o le'i o mai i le sauniga faamanatuga. Tatou te faia lenei mea e ala i le faataatia ese ma le loto i ai o a tatou galuega o aso taitasi ma mea faafafia ma lafoai ese manatu ma popolega faalelalolagi. A tatou faia lea mea, ua tatou faaavanoaina o tatou mafaufau ma loto mo le Agaga Paia. . . .

"A o tatou usuina le viiga o le faamanatuga, ia auai i le tatalo o le faamanatuga, ma taumamafa i faatusa o Lona tino ma le toto, tatou te saili atu ma le agaga tatalo le faamagaloga mo a tatou agasala ma lē atoatoa. Tatou te mafaufau i folafolaga sa tatou faia ma tausia i le vaiaso ua tuanai ma faia ni tautinoga patino faaletagata e mulimuli i le Faaola i le vaiaso a sau."

Elder Robert D. Hales o Le Korama a Aposetolo e Toasefululua, "O Le Manatuaina Pe O Ai i Tatou: O Le Faamanatuga, o le Malumalu, ma le Ositaulaga e Ala i le Auauna Atu," *Liahona*, Me 2012, 34.



faamanatuga, sa ou tu faatasi ma se tasi o uso e amata le sauniga.

Sa ma gagaua i tua le ie laulau matagofie lanu paepae lea sa ufiina le falaoa. Ao ou uuina le falaoa, sa ou iloa sa i ai lou tiutetauave i le tofotofiina e avea o se vaega o le sauniga, ae sa ou musu. O le falaoa e suitulaga i le tino o Keriso. Sa ou mafaufau i fitafita na faatiga i le Alii, ma sa ou le manao e tofotofi le falaoa. Ina ua ou tofiina le vaega muamua, sa ou mafaufau i auala tiga ma maasiasi sa feagai ai ma Iesu ao lei maliu o Ia—le pale tuitui, le sasaina, le mafatiaga. Sa faaaauau pea ona tafe ifo i lalo i ou alafau ou loimata ao ou saunia le falaoa.

Ona oo mai lea o se manatu ia te au faapea o nei mea tiga ma le maasiasi na tutupu na manaomia. O se vaega i latou o le taulaga togiola a Iesu Keriso, ma sa Ia faia le taulaga ona o Lona alofa mo au ma i tatou taitoatasi.

Sa amata ona ou lagonaina se olioli ma se filemu maoae. Sa ou tofotofia ma le faaeteete ma le lemu vaega uma o le falaoa, ma le iloaina o mea o loo ou uuina i lou lima o le a faamanuia ma faapaiaina mo se faamoemoega

faapitoa ma suitulaga mo se mea e pele, matagofie, ma tulagaese. Sa ou lagona le tiutetauave maoae o le faia o lenei sauniga ina ia mafai e i latou o i le sauniga ona faafou a latou feagaiga ma le Alii ma maua le faamanuia o le Togiola.

Ina ua maea le ma [galuega], sa ou vaaia le faatumulia o fata i falaoa sa tofotofiina. Sa matagofie ma paia le vaaiga. Sa fai e lau soa le tatalo. O le taimi muamua lea sa manino ai lou malamalama i le fuaitau “ina ia latou taumamafa i le faamanatuina o le tino o lou Alo” (MF&F 20:77).

Ina ua ou ai i le falaoa, sa ou toe lagonaina le alofa o lou Faaola. Sa ou lagona le puipuia, faalotomaualaloina, ma naunau e faia le mea sao. Sa ou manao e iloilo lou olaga ma salamo mai mea sese uma sa ou faia.

Ou te faafetai ia Iesu Keriso mo Lona alofa mo au. Ou te faafetai ua mafai ona tatou maua faamanuia o Lona Togiola: ia faamagaloina mai a tatou agasala ma maua le avanoa e toe foi atu ai i lo tatou Tama Faaleagi. ■

E alala le tusitala i le Aai o Mekisiko, Mekisiko.

FESILI E MANATUNATU LOLOTO I AI

O le a le mea e mafai ona ou faia i le aluga o le vaisaso e saunia lelei ai ia taumafa i le faamanatuga? O le a le mea ou te mafaufau i ai i le taimi o le faamanatuga? Pe o ou lagona le faamagaloga ma maua musumusuga ao ou ai ma inu i le faamanatuga?

O LUITAU O FAAMANUIAGA IA

Saunia e Rachel Harrison

O mea sa ou manatu o ni luitau o le faaipoipoga o le malumalu ae, nai lo lena, sa avea ma faamanuiaga matagofie.

Sa ou talanoa ma se uo lelei e uiga i faamanuiaga o le faaipoipo atu i le malumalu. Sa ou fai atu faatausua sa na o ni nai faamanuiaga e mafai ona ou mafaufau i ai, ae e mafai ona ou mafaufau i le tele o luitau. “Ia,” o lana tala lea, “atonu o faamanuiaga na!”

Sa ou iloa e sao o ia.

O le faamauina i le malumalu ua faamanua ai au ma se vaaiga e faavavau i le faaipoipoga ma le aiga. O au feagaiga o le malumalu ua avea ma “matatioata” lea ma te vaai ai ma

lou toalua i taimi uma i filifiliga o i mafuma, e oo lava ao avea ma se ulugalii talavou faatoa faaipoipo.

O Se Vaaiga e Faavavau

Sa ma amataina lo ma faaipoipoga ma se vaaiga e faavavau, ma sa ma lagona ai o lona uiga e le tatau ona ma tolopoina pe faatapulaaina ia fanau o loo faatalitali e o mai i le ma aiga. Sa faaauau pea e lou toalua ana suesuega i le iunivesite ao tuputupu ae lo ma aiga. E oo atu i le taimi na ia ulufale ai i le galuega tumau, ua toalima le ma fanau. Sa ou faaauauina pea au aoga le tumau ina ia mafai ona ou tausia le ma fanau i le fale. Ou te vaai i tua i na muai tausaga ma le fiafia. O ni tausaga matagofie! Sa ma i ai i se falemautotogi laitiiti ma le fanau e toalua e i lalo ifo ma le 15 masina, ao ola ai i se alauni itiiti a tamaiti aoga ma tele le aai i fasipovi vili (hamupeka).

Ou te manatu i na tausaga amata o a matou tausaga faapaionia—sa matou sopoia ia “laufanua valevaledona” o suesuega o aoaoga maualuga, amataina o le ma aiga, ma ola ai i punaoa tautupe ua faatapulaaina. Ou te lagona le mea e tasi—ae ua na o se tikeri itiiti—i mea na tau mai e se tasi o e na faasaoina o le kamupani o taavaletoso a Matini i le latou faigamalaga: “Sa o mai uma lava i matou taitoatasina ma le malamalama mautinoia

o loo soifua le Atua, aua ua matou masani ma Ia i o matou puapuaga.”¹

I vaaiga faalelalolagi, o mea na ma filifilia e fai i na uluai tausaga o le faaipoipoga e le talafeagai. O le tuu i tua o lou faauuga ina ia fai se fanau, o le ola ai i se totogi a le tagata e toatas, ma le ositaulagaina o nisi mea manaia atonu sa foliga e faavalevalea. Peitai sa fetalai le Alii ia Isaia:

“Aua o o’u manatu e le o outou manatu, o o’u ala e le o outou ala, ua fetalai mai ai le Alii.

“Aua e pei ona sili ona maualuga o le lagi i le lalolagi, ua faapea ona sili ona maualuga o o’u ala i o outou ala, ma o’u manatu e sili i o outou manatu” (Isaia 55:8–9).

O le ositaulagaina o sini faalelalolagi ina ia mulimuli i le finagalo a le Tama Faalelagi mo lo ma aiga sa avea o se faamanuiaga faalotomaualaloina i o ma olaga.

Fetaiai Faatasi ma Luitau

Ua tatou faitau i le Mataupu Faavae ma Feagaiga faapea o i latou o e “loto e tausi a latou feagaiga e ala i le tau-laga . . . e taliaina e [le Alii].

“Aua o A’u, o le Alii, o le a faia i latou ia fua mai e pei o se laau fua tele ua toto i se fanua lelei, i tafatafa o se vaitafe mamā, e fua mai ai ni fua pele e tele” (MF&F 97:8–9). O le ma fanau e toalima o ma fua faapelepele ia. O i latou o a ma faamanuiaga silisili

O le faaipoipoga e aumaia ai nisi o tiutetauave e sili ona taua o le olaga—ma nisi o taimi aupito sili ona fiafia o le olaga. Matou te mananao e faalogo e uiga i taimi fiafia na maua i laoulua faaipoipoga. Faasoa au tala i liahona.lds.org (kiliki “Auina Atu Lau Galuega”) po o le imeli i le liahona@ldschurch.org.



e aunoa ma se masalosalo.

Ao faagasolo tausaga, sa ma feagai ma lou toalua ma le tele o luitau i le ma olaga faaipoipo, ma i le toe mafau-fau i ai ua mafai ona ou fai atu ma le faamaoni ou te faafetai i ai. E faama-nuia i tatou e le Alii i tofotofoga ina ia toe faaleleia i tatou o ni tagata taitoas-tasi ma fesoasoani ia tatou liliu atu ia te Ia ma o tatou soa.

O le faaipoipoga o le malumalu o le feagaiga sili lea ona maoae o le faaaeaga. A tausia lenei feagaiga, o le a taitai atu i le tikeri e sili ona maua-luga i le malo selesitila, po o le ola e faavavau, o lona uiga o le faavavau faateleina (tagai MF&F 131:1–4). Ona o lenei taui maoae, e tatau ona tatou faamoemoeina se faaipoipoga o le malumalu e faalautele i tatou, ia suia o tatou lava natura.

Sa saunoa Elder Bruce C. Hafen, o se sui Fitugafulu ua faamaloloina, faapea: “Atonu tatou te amata i le faaipoipo mo le toafimalie. Ona oo mai

lea o faafitauli. Afai tatou te taumafai faamaoni e foia i latou, atonu tatou te le maua i taimi uma le toafimalie, ae o le a tatou tuputupu ae. Ona iu lea ina tatou faaipoipo e le ona o le toafim-alie ae mo le olioli.”² O le foiaina faatasi o a maua faafitauli e le i toafim-alie i taimi uma, ae ua aumaia moni le olioli ia i maua.

Galuega Mamafa ma le Olioli

O le avea ai ma se tina o se tau-mafaiga sili ona faigata ua ou faia. Ao le i i ai ni fanau, sa ou manatu o le avea ai ma se tina o le a tele lava ina, pe afai e le o taimi uma, olioli—milo faatasi ma sina minute pe lua o le galue malosi. Ae ua ou malamalama nei o le isi auala. Ona o lou paaga e faavavau ma lou toalua, ua avea lou tulaga faalematua ma le faaipoipoga o se potu suesue mo le avea e faapei o le Tama Faalelagi. O le tiutetauave o le tulaga faalematua i lenei olaga e talit-tusa i le galuega ma faamoemoega

a lo tatou Tama Faalelagi, “ia aumaia le tino ola pea ma le ola faavavau o le tagata” (Mose 1:39). O le avea ma se ava ma se tina e manaomia ai le onosai faalelagi, malosi, ma le alofa. O le avea ai ma se tina ua fesoasoani ia te au ina ia avea atili e faapei o le Atua i le natura, manaoga, ma avanoa.

O le faamauina i le malumalu ua faamanuiaina ai au i auala ou te lei faamoemoeina. O se punavai o le malosi ia te au ma se tulaga mautu i lau fanau. O se sootaga maopoopo e oo atu i ou tuaa ma faamanuiaina ai i latou ao ou faia o latou galuega faalemalumalu. O lau faaipoipoga faalemalumalu e taua ai osigataulaga uma, ma ou te iloa e aumaia ai faamanuiaga maoae. ■

O le tusitala e alala i Niu Sila.

FAAMATALAGA

- Francis Webster, i William R. Palmer, “Pioneers of Southern Utah,” *The Instructor*, Me 1944, 217–18.
- Bruce C. Hafen, *Covenant Hearts: Marriage and the Joy of Human Love* (2005), 13.

SAMUELU

"Ua uunaia pea a'u i le tala i le tama o Samuelu, ma lana tali atu i le valaau a le Atua."

—Peresitene Thomas S. Monson¹

Sa le fanau lou tina, o Hana, ma sa tatalo i le malumalu mo se atalii, ma folafola atu e tuuina atu o ia i le Alii. Sa tali le Alii i ana tatalo; ma sa ia fanaua au. Ao ou laitiiti, sa ia aumaia au i le malumalu e auauna atu ia te Ia. O iina sa tausia ai ma aoao ai au e le fataulaga o Eli.²

Ao tamaitiiti, sa ou faalogo i se leo o valaau lou igoa i se tasi po. E faatolu ona ou alu atu ia Eli, ae na te i valaauna au. Sa ia faapea mai o le Alii sa valaau ia te au. Sa ou mulimuli i le fautuaga a Eli ina ua faafa ona ou faalogo i lou igoa ma tali atu, "Fetalai mai ia; aua o loo faalogologo atu lau auauna."³ Sa fetalai mai le Alii ia te au, ma ao ou tuputupu ae, sa faatasi o Ia ia te au. Sa ia valaauna au e avea ma Ana perofeta.

Ina ua ou matua, sa ou tofia ou

atalii e fai ma faamasino i Israelu. Sa le amiontonu ou atalii, o lea sa talosaga ai toeaiina o Israelu mo se tupu. Sa ou lapataia tagata i tulaga lamatia o le i ai o se tupu, ae sa faaauau pea i o latou talosaga. Sa poloaiina au e le Alii e tatau ona ou "usitai i a latou upu."⁴

Sa auina mai ia te au e le Alii ia Saulo—"o le taulealea aulelei"⁵—ma ou faauina o ia e avea ma "pule i [le] nuu o Israelu."⁶ Sa avea o ia ma o latou tupu. Ae peitai, ina ua poloaiina e le Alii Saulo e faaumattia sa Amaleka ma mea uma ua ia i latou, sa ia le usiusitai. Sa ia faasaoina manu a sa Amaleka ma ofoina atu o ni taulaga. Sa ou aoaoina Saulo e faapea "o le faalogo e sili lea i le taulaga, ma le usiusitai e sili lea i le ga'o o mamoe poa"⁷

Ona o le le usiusitai o Saulo, sa poloaiina au e le Alii e faauina se tupu fou mai atalii o Iese. Sa faailoa mai e Iese ona atalii matutua e toafitu, ae e lei filifilia i latou e le Alii.⁸ Sa faali mai e le Alii ia te au o le uii, o Tavita, e tatau ona avea ma tupu. Masalo o foliga po o le maualuluga, atonu na foliga mai ai ia uso matutua o Tavita e pei o ni tupu o i le lumanaui, peitai sa filifilia e le Alii lenei atalii leoleo mamoe talavou e taitaia Lona nuu.⁹ ■

FAAMATALAGA

1. Thomas S. Monson, "O Le Perisitue i Lona Faatinoina," *Liahona*, Ian. 1993, 58.
2. Tagai 1 Samuelu 1-2.
3. 1 Samuelu 3:10.
4. 1 Samuelu 8:22.
5. 1 Samuelu 9:2.
6. 1 Samuelu 9:16.
7. 1 Samuelu 15:22.
8. Tagai 1 Samuelu 16:10.
9. 1 Samuelu 16:7.



SEFULUAI MA TAULAGA

Ole totogiina o sefuluai ma taulaga, e mafai ai ona aoaoina le fanau e tausia e le Alii Ana folafolaga.

I se tusiga i itulau e 60–61 o lenei lomiga, sa saunoa ai Elder Anthony D. Perkins o le Fitugafulu e uiga i le ala o le totogiina o le sefuluai ao le i faaluina lana tupe maua ao talavou, na aoao ai o ia ia iloa le va o manaoga ma mea e manaomia.

Na faapea mai Elder Perkins ina ua ia tausia lenei poloaiga, “sa atili malosi lou faatuatua ma e oo lava i lou manao e tausia isi poloaiga a [le Alii].” Sa ia faataitaia se mataupu faavae o aoaoina i le *Mo Le Malosi o le Autalavou*: “E taua ou uiga faaalia i le totogiina o le sefuluai. . . . Ia totogi ma le naunautai ma se loto e tumu i le faafetai” ([2011], 38).

Fautuaga mo le Aoaoina o le Autalavou

- E masani ona mafai ona aoao le autalavou mai faataitaiga a isi. Tagai “O Faamanuiaga o le Sefuluai” (*Liahona*, Mat. 2013, 26) e faitau ai e uiga i tagata e toalima o e sa faamanuiaina ona sa latou totogi le sefuluai. Talanoaina auala ua faamanuia ai lou aiga e

le sefuluai. E mafai foi ona e talanoa e uiga i auala ua faamanuia ai e le sefuluai ma taulaga tagata uma o le Ekalesia.

- Mafaufau e faitau faatasi le vaega o sefuluai ma taulaga anapogi i le *Mo Le Malosi o le Autalavou* (itulau 38–39). Atonu tou te talanoaina pe faapefea ona fesoottai le sefuluai ma taulaga anapogi ma pe faapefea ona totogiina e lou aiga taulaga anapogi.

Fautuaga mo le Aoaoina o Tamaiti

- Mafaufau e faaaoga le faataitaiga o i lalo: Tuu ni tupe siliva se 10 i luga o se laulau. Fesili atu i tagata o le aiga po o a ni o latou lagona pe afai e te fai atu o le a e tuuina atu ia i latou tupe siliva e iva ae o le a e taofia na o le tasi e fesoasoani ai e fausia le malo o le Alii. Mata o le a latou naunau e talia lena ofo? Ona mafai lea ona e faamalamalama atu mea e tutusa ai lenei tulaga ma le tulafono o le sefuluai.
- E mafai ona e faaaoga le vaega “Mo Tamaiti Laiti” i le *Liahona* (itulau 70–72) o Aokuso 2011, e aofia ai se aafiaga moni o le



MAU E UIGA I LENEI AUTU

- Levitiko 27:30, 32
Teuteronome 26:12
Neemia 10:38
Malaki 3:8, 10; tagai foi 3 Nifae 24:8, 10
Luka 18:12
Alema 13:15
Mataupu Faavae ma Feagaiga 64:23;
97:10–12; 119:3

olaga lea sa aoao ai e se tamaititi o le totogiina o le sefuluai o se filifiliga lelei—e tusa lava pe o lana foai o se tupe siliva e tasi. E mafai foi ona e faatumua faatasi ma lau fanau ia gaoioiga e faatau i ai. ■

E mafai ona maua lomiga talu ai nei o le Liahona i luga o le initonet i le liahona.lds.org.



O ala uma o faa-salalauga e te faa-aogaina e i ai sona aafiaga ia te oe. Pe o lau filifiliga o ala o faasalalauga e faagaeetia, i ai se faamoemoega, ma e musuia?

Saunia e Katherine Nelson

Ina ua aumai Tanielu, Satakara, Mesako, ma Apeteniko i le faamasinoga a le Tupu o Nepukanesa, sa faatonuina i latou e aai i meaai a le tupu ma feinu i uaina a le tupu. Ae sa latou filifili e aai i fua o laau (o se meaai e gaosi mai le saito) ma inuina le vai. Ina ua mavae aso e 10, “ua sili ona lalelei o latou mata mona tino lelei i tama uma e na aai i mea taumafa a le tupu. . . [Ma] ua foaiina e le Atua ia te i latou le faautauta ma le atamai: a o Tanielu ua poto ia i faaaliga uma lava ma miti” (Tanielu 1:15, 17).

E ui lava e masani ona tatou faaaogaina lenei tala e faaali ai mataupu faavae taua e uiga i le Upu o le Poto ma meaai tatou te faaaogaina *moni*, e aoaoina isi mataupu faavae e uiga i *faatusatusaga* o mea tatou te faaaogaina. E aofia ai ala o faasalalauga o tatou faaaogaina mo faafiafiaga—soo se mea mai faatufugaga, tusi, siva, ma musika i masini omiomai ma ala o faasalalauga faaleagafesootai. E pei lava ona faia e Tanielu ma ana uo se faaiuga atamai e aloese mai meaai e tele, meaai mamaifa o le a latou le maua ai le malosi latou te manaomia—ma e ono taitaieseina ai i latou mai a latou aoaoga i le maota o le tupu—o lea e tatau ai ona tatou iloatino i le filifilia o faafiafiaga lelei (tagai MF&F 25:10).

O fautuaga nei e mafai ona fesoasoani ia i tatou e filifili ai faafiafiaga e aoga mo lo tatou taimi taua i lenei olaga faataitai.



Aloese mai Manatu-Māmā

Tatou te liliu atu i faafiafiaga mo se toomaga mai popolega o aso taitasi. E mafai ona avea o se taimi e malolo ai ma faasoalaoa le ata ma talanoaga lelei ma aiga ma uo.¹ O le malosi faafouina ua tatou lagonaina mai nei gaoioiga e sau mai le uunaiga a le Agaga Paia, o ona fua o le “alofa, olioli, filemu, onosai, matalofa, agalelei, faamaoni, agamalu, [ma] le le gaoiā” (Kalatia 5:22–23). Ina ia mafai ona lagona le toe faafouina pe a maea a tatou mea faafiafiaga, e tatau ona tatou filifili ia faafiafiaga tatou te avanoa ai mo musumusuga ma le mana faamalolo o le Agaga Paia.

Ina ia aloese mai le aveesea o le mafutaga a le Agaga Paia ma le faaleagaina o tatou agaga, ua fautuaina i tatou ia aua nei “faatasi atu, matamata, pe auai foi i soo se mea inosia, le mama, faatupu vevesi, pe faaponokalafi i soo se itu.”² Ae o nisi taimi o faasalalauga e foliga ua faaleaogaina ai le anotusi le mama e mafai ona faatamaia e ala i le faalavelave mai ia i tatou mai lo tatou faamoemoega o le olaga.

E ui e mafai e faafiafiaga lelei ona fesoasoani ia i tatou ia lagona le fiafia, o isi tulaga o faafiafiaga e mafai ona taitaia i tatou ia manatu mama. I le Mataupu Faavae ma Feagaiga ua poloaiina i tatou e le Alii: “Ia taofi mai ia outou upu faatauvaa uma, mai toega uma, mai o outou manao tuinanaau uma, [ma] ma lo outou faamaualuga ma manatu-māmā uma” (88:121). O nisi o faafiafiaga e aveesea i tatou mai le faamoemoega o le ata o le faaolataga e ala i le faatumuina o tatou mafafau i mea ua faamatalaina

e Elder Dallin H. Oaks o le Korama a Aposetolo e Toasefulula o mafaufauga le aoga ma mea e le taua.³ O na faafiafiaga manatu-mama e mafai ona vave pu’ea tatou ma avea “le le faaaloalo fuafuaina e faaletaua ai le paia ma e sili ona leaga ai le manatu mama i mea paia ma upu masoa.”⁴



Avea ma se Sui Malosi

E ui lava e mafai ona faigofie atu le faatagaina o faafiafiaga tatou te faalogo-logo i ai, matamata i ai, ma faitau i ai e ulufale i o tatou loto ma mafaufa e aunoa ma le mafaufaina, o se vaega taua o le olaga o le aoao pe faapefea ona avea ma sui—ia aoao “e fai mo i [tatou lava] ae le faamalosia” (2 Nifae 2:26). O se vaega o le avea ma sui moni o le faautauta lea e uiga i faafiafiaga e te faaaogaina.

Nai lo le faaaogaina o ala o faasalalauga mo faafiafiaga ma le le manatu i ai, e tatau ona tatou mataala i le aofaiga o taimi o tatou faaaluina i ai ma o a savali e—e iloa gofie po o natia—o auina mai. Ua faamalamalama mai e Ryan Holmes, faatonu o Vaega o Masini Faasalalau i le Iunivesite o Polika Iaga, faapea e tatau ona tatou “faaaoga tatau le

tekinolosi” ma iloilo ma le faaeteete “ona taunuuga uma.”⁵ Ua fai mai Amy Petersen Jensen, faauluulu o le matagaluga o Theatre ma Media Arts i le Iunivesite o Polika Iaga, e taua le “filifili e auai i talanoaga o ala o faasalalauga aoga ma aloese mai faaaoga o ala o faasalalauga le aoga.”⁶



Faaaoga ma le Atamai le Taimi

O se vaega o le avea ma se sui o le mataala lea i le aofaiga o le taimi o tatou faaaluina i faafiafiaga. Ona o le tele o mea e filifili mai ai, e faigofie ona maileia i le foloina “po o a lava mea e oo mai ia te oe e ala mai i le tesi, imeli, fafagaina o faamatalaga, faagasologa, ma faalauiloaga o faamatalaga fou”⁷ Ae pe a tatou faia, tatou te faamaumauina ia “aso o lo [tatou] vaa-vaaiiga” (2 Nifae 9:27) i gaoioiga faamaumau taimi ia e le fesoasoani ia i tatou ina ia malosi atili ai, atamai atili, avea atili ma sui agaalofa a Iesu Keriso.

Nai lo le faamaumauina o le afiafi atoa i se vitio fou tautaua, ata lauloa fou o le tv, po o le faafouina o faale-agafesootai, e mafai ona tatou naunau e faatulaga taimi e fiafia ai i faafiafiaga anoa ia faafouina i tatou. Ua faapea mai Brother Holmes, “Ia faia se filifiliga atamai. Filifili oe po o le a, o afea, ma pe faapefea ona e faaaoga ala o faasalalauga faatekinolosi.”⁸



Filifili Ala o Faasalalauga e Faagaeetia

O le isi vaega taua o le filifilia ma le faaeteete o a tatou faafiafiaga o le silafia lea o savali o loo auina mai e ala o faasalalauga.

O tulaga uma o faafiafiaga e fesootai mai se mea, pe o ana savali e faamoemoeina pe leai. Ao latou fiafia i se atafifaga po o se tusi, mo se faataitaiga, fesili ia te oe lava po o a ni savali e fesootai mai ia te oe e ala i ona faatusa, mataitisi, upu, ma ata. O a ni ona mea taua? O a amioga e na te fautuina? O le mea e aupito sili ona taua, mata na te fesoasoani ia te oe e mafaufau i ai ma faamamalu Iesu Keriso? Mata e fesoasoani ia te oe ia malamalama i Lona tulaga paia? Mata e aoao oe i se mea e uiga i le taulaga? e uiga i le alofa? e uiga i le manatu faapito? Mata o tau maia se mea e uiga i le taua o aiga po o le paia o le faaipoipoga? Afai e le mafai ona e maua ni upumoni e faatatau i le talalelei mai le savali o lau faafiafiaga, e le o taua ma aoga ai lou taimi.

Atonu o le faaosoooina nisi e fai mai, “Ua na o se faafiafiaga—e le o le aoga po o le lotu. Ou te le manaomia le aoaoina mai ai o se mea.” Ae pe o e iloaina pe leai, “po o le a lava se mea o e faitauina, faalogo i ai, pe matamata i ai e i ai sona aafiaga ia te oe.”⁹

Pe a gauai atu o tatou mafaufau ma loto i le iloiloina o ala o faasalalauga o tatou faaaogaina, ua tatou maua ni taimi o faaataataga. E taua e Polofesa Jensen nei taimi o se “talanoaga”: “o se fefaaaoai o manatu—o se fefaaaoaaiga po o le talanoa mai ma talanoa atu ao tatou faalogo ma tali atu. O talanoaga sili tatou te faia e masani lava o taimi tatou te salamo ai faalilolilo, aua e tele lava o le taimi o talanoaga lea e suia ai o tatou mafaufau, saili se ala fou, pe filifili ina ia lelei atili. O suiga ia tatou te faia i o tatou agaga i vaitaimi ia e masani lava e itiiti, faatauvaa, faateleina, toafimalie, ma aoga.”¹⁰

Tatou te saili atu i “nisi mea e mama, matagofie, pe logoleleia pe tauleleia”—e oo lava i o tatou taimi paganoa (Mataupu Faavae o le Faatuatua 1:13). I le avea ai ma sui o Iesu Keriso e tatau ona tatou tausisi “o mea uma e [tatou te] faitau pe [matamata i ai] . . . aoao se mea lelei pe atiae se mea lelei ia i [tatou lava] po o [o tatou aiga].” O tatou fegalealeiga ma faafiafiaga e tatau ona avea ma ni “uiga faamomoeina ma paia . . . lea e [fesoasoani ia i tatou] ia maua ma faaso le vaai mamao a lo tatou Tama Faalelagi.”¹¹

Ua tatou iloa e faagaeetia i tatou i na faafiafiaga o ituiga amio mama, matagofie, ma tauleleia—o ala o faasalalauga e taua—, e saunia ai i tatou mo faigata o le olaga, ma faamalosia ai lo tatou avea ai ma soo. ■

E alala le tusitala i Iuta, ISA.

FAAMATALAGA

1. Tagai “O Le Aiga: O Se Folafolaga i le Lalolagi,” *Liahona*, Nov. 2010, 129, lea e lisina “gaoioiga faafiafiatau” o se tasi o mataupu faavae lea e fausia ai se aiga fiafia.
2. *Mo Le Malosi o le Autalavou* (2011), 11.
3. Tagai Dallin H. Oaks, “O Manatu Mamana,” *Liahona*, Jan. 1996, 31.
4. Brad Wilcox, “If We Can Laugh at It, We Can Live with It,” *Ensign*, Mat. 2000, 29.
5. Ryan Holmes, “The Truth of All Things,” (Faigalotu a le Iunivesite o Polika Iaga, Me 7, 2013), speeches.bry.edu.
6. Amy Petersen Jensen, “Some Hopeful Words on Media and Agency,” (Faigalotu a le Iunivesite o Polika Iaga, Mat. 20, 2012), speeches.bry.edu.
7. Holmes, “The Truth of All Things,” speeches.bry.edu.
8. Holmes, “The Truth of All Things,” speeches.bry.edu.
9. *Mo Le Malosi o le Autalavou* 11.
10. Jensen, “Media and Agency,” speeches.bry.edu.
11. Jensen, “Media and Agency,” speeches.bry.edu.

Aveesea, Faalematua

Saunia e Jan Pinborough

Mekasini a le Eklesia

Efa ni upu faigofie sa fetalai ai le Faaola: "Faauta io outou tamaiti." Sa liliu mata o sa Nifae i a latou fanau. Ma o mea na mulimuli mai o loo i le lotolotoi o mea aupito sili ona paia na tutupu i tusitusaiga paia uma. (Tagai 3 Nifae 17:23–24.)

Sa ou aafia muamua i le "vaaia" o lau tama teine muamua ina ua avea ma se pepe fou. Na fagua au i lana tagi itiiti faifai pea pe a ma le vaeluapo, ma sa ou sauni e fafaga o ia ae tupu loa. Sa matala ona mata ma vaai sa'o mai i ou mata mo se taimi umi lava. Ao ia vaai ma ou "vaaai" moni i le tasi ma le isi mo le uluai taimi, sa ou lagonaina se mea e uiga i le noataga e faavavau o le a ma faasoaina.

Ua faamaonia mai e suesuega o neura o le tino, le taua o le "vaaai" faalematua i fanau." E tusa ai ma le fomai o suesuega o neura o le tino o Dr. Allan N. Schore, le taua o le fesoontauga le muagagana o le "sioa atu" i le atiina ae lelei o le faiai o le pepe.¹ I tausaga mulimuli ane, o lenei fesoontaiga e tumau pea le taua i le atiina ae o le mafaufau, loto, ma agaga a o tatou fanau tuputupu ae.

O le "vaaai" e le o le tuuina atu o se tepa

faasamasamanoa ma le faalavelaveina. O le gaoioiga o le fesoasoani atu i le loto ma le mafaufau o le isi tagata. O le tuuina atu o le ituaiga o tauaiga ma le mafaufau i ai o faapea atu, "ua ou vaai atu ia te oe. E taua oe ia te au."

Mo matua o i lenei vaitaimi, o lenei ituaiga o vaai e masani ona manaomia ai le amio ia aveesea, o se filifiliga faalemafaufau e liliu ese mai i a tatou lau ma tape a tatou masini omiomi. E ono faauigaina faapea o le teneina lea o faaososoga o le siaki o a tatou feau tesi po o le siaki o a tatou faamatalaga tusitusia i ala o faaleagafesootai. Atonu e faaaofia ai faalemafaufau le faavaeina o tulafono o ala o faasalalauga a tagata patino ma le aiga, faatulagaina o tuaoi o le a puipuia ai le taimi paia tatou te tuuina atu i le tasi ma le isi i totonu o tatou aiga i aso uma.

O le taumafai ia sili atu ona atoatoa ma ia sili atu ona tele le vaaai i o tatou fanau iti, o le a tatou tausia ai lagona o le faatauaina, faaoaina o a tatou fegalegaleaiga ma le tasi ma le isi, ma olioli i le tele o na taimi paia pe a tatou vaaai loloto i a tatou fanau. ■

FAAMATALAGA

1. Tagai "Relational trauma and the developing right brain: The neurobiology of broken attachment bonds," i Tessa Baradon, ed., *Relational Trauma in Infancy* (2010), 19–47.



ALUESE MAI MA FAALOGO ATU MA LE ALOFA

"O le tali i a tatou tatalo e uiga i le auala e fetai ai ma manaoga o a tatou fanau, atonu ia faatele se taimi e aluese ai mai mea faatekinolosi. E mouese atu ia taimi taua o avanoa e fegalegaleai ai ma talatalanoa ai ma a tatou fanau pe a tatou pisi i mea faasalalavei. Aisea e le filifilia ai se taimi i aso taitasi e aluese ai mai i mea faatekinolosi ae fesootai atu i le tasi ma le isi? Na o le tape lava o mea uma." A e faia lea mea, o le a foliga filemu lou fale i le taimi muamua; atonu foi o le a e leiloaina po o le a se mea e fai po o se tala e fai atu. A o e tuuina atu atoao lou mafaufau i lau fanau, o le a amatalia se talanoaga ma o le a e fiafia e faalogologo atu i isi."

Rosemary M. Wixom, peresente aoao o le Peraimeri, "O Upu Tatou Te Tautatala Ai," *Liahona*, Me 2013, 82.





Saunia e
Linda K. Burton
Peresitene Aoao
o le Aualofa

O LE MANA O LE PERISITUA



UA AVANOA MO TAGATA UMA

O le pule o le perisitua e faaeeina atu e ala i le faauuga, ae o le mana o le perisitua e avanoa mo tagata uma. O le ola amiontu o le agavaa lea mo i tatou taitoatasi e valaaulia ai le mana o le perisitua i o tatou olaga.

Ua faamanuiaina i tatou e ola i lenei vaitau o le talafaasolopito o le Ekalesia pe a tuuina mai ni fesili e uiga i le perisitua. E i ai le fiafiaga sili ma le manao ia iloa ma malamalama atili e uiga i le pule, mana, ma faamanuiaiga e faatatau i le perisitua a le Atua. O lou faamoemoe ina ia mafai e le aoaoga faavae o le perisitua ona “*to ifo* i luga [o tatou

agagal] e pei o le sau mai le lagi” (MF&F 121:45; faaopoopo le faamamafa). Ou te molimau atu faapea ua faanatinati e le Alii Lana galuega, ma e matua taua tele mo i tatou le malamalama pe faapefea ona faataunuina e le Alii Lana galuega ina ia mafai ona tatou maua le mana lea e oo mai i le ogatasi ai ma Lana fuafuaga ma faamoemoega.

Ua faataunuina lava e le Alii Lana galuega, o le “aumaia le tino ola pea ma le ola faavavau o le tagata” (Mose 1:39), e ala i le mana o Lana perisitua. E ala i le [mana o le Lona perisitua] na foafoa ai le lagi ma le lalolagi. O sauniga o le perisitua, ua mafai ai ona faatoilalo aafiaga o le Pa’u ona o le Togiola a Iesu Keriso. Talu ai ua tuuina mai le pule o le perisitua i le tagata e



faamanuia ai fanau a le Tama Faalelagi, ua Ia finagalo ina ia tatou valaulia le mana o le perisitua i o tatou aiga ia faamanuia ma faamalosia ai o tatou aiga ma o tatou olaga taitoatasi.

I leaoaoga a taitai i le lalolagi atoa i le 2013, sa saunoa malosi mai ai Elder Dallin H. Oaks o le Korama a Aposetolo e Toasefululua e faapea: “O alii e le o le perisitua!”¹ Mo au, o se lapataiga lena faatasi ai ma se valaaulia mo i tatou uma e suesue, mafaufau loloto, ma o mai ia sili atu le malamalama i le perisitua. Afai e fesili atu se tasi, atonu o se tamaitiiti po o se uo e auai i se isi faatuatuaga, ia te oe i fesili nei, e mafai ona e taliina?

- O le a le Perisitua?
- Aisea e taua tele ai le perisitua?
- O a ki o le perisitua?
- O ai e umia ki o le perisitua?

O le a le perisitua?

O le perisitua o le mana ma le pule faavavau a le Atua lea e Na te faamanuia, togiola, ma faaeaina Ana fanau. Na faamalamalama mai e Elder David A. Bednar o le Korama a Aposetolo e Toasefululua le perisitua i le auala lenei: “O le perisitua o le auala lea e galue ai le Alii e ala i tama tane ia laveai agaga. . . . E faamoemoe i se tasi e umia le perisitua, na te faaaogaina lenei pule paia e tusa ai ma le mafaufau, finagalo, ma faamoemoega o le Atua. *E leai se mea o faatatau faapea e faapito'au le perisitua. O le perisitua e faaaogaina i taimi uma e auauna atu ai, faamanuia, ma faamalosia ai isi tagata.*”²

Ao ou suesue, mafaufau loloto, ma saili ia malamalama i le perisitua, ua

“E leai se mea o faatatau faapea e faapito'au le perisitua. O le perisitua e faaaogana i taimi uma e auauna atu ai, faamanuia, ma faamalosia ai isi tagata.”

Elder David A. Bednar o le Korama a Aposetolo e Toasefululua

leai se malamalama, leai se faamoe-moe—na o le pogisa.”³

O le manatu e leai se mana o le perisitua e atuatuvale. O au, o se tasi,



fesoasoani ia te au e iloilo ai le tulaga o le lalolagi *e aunoa* ma le [perisitua]. Sa iloaina e Elder Robert D. Hales o le Korama a Aposetolo e Toasefululua lenei manatu ina ua ia saunoa mai e faapea: “E mafai ona e mafaufau i le pogisa ma le valevalenoa o le olaga faaletino pe ana fai e leai se perisitua? Ana fai e le i ai le mana o le perisitua i le fogaeleele, semanu e saoloto le tiapolo e fealua’i ma nofotupu e le mataofia. Semanu e leai se meaalofa o le Agaga Paia e taitai ma faamalamalamaina ai i tatou; leai ni perofeta e saunoa mai le suafa o le Alii; leai ni malumalu e mafai ona tatou osia ai feagaiga paia faavavau; leai se pule e faamanuia pe papatiso ai, e faamalolo pe faamafanafana ai. . . . Semanu e

e tu i luga ma olioli ma le lototoa i lenei mana paia ua toefuatai mai i le lalolagi e ala i se perofeta a le Atua i lenei tisipenisione mulimuli ma mamalu o le atoaga o taimi!

Ae peitai, ua apoapoai mai ia i tatou Elder Oaks, i lo tatou tauina o le perisitua: “E ui ina tatou faasino i e ua umia le perisitua o ‘le perisitua,’ ‘aua nei galo ia i tatou, o le perisitua, e lē ā i latou o ē ua umiaina. Ua latou umiaina i se *faalagolagoga paia ia faaaoga mo le manua o alii, tamaitai, faapea foi ma fanau.*”⁴

Aisea e taua tele ai le perisitua?

Ua tatou iloa “o le fuafuaga paia o le fiafia, ua mafai ai ona faaaaua fegalegaleaiga faaleaiga i tala atu o

le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatas i le afioaga o le Atua ma toe faatasia ai aiga e faavavau.”⁵ E pei ona aoao mai Elder Russell M. Nelson o le Korama a Apostolo e Toasefululua e faapea, “Ua toe fuataiina le pule o le perisitua ina ia mafai ona faamauina aiga e faavavau.”⁶

“E manaomia le pule o le perisitua e faatino ai ia sauniga o le talalelei. . . O sauniga taitasi e tatalaina le faito-toa mo faamanuiaga lauusiusi faale-agaga.”⁷ Sa tuuina atu e Iesu ki paia o le malo ia Peteru ma le tiute e faapea “o se mea e te fusifusia i le lalolagi, e fusifusia foi lea i le lagi: o se mea foi e te tala i le lalolagi, e tatalaina foi lea i le lagi” (Mataio 16:19).

O a ki o le perisitua?

O se faamalamalamaaga faigofie o ki o le perisitua o loo maua i le *New Era*: Me 2012

“Faatasi ai ma seti o ki, e mafai ona e faia le tele o mea o le a le mafai ona e faia i se isi tulaga—ulufale atu i fale, ave ia taavale, ma tatalaina keli, i le lotolotoi o isi mea. O ki, e matele lava lona uiga, o le pule ma le faatagaga.

“O le mea moni foi lena e tasi i ki o le perisitua. Latou te pulea le faata-gaga i faamanuiaga ma sauniga o le perisitua. . . O ki o le perisitua o i ai aia tatau e pulefaamalumalu ai ma taitai le Ekalesia. . . E masani ona faaaoga ki i se eria faafafanua, e pei o se uarota, siteki, po o le misiona. E masani ona latou faaaofia ai foi le pule i luga o sauniga ma gaoioiga faapitoa (mo se faataitaiga, papatisoga, faa-manatuga, galuega faafaifeautalai ma faalemalumalu).”⁸

O ai e umia ki o le perisitua?

“O Iesu Keriso o loo umia ki uma o le perisitua e faatatau i Lana Ekalesia. Na Ia faaee atu i luga o Ana Apostolo taitasi ki uma e faatatau i le malo o le Atua i le fogaeleele. O le Apostolo sinia o loo soifua, o le Peresitene o le Ekalesia, ua na o le pau lea o le tagata i luga o le fogaeleele ua faatagaina e faaaogaina ki uma o le perisitua (tagai MF&F 107:91–92). . . [Ona ia] faamatuu atu lea o ki o le perisitua i isi taitai perisitua ina ia mafai ai ona latou pulefaamalumalu i eria o o latou tiutetauave. . . E le maua e peresitene o ausilali ma o latou fesoasoani ni ki. Latou te maua le pule e faamatuu atu i ai e galalue ai i o latou valaauga.”⁹

Peitai, e i ai se eseesega i le va o le pule o le perisitua ma le mana o le perisitua. E faaeeina atu le pule o le perisitua e ala i le faauuga, ae o le mana o le perisitua e avanoa mo tagata uma. Talu ai o le mana o le perisitua o se mea e tatou te mananao uma ia i ai i o tatou aiga ma auaiga, o a mea e manaomia ona *tatou* faia ia valaaulia ai lena mana i o tatou olaga? O le matafaioi o le i ai o le mana o le perisitua o le amiontu faaletagata lava ia.

Malamalama i le Aoaoga Faavae o le Perisitua

Muamua, saili ia agavaa mo le mea-alofa o le Agaga Paia. Aua e sili atu ona malamalama le mataupu faavae o le perisitua e ala i faaaliga, e taua le mauaina o le fesoasoani a le Agaga Paia e faaali mai ai ma to ifo i o tatou agaga le mataupu faavae.

Lona lua, auai i le malumalu paia. Ua tatou iloa o malumalu “ua silisili ona paia i fale uma ua saunia mo

tapuaiga”¹⁰ ma saunia le nofoaga lelei e aoao ai e uiga i le perisitua e ala i le agaga o faaaliga.

Lona tolu, faitau i tusitusiga paia. O



le saili, mafaufau loloto, ma le suesue-inia o tusitusiga paia o valaaulia ia mo le Agaga Paia e faaali mai ia i tatou upumoni taua e uiga i le perisitua. Ou te fautuaina atu mea nei ia te outou mo lo outou manatunatuga faaeteete ma le agaga tatalo: Mataupu Faavae ma Feagaiga 13, 20, 84, 107, ma le 121, ma Alema 13. Ona ou valaaulia lea o outou e tauolotoina le tautoga ma le feagaiga o le perisitua, lea e mafai ona maua i le Mataupu Faavae ma Feagaiga 84:33–44. O le faia o lena mea, ou te folafola atu ai o le a faa-lauatele e le Agaga Paia lou malama-lamaaga o le perisitua ma musuia ma siitia oe i se auala matagofie.

Ou te valaaulia foi outou e mafau-fau loloto i le Mataupu Faavae ma

Feagaiga 121:34–46 ma fesili ifo ia te outou lava e pei o le:

- O pupu ea lo'u loto i mea o lenei lalolagi?



- Pe ou te manao ea e maua viiga o alii po o tamaitai?
- Pe ou te taumafai e ufiufi au agasala?
- Pe ou te faamauluga ea?
- Pe ou te faatinoina le puleaina po o le puleaga po o le faamalosi i luga o la'u fanau, lo'u toalua, ma isi?
- O ou taumafai ma le faamaoni e faataitai mataupu faavae e pei o le faatauanau, agamalu, faapalepale, agalelei, mataalofa, alofa e le hualuagia (o lona uiga o le alofa faamaoni, pe mai i le loto)?
- E teuteuina ea e ou manatu le mama e le aunoa?
- Pe ou te manao i le Agaga Paia e avea ma au soa tumau?

O upu *faatauanau, agamalu, faapalepale, agalelei, mataalofa*, ma le *alofa e le hualuagia* na avea o se uiga fou sili ona patino ia te au ao ou manatau se faamanuiaga sa ou talosagaina mai i lou tama i tausaga ua mavae.

Ina ua avea au ma se talavou matutua nofofua, sa ou tauivi ma se faaiuga faigata. E pei ona ou faia i ni nai taimi, sa ou alu atu i lou tama ma talosagaina se faamanuiaga faaletama. Ma le faamoemoeina o ia e vave lava ona faatinlo la'u talosaga, sa ou te'i ina ua ia tali mai, "O le a ou manaomia sina taimi e saunia ai e tuuina atu ia te oe lenei faamanuiaga. E te MALIE e faatalitali mo ni nai aso?"

O le mea e malie ai, i le 40 tausaga mulimuli ane, sa galo mea na ia saunoa ai i lena faamanuiaga faaletama, ae o le a le galo lava ia te au le migao loloto sa i ai i lou tama mo le perisitua paia ao ia saunia o ia lava faaleagaga e tuuina mai se faamanuiaga faaletama. Sa ia malamalama i mataupu faavae ua aoaoina i le Mataupu Faavae ma Feagaiga 121 ma sa naunau e ola ai ina ia mafai ona agavaa mo le mana o le perisitua e faamanua ai lona aiga.

O Saunoaga a Perofeta Soifua

O se faamanuiaga mo au le galulu faatasi ai ma perofeta, tagatavaai, talifaaaliga musuia e toetoe lava i aso taitasi. Afai tatou te mananao moni lava ia iloa aoaoga faavae o le perisitua, ua ia i tatou se punaoa ola na tuuina mai e le Atua ma faatuatuaina: o perofeta, tagatavaai, ma talifaaaliga. Ou te molimau atu o i latou o ni tagata o le Atua o umia le mana o le perisitua e ala i le amiontonu faaletagata lava ia.

I se konafesi talu ai nei, sa aoao mai ai Elder M. Russell Ballard o le Korama a Aposetolo e Toasefululua e faapea: "I le fuafuaga sili a lo tatou Tama Faalelagi e maua ai le mana o le perisitua, ua i ai i alii le tiutetauave tupito e taitai ai le perisitua, ae e le o i latou o le perisitua. E eseese matafai oae tutusa lava le taua ua i ai i alii ma tamaitai. E pei lava ona le mafai e se tamaitai ona fanauina se tamaititi e aunoa ma se alii, e faapena foi, e le mafai e se alii ona faaaogaina atoa le mana o le perisitua e faavae ai se aiga e faavavau e aunoa ma se tamaitai. I se isi faaupuga, i se vaaiga e faavavau, o le mana foafoa atoa ai ma le mana o le perisitua e faaaogaina uma e se tane ma se ava."¹¹

O loo ou aoaoina faapea o uunaiga mama a tamaitai o se mealofa e faatoatoaina ai le mana o le perisitua. O le talanoa atu ai i tamaitai o le Eklesia, na faamalosiau mai ai, Peresitene Howard W. Hunter (1907–95) faapea, "Matou te augani atu ai ia te outou ina ia auauna atu ma le *uunaiga* mamana mo le lelei i le faamalolosi o o tatou aiga, la tatou ekalesia, ma o tatou nuu."¹² I se konafesi aoao lata mai, na saunoa atu ai, Elder D. Todd Christofferson o le Korama a Aposetolo e Toasefululua i tamaitai, "Po o e nofofua pe faaipoipo, pe ua fanau maia se fanau pe leai, pe ua e matua pe talavou pe feoloolo, o lau taitaiga amiontonu e taua."¹³

E pei ona saunoa Elder Ballard, "E leai se mea i le lalolagi e patino, e tusa lona faafaillelega, pe suia ai olaga nai lo le *uunaiga* a se tamaitai amiontonu."¹⁴

Ua tatou talanoaina ni nai fesili e faatatau i le perisitua paia a le

Atua, ae e mautinoa lava o loo i ai isi [fesili].

Muamua ia Usiusitai, Ona Malamalama ai lea

Ou te faaiu atu i se aafiaiga sa fesoasoani ia te au e tauimaina ni fesili e lei taliina. I nai tausaga ua mavae, sa valaaulia au ma lou toalua i se faapotopotoga o le tele o taitai atamamai o le Ekalesia. Sa valaaufina talu ai nei se taitai pulefaamalumalu fou, ma i le faaiuga o le fonotaga sa tuuina mai ai se fesili faigata ma faafefinauai. I le iloaina o le faigata o le fesili, sa vave ona ma ofoina atu ma lou toalua se tatalo faamaoni i le Tama Faalelagi mo lenei taitai fou. Ao ia oo mai i le pulelaa e tali atu le fesili, sa ou molimauina se suiga i ona foliga ao ia tu ma le mataina, faalaugatasia ona tauau, ma saunoa atu ma le mana o le Alii.

O lana tali o se mea e faapenei: “Uso, ou te le iloa le tali i lau fesili. Ae o le a ou tau atu ia te oe le mea ou te iloa. Ou te iloa o le Atua o lo tatou Tama Faavavau. Ou te iloa o Iesu Keriso o le Faaola ma le Togiola o le lalolagi. Ou te iloa na vaai Iosefa Samita i le Atua le Tama ma Lona Alo Pele, o Iesu Keriso, ma sa avea ma tufuga aao lea na toefuatai mai ai le mana o le perisitua i le fogaeleele. Ou te iloa e moni le Tusi a Mamona ma o loo i ai le atoaga o le talalelei a Iesu Keriso. Ou te iloa ua i ai sa tatou perofeta soifua i le aso o le o loo saunoa mo le Alii ia faamanuia o tatou olaga. Leai, ou te le iloa le tali i lau fesili, ae o mea nei ou te iloaina. O mea o loo totoe ou te faamoeome i le faatuatua. Ou te taumafai e ola ai i lenei faamatalaga faigofie o le faatuatua sa ou aaoaina i tausaga ua

O le perisitua a le Atua o se talitonuga paia ua tuuina mai e faamanuia ai alii, tamaitai, ma fanau ina ia mafai ona tatou toe foi atu o ni aiga ma nonofo faatasi e faavavau i le afioaga a le Atua.

FAAMATALAGA

1. Dallin H. Oaks, “The Power of the Priesthood in the Family” (fonotaga o aoaoga faaleautaitai i le lalolagi atoa); www.lds.org.
2. David A. Bednar, “O Mana o le Lagi,”



mavae mai ia Marjorie Hinckley, faletua o Peresitene Gordon B. Hinckley, o le na saunoa mai, ‘Muamua ou te usiusitai, ona ou malamalama ai lea.’”

O le perisitua a le Atua o se talitonuga paia ua tuuina mai e faamanuia ai alii, tamaitai, ma fanau ina ia mafai ona tatou toe foi atu o ni aiga ma nonofo faatasi e faavavau i le afioaga a le Atua. O le ola amiontonu o le agavaa lea mo i tatou taitoatasi e valaaulia ai le mana o le perisitua i o tatou olaga. Faamoemoe o le a to ifo i o outou agaga lenei aoaoga faavae ma atili ai ona tatou latalata atu ia Ia o le Ona le Ekalesia ma le mana ma le pule o le perisitua lenei. ■

Mai se lauga na tuuina atu mo le Konafesi a Tamaitai i le Junesite o Polika Iaga i le aso 2 Me, 2013.

Liahona, Me 2012, 48; faaopoopo le faamamafa.

3. Robert D. Hales, “O Faamanuiga o le Perisitua,” *Liahona*, Ian. 1996, 39.
4. Dallin H. Oaks, “O Le Aualofa ma le Ekalesia,” *Liahona*, Iulai 1992, 41; faaopoopo le faamamafa.
5. “O Le Aiga: O Se Folafolaga i le Lalolagi,” *Liahona*, Nov. 2010, 129.
6. Russell M. Nelson, “Faafaleleina o Faaipo-ipoga,” *Liahona*, Me 2006, 36.
7. *Tusitalima 2: Taitaiina o le Ekalesia* (2010), 2.1.2.
8. “Priesthood Keys,” *New Era*, Me 2012, 38.
9. *Tusitalima 2*, 2.1.1.
10. Taiala i Tusitusiga Paia, “Malumalu, Maota o le Alii”; scriptures.lds.org.
11. M. Russell Ballard, “O La’u Galuega ma Lo’u Mamalu Lenei,” *Liahona*, Me 2013, 19.
12. *O Afafine i Lo’u Malo: O Le Talafasolopito ma le Galuega a le Aualofa* (2011), 168; faaopoopo le faamamafa.
13. D. Todd Christofferson, “O Le Malosiaga Amiontonu o Tamaitai,” *Liahona* Nov. 2013, 30.
14. *O Afafine i Lo’u Malo*, 167; faaopoopo le faamamafa.



O AU PAIA O ASO E GATA AI
Italia
 O SE TALATUU
 O LE FAATUATUA

Saunia e Lia McClanahan

O le talafaasolopito o le Ekalesia i Italia ua amatalia i vaitaimi o le Feagaiga Fou, ina ua avea le taulaga o le Malo a Roma ma aiga i se vaega o ni Kerisiano faamaoni. E le i faamaumauina e le Tusi Paia pe o ai le muai tagata na auina atu le talalelei i Roma, ae sa i ai iina mo le “tele o tausaga” se lala o le Ekalesia (Roma 15:23) ina ua auina atu e le Apostolo o Paulo se tusi i Roma e tusa ma le T.A. 57.

Sa faamatalaina e Paulo le au Kerisiano i Roma o se “tutumu i le agalelei” (15:14). Sa ia masani ma nisi o i latou, ma sa i ai i lana tusi se lisi umi o Au Paia pele o e na ia auina atu i ai le faamalo (tagai 16:1–15).

Sa faaviivii e Paulo le faatuatua o na Kerisiano ma tau atu ia i latou o loo ia tatalo ma faatauanau mo i latou. Sa ia momoo e vaai ia i latou ma faamoemoe o le a faata-gaina o ia e le Atua e asiiasi atu ia i latou i se taimi vave (tagai 1:8–15).

Ina ua oo i le taimi e malaga ai i Roma, ao avea ai ma se pagota, ae o le faanau-nauga o tagata o le Ekalesia i lona taunu ai, lea na faimalaga mai ai nisi mo le 43 maila (69 km) e faafeiloai o ia i le Apio Foro. I le vaai atu ia i latou, “sa ia faafetai atu i le Atua, ma loto tele ai” (Galuega 28:15).

Mulimuli ane, sa puapuagatia ai Paulo i le maliu fasia i Roma, lea sa matua sauaina ai tagata Kerisiano e Nero ma isi taitai. Na iu lava ina pau atu le Ekalesia i le liliuese, ae sa tuua e Au Paia i Roma i aso anamua se talatuu o le faatuatua i le nofoaga autu o le malo, faatulagaina ai se tulaga mo le faaKerisiano ina ia salalau atu i le lalolagi atoa.



Ua fesoasoani le Autalavou a le Siteki o Roma Italia i Sasae e faamama ma vali se fale mo e e leai ni malutaga.

*63 T.L.M.: Sa manumalo le taitai militeli o Roma o Pompeius i Jerusalema, lea sa avea ma se vaega o le Malo o Roma

T.A. 45: Sa amata e le Apostolo o Paulo, o se tagatantu o Roma, se malaga muamua faafaifeatalai i le Malo o Roma

64: Sa tuuaia le au Kerisiano mo le afi tele o Roma ma amata ai ona sauaina e le malo o Roma



313: Ua avea Constantine ma uluai taitai Kerisiano o Roma ma faatagaina tapuaiga faaKerisiano

380: Ua faia e le taitai o Theodosius Muamua le faaKerisiano o le mataupu faalelotu aloaia o le Malo o Roma ma saunia ai le auala mo Kerisiano e salalau atu i le lalolagi atoa

O Se Nuu ua Natia e le Alii

I le 1849, sa valaauna Elder Lorenzo Snow (1814–1901) o le Korama a Apostolo e Toasefululua e faatu se misiona i Italia. Ao ia mafaufau i le nofoaga e amata ai, sa ia aoao e uiga i le au Waldensians, o se nuu lolotu i mauga o Piedmont o Italia matu i sisifo.

Sa onosaia e le au Waldensians sauaga ogaga i le silia ma le fitu seneturi ona o o latou talitonuga. Ao le i oo mai le Porotesano Toefaatlagaina e tusa ma nai selau tausaga, sa latou talaiina atu faapea sa pau atu le Eklesia anamua a Keriso i le liliuese. Sa latou vavaeeseina i latou lava mai le Eklesia Katoliko Roma ma sa taua o ni tagata e ese o latou talitonuga, tuliese mai nuu, sauaina ma fasiotia. Nai lo le teenaina o lo latou talitonuga, sa latou sosola atu i mauga maualuluga.¹

“Sa foliga ua oo mai i lou mafaufau se aofaiga tele o le malamalama ina ua ou mafaufau i le [au Waldensians],” o le faamaumauga lea a Elder Snow. I se tusi atu i le aiga, sa ia tusia ai, “Ou te talitonu sa natia e le Alii tagata iina i le lotolotoi o mauga o Alpine.”²

I isi itulagi o Italia, sa le fafia tele le tulafono i gaoioiga faafaifeatalai. Peitai, i le lua tausaga ao le i taunu Elder Snow, sa tuuina atu le saolotoga faalelotu i le au Waldensians i le itulagi o Piedmont i le maea ai o sauaga mo le tele o seneturi.³ E le na o lena, ae o nisi o i latou sa mauaina miti ma faaaliga tulagaese e saunia ai i latou mo le mauaina o le savali a faifeatalai.⁴

Sa faapaiaina e Elder Snow, faatasi ai ma soa faifeatalai e toalua, ia Italia mo le talaiina o le talalelei i le aso 19 Setema, 1850. Sa faamaumauna e Elder Snow faapea, “Mai lena aso sa amata ona tutupu avanoa mo le folafolaina o la matou savali.”⁵

I le isi fa tausaga, sa feagai taumafaiga a faifeatalai ma manua faapea ma le tetee. Sa latou lolomiina tamai tusi e lua a faifeatalai ma se faaliliuga faaItalia o le Tusi a Mamona. Sa latou papatisoina se fuainumera o tagata liliu mai. Ae e oo atu i le 1854, sa faaititia le galuegana valaauna faifeatalai i isi eria, o tagata liliu mai na sili ona faamaoni na malaga atu i Iuta, ma sa faatupulaia ia sauaga. I le 1862, o talaiga uma sa faia sa le toe

*O muai aso uma e tau talafeagai.

faaauauina, ma sa tapunia le misiona i le 1867.

Sa malosi le Misiona a Italia mo le 12 tausaga, ae i le aluga o lena taimi, e 12 aiga ma tagata taitoatasi e toafitū sa liliu mai ma faimalaga atu i Iuta. O le au Waldensians o e na opogiina le talalelei sa faatumulia ai le Ekalesia i Iuta ma le malosi, ma o le aso e faitau afe tagata o le ekalesia ua toe saili i tua o latou gafa i au Waldensians faamaoni e toe 72 o e na tuua aiga o o latou augatama ae faatasi atu ma Au Paia o Aso e Gata Ai i luga o Mauga Papa.⁶

Faanatinatiina o le Galuega

I le maea ai o le tapunia o le Misiona a Italia, sa leai se galuega faafaifeatalai aloaia sa faia i Italia mo le toeitiiti

1173: Ua amata e Waldo i Lyons, Farani, se taumafaiga ia toe faafio i le talalelei muamua sa aoaoina e Keriso ma Ona Aposetolo



1215: O Waldo
ma tagata na e na
mulimuli ia te ia, o le
au Waldensians—o
nisi o loo aumau i
Italia—ua taua o
tagata liliuese ma sa
sauaina

1843: Sa papati-
soina Giuseppe
(Joseph) Toronto
i Massachusetts,
ISA—o le uluai
Italia na auai i le
Ekalesia

Korama a Aposetolo e Toasefululua sa ofoina le tatalo o le toe faapaiaina o Italia mo le talaiina o le talalelei.

I le sefulu tausaga mai le taimi na tatalaina ai le misiona, sa faateleina le fuainumera o tagata o le ekalesia i Italia mai pe tusa ma le 300 i le 5,000. E oo atu i le 1982 ua faaluaina lena fuainumera. O tausaga talu ai nei, na matautia le tuputupu ae. Mai le 2005 i le 2010, e fa siteki fou sa fatuina, ua oo atu ai le aofaiga o numera o siteki i le fitu. I le taimi nei ua toeitiiti 25,000 tagata o le Au Paia o Aso e Gata Ai i Italia.

Faatulagaina o le Ekalesia

O Elder Craig A. Cardon o le Fitugafulu o se tasi o le faitau afe o Au Paia o Aso e Gata Ai o e na sailia o latou

1848: Ua tuuina
atu e le Tupu o
Carlo Alberto
o Piedmont-
Sardinia le saolo-
toga faalelotu i le
au Waldensians



1850: Ua amata
e Elder Lorenzo
Snow, faatasi ai
ma Elders Joseph
Toronto ma
B. H. Stenhouse
ia taumafaiga
faafaifeatalai i
Italia

selau tausaga. Ina ua toe amata ona susulu le malamalama o le talalelei i Italia, ua i le lotolotoi o le Taua lona Lua, ina ua nofoia aai i Italia atoa e le aufaigaluega faamiliteli o le Au Paia o Aso e Gata Ai. Sa faatulagaina e nei tagata o le au paia ni vaega e feiloai i sauniga o Aso Sa, ma sa faaaua pe a vaega ina ua maea le taua ao atofaina tagata o le ekalesia i nofoaga autu o le militeli i Italia.

O le isi 20 tausaga, sa faanatinati ai e le Alii Lana galuega. Sa amata ona auai i le Ekalesia ia tagatanuu o Italia ina ua maea ona feiloai atu i faifeatalai i atunu lata ane. Sa faatulagaina ni vaega o tagata faamiliteli i Naples ma Verona i lala i lalo o le taitaiga a le Misiona a Swiss. Sa toe faaliliuina e le misiona le Tusi a Mamona i le faaItalia ma lolomiina. Sa latalata le taimi mo faifeatalai e auina atu i Italia.

I le 1964, sa faatulagaina Italia o se itu i le Misiona a Swiss, ma e lei umi ae auina atu faifeatalai o e tautatala faaItalia i le tele o aai. I le 1966, sa faatulagaina le Misiona a Italia, o le 99 tausaga mulimuli ane, na tapunia ai le uluai Misiona a Italia. O Elder Ezra Taft Benson (1899–1994) o le

Ua feiloai atu Elder Ezra Taft Benson (ogatotonu)
i faifeatalai o le Misiona a Italia fou faatoa faatuina.





▲ Feiloai i nisi o le

Au Paia i Italia: O tala musuia o Au Paia o Aso e Gata Ai e toatolu o nei ona po i Italia o loo maua i le lomiga o lenei tusiga i luga o le initoneti i le liahona.lds.org.




tuaa i tua ia Phillip Cardon, o se tagata liliu mai Waldensian o e na faimagalaga atu i Juta i le 1854. Ua molimauina e Elder Cardon le tatalaina o le galuega a le Alii i le laueelele a ona tuaa, muamua o se faifeautalai i le Misiona faatoa tatala a Italia Roma i le 1960 sosoo ai ma avea ma peresitene o le Misiona a Italia Roma i le 1980.

Ina ua valaauna Elder Cardon e avea ma se peresitene o le misiona i le 1983, o falelotu uma i Roma sei vagana ai le [falelotu] e tasi sa avea ma ni fale mautotogi. I na aso, o fale fou a le Ekalesia sa totogiina se vaega e ala i

1854: Ua faaititia le galuega faafaiseautalai ao faatetelina sauaga ma sui ai e faifeautalai lo latou taulaiga i Suitiselani; Ua amata ona faimalaga atu le au Waldensians lea na liliu mai i le Aai o Sate Leki, Juta

1862: Ua tao-faia ia talaiga faafaiseautalai i Italia

1944: Ua faatulagaina vaega o tagata o le ekalesia faamiliteli a le AAG i Italia



1964: Ua lolomina e le Ekalesia se faaliliuga fou faatalita o le Tusi a Mamona; ua faatulagaina e le Misiona a Suisi se itu i Italia

1966: Ua faatulagaina le Misiona a Italia; ua toe faapaiaina e Elder Ezra Taft Benson ia Italia mo le talaiina o le talalelei

foai mai tagata o le ekalesia i le eria. Talu ai sa manaomia tupe e fau ai ni fale, sa foliga faigata le aofaiga o tupe na manaomia mo tagata o le ekalesia ina ia mafai ona foai atu ni mea se tele. Ina ua uma ona iloiolina ma le agaga tatalo, sa valaaulia tagata o le ekalesia i Italia e ave le tupe semanu e latou te faaaluina i le Kerisimasi o lena tausaga ma foai atu i le tupe o le fale. Nai lo meaalofa, o le a tuu e aiga se piliki i lalo o le latou laau Kerisimasi e fai ma sui o a latou osigataulaga.

“O le mea sa tupu i lena taimi sa o se vasega,” o le tala lea a Elder Cardon. “Sa sili atu le saofaga i le mea na manaomia. Ona o lenei mea ma le faaaauai ai o le faatuatua o le sefuluai a le Au Paia, sa sasaa atu e le Alii se faamanuiaga oa faaleagaga i luga o le misiona ma luga o Au Paia i le eria atoa ao latou tali atu ma le naunautai e faia mea uma latou te mafaia e atiina ae ai le Ekalesia. Ou te

talitonu o le latou tautinoga o se vaega taua o le mea sa faatagaina ai le faaaauai pea o le Ekalesia i le tulaga mo se siteki ina ia faatulaga ma le fausiaina o se malumalu i Roma i le taimi nei.”⁷

Ao le i valaauna o se Pulega Aoao, sa toe foi atu Elder Cardon i Italia i le 2005 ina ia auai i le faatulagaina o le Siteki a Roma Italia. O se aafiaga matagofie. “O le malosi lenei o le perisitua,” o lana tala lea, “o ki o le perisitua, o le faauigaga faatusitusiga paia o se nofoaga o le sulufaiga—o se siteki—ua faavaeina nei i Roma.”



O le falelotu a le Uarota a Catania i luga o le talafatai o Sicily. Sa faatuina le Paranesi a Catania i le 1967, i le tausaga ina ua maea ona faatulagaina le Misiona a Italia.

O Se Malumalu i Roma

I le konafesi aoao ia Oketopa 2008, ina ua fofogaina e Peresitene Thomas S. Monson o le a fausia se malumalu i Roma, na sosolo atoa i le Maota Autu mo Konafesi se maofa ma musumusu o le fiafia mai le faapotopotoga. I faapotopotoga o Au Paia i Italia o e na matamata e ala i le satelite sa alalaga ma le olioli. E manatua e se tasi o tua-fafine, “Sa matou o i o matou aiga ua peiseai ua fai ni o matou apaa, faatasi ai ma le olioli i o matou loto.”

Aisea e matua taua ai le manatu o se malumalu i Roma? E ese mai i lenofouta i le matua taua faaleagaga o le malumalu, ua i ai i tagata o le ekalesia se lagona o le taua o le talafaasolopito o le aai, na saunoa ai Elder Cardon: “O lona puleaina



1972: Ua asia e Peresitene Harold B. Lee tagata o le ekalesia i Italia, o le muai Peresitene o le Ekalesia ua asiasi i aso e gata ai

1981: Sa faatu-lagaina le Siteki o Milan Italia, o le uluui siteki i Italia

1993: Ua tuuina atu i le Ekalesia le aloaiaina faaletulafono e umia aloaia ai meatotino ma faatinoina faaipo-ipoga aloaia



2008: Ua fofogaina e Peresitene Thomas S. Monson le Malumalu o Roma Italia:


2012: Ua tuuina atu i le Ekalesia le tulaga aupito maualuga faaletulafono i lotu i Italia

ma le mana i lona vaitau iloga; o ona tagata suesue, o tusiata, saienitisi, ma tagata fau mea o e na saofaga i le tele o mea i le lalolagi; ma le faamanuiga lea ua avea ai le mana faalelotu o Roma i le fesoasoani lea e faalauiloa atu le faakerisiano i le lalolagi atoa, ua avea ma vaega uma o le talafaasolopito o Roma, ua faamatagofieina nei i se malumalu o le Alii.” I le sau-niga o le suatiaina o le lauelele i le 2010, na saunoa ai Peresitene Monson, “E tusa ai ma le fausiaina o le malumalu i luga o lenei nofoaga, e matua taua tele i le Au Paia o Aso e Gata Ai.”⁸

Mo le silia ma le 40 tausaga, sa faimalaga tagata o le ekalesia i Italia i le Malumalu o Bern Suitelani, o nisi e malaga mo le lua aso e oo ai iina. E talitonu Massimo De Feo, lea sa avea ma peresitene o le siteki a Roma ma i le taimi nei o se Fitugafulu Eria, o le Malumalu o Roma o se faailoga ua vaaia e le Alii le tele o tausaga o le auaunaga ma le ositaulaga mai le Au Paia o Aso e Gata Ai ma silafia lo latou manao tele mo se malumalu.

Ina ua faia le faasilasilaga e uiga i le malumalu, sa saunoa Elder De Feo, o le fiafia sa lagonaina sa pei o se fale tapuai pe a malo se au i le sekone mulimuli; o le olioli na tutusa ma le mea sa ia vaai faalemafaufau i ai atonu o o tatou lagona

TAGATA O LE AU PAIA I ITALIA



*Ia Tesema 2013

O LE EKALESIA I ITALIA I LENEI VAITAIMI*

Tagata o le Ekalesia: 25,453
Misiona: 2
Siteki: 7
Uarota: 46
Paranesi: 52
Itu: 5
Malumalu: 1 (o loo fausiaina)
Nofoaga autu o talafaasolopito o aiga: 49

ia i le muai olaga ina ua fofogaina le ata o le faaolataga. Sa fusifusi, ataata, ma fetagisi le Au Paia. O se fiafia moni.

“E ofoofofogia le auauna atu i le Alii i aso nei,” o le tala lea a Elder De Feo, “matua faapitoa lava mo Italia, ma Roma.” Ua ia molimau mai, “Ou te iloa ua matua faamanuia e le Alii lenei vaega o Lona malo.”⁹ ■

E alala le tusitala i Iuta, ISA.

FAAMATALAGA

1. Tagai Ronald A. Malan, “Waldensian History: A Brief Sketch,” *Suesueina o Aiga* o le au Waldensian, www.waldensian.info/History.htm.
2. Lorenzo Snow, *The Italian Mission* (1851), 10–11.
3. Lorenzo Snow, *The Italian Mission* (1851), 10–11.
4. Diane Stokoe, “The Mormon Waldensians” (faamatalaga a le tai-tai, Iunivesi o Polika Iaga, 1985), 26–27. Mo se faataitaiga o lena miti, tagai Elizabeth Maki, “Suddenly the Thought Came to Me: Child’s Vision Prepares Her Family for the Gospel,” *Iuni 3, 2013, history.lds.org/article/marie-cardon-italy-conversion*.
5. Lorenzo Snow, *The Italian Mission* (1851), 1011.
6. Stokoe, “The Mormon Waldensians,” 1–5, 71–84.
7. Craig A. Cardon, mai se faatalanoaga ma le tagata na tuisaina ia Iuni 2013.
8. Thomas S. Monson, i Jason Swenson, “Rome Italy Temple Ground-breaking,” *Church News*, Oke. 23, 2010, ldschurchnews.com.
9. “Interview with President Massimo De Feo—Italy—Episode 1,” *Into All the World* (polokalama tuuafaatasi a le leitio), mormonchannel.org.



Saunia e Elder
Jeffrey R. Holland
O Le Korama a Apostolo
e Toasefululu

O LE VALAAU IA Faapei o Keriso

Tle talafaasolopito o Israelu mai i ona taimi ua tuanai, ina ua agasala tele pe na faalelalolagi tele ai le nuu po o le ola ai faatasi ma Nuuese na amata ai ona faaleagaina tulaga faatonuina o le ola mama ma poloaiga na tuuina mai e le Atua, o le a auina atu le fanau o le feagaiga e sosola i le vao e toe amata mai le amataga ma toefaatuina Siona.

I taimi o le Feagaiga Tuai, o Aperaamo, le tama o feagaiga, sa tatau ona solaese ina ia faasaoina mai Kaletia—o Papelonia moni—i lana sailiga mo se olaga faapaiaina i Kanana, lea ua tatou taua nei o le Laueele Paia (tagai Aperaamo 2:3–4). Ae sa le tele ni tupulaga ao lei leiloa e tupuaga o Aperaamo lo latou Siona ma sa faapolagaina i se nuu mamao, o Aikupito (tagai Esoto 1:7–14). O lea ua tatau ai ona tausia Mose ina ia toe taitaia le fanau o le folafolaga i le vao.

E le tele ni seneturi mulimuli ane, lea sa i ai se tala e faapitoa lona manaia ia i tatou na faailoa mai, ina ua poloaiina se tasi o na aiga Israelu, e taitaia e se perofeta e igoa ia Liae, e sosola ese mai Ierusalema aua, paga lea ua toe i ai i faiototoa ia Papelonia! (Tagai i le 1 Nifae 2:2.) Ma le leiloa e (Liae ma lona aiga), o le a latou o atu i se konitineta fou e amata ai se mamanu fou o Siona (tagai 1 Nifae 18:22–24). Ma sa latou le iloa foi o lena o ese sa tupu i se vaega a o latou augatama ua taua o sa Iareto (tagai Eteru 6:5–13).

O se fiafiaga ia i latou uma o e faamanatuina le Toefuataiina o le talalelei e faapea o le nofoaina o Amerika sa amataina e se vaega sa sosola ese mai lo latou atunu muamua ina ia o latou tapuai i lo latou lava loto. Sa faamatalaina e se tagata maoae o le nuu o Puritan i Amerika lenei aafiaga o le “misiona i le vao” a le faaKerisiano—o le taumafaiga a Israelu o nei ona po e faasaoloto i latou lava mai le Lalolagi Tuai o le leai o se atua ma toe saili auala o le lagi i se laueele fou.¹

*Ua valaau mai le Atua ia Isra-
elu i nei aso e gata ai ia sili atu
ona faapei o Keriso, ma ia sili
atu ona paia nai lo le taimi nei
i lo tatou naunautaiga e ola ai
i le talalelei ma faatuina Siona.*



Ou te faamanatu atu ia te oe se tasi o sosolaga ese mulimuli. O lo tatou lava Ekalesia, na taitaia e o tatou lava perofeta, ma taitaiina o tatou lava tuua faalelotu. O le sauaina o Iosefa Samita i setete o Niu Ioka, Penisilevania, Ohaio, ma Misuri, ma iu ai ina fasiotia i Ilinoi, na tatou vaiai ai le toe faatulagaina o le fanauga a Isaraelu ma toe sailia se nofoaga o le filemu. O Peresitene Polika Iaga (1801–77), o Mose lea i Amerika, e pei ona valaauna ai o ia ma le faaaloalo, sa taitaia le Au Paia i vanu o mauga ao pepese na Au Paia ua vaivai mai le savaliga:

*E i ai se nuu ua saunia e le Atua,
Mo tatou i Sisifo,
E le i ai ni e faasaua mai;
Manuia ai tatou.²*

Siona. O le nuu o le folafolaga. O Le Ierusalema Fou. Mo le silia ma le 4,000 tausaga o talafaasolopito o osiga feagaiga, sa avea lenei mea ma mamanu: Sosola ese ma saili. Tamoe ma aumau ai. Sosola ese mai Papelonria. Fausia pa puipui o Siona.

Seia oo i lenei mea, o tatou aso.

Fausia Siona i le Mea o Loo E I Ai

O se tasi o le tele o mea tulaga ese o lo tatou tisipenisione o le suia o le natura o le ala o tatou faatulagaina ai le malo o le Atua i le fogaeleele. O lenei tisipenisione o se taimi o suiga tele o le faatelevaveina. Ma o le mea e tasi lea na suia o le le toe sola ese o le Ekalesia a le Atua. O le a le toe tuua lava Uro ina ia o ese mai Karana ina ia o ese mai Kanana ina ia o ese mai Ierusalema ina ia o ese mai Egelani, ina o ese mai Katedani, ina ia o ese mai Navu, ina ia o i se mea o ai na te silafaina.

Leai, e pei ona saunoa Polika Iaga mo i tatou uma, “Ua togieseina i tatou mai le falai i totonus o le afi, mai le afi i le ogatotonu o le fola, ma o iina o le a tatou i ai ma o iinei o le a tatou tumau ai.”³

E moni lava, na avea lena faamatalaga ma se faamatalaga mo tagata o le Ekalesia i le lalolagi atoa. I nei aso amuli, i lo tatou tisipenisione, ua lava lo tatou tuputupu ae (o se ekalesia) e taofia ai le tamomoe. Ua lava lo tatou tuputupu ae e tamau ai o tatou vae ma o tatou aiga ma o tatou faavae i atunuuma, ituaiga, gagana, ma nuu *e faavavau*. Ua i ai siona i soo se mea—i soo se mea o i ai le Ekalesia. Ma

faatasi ai ma lena suiga, tatou te le toe manatu ia Siona o se *nofoaga* o le a tatou aumau ai; tatou te manatu i ai o se *pe faapefea* ona tatou aumau ai.

Ina ia otooto atu lenei tiute fou, ou te talanoa atu i ni mea se tolu na tutupu.

O Mea e Tolu na Tutupu ma Lesona e Tolu

1. O nai tausaga talu ai, sa avea ai sau uo talavou—o se faifeautalai ua foi mai le misiona—ma se tasi o le au pasiketipolo i Iuta. O ia o se alii talavou maoae ma se tagata taalo lelei tele, ae sa lei tele sana taalo e pei ona ia faamoemoe i ai. O ona taleni ma tomai patino sa le o se mea na manaomia e lana au po o ia i lena tulaga o le faaleleia. E tupu lena mea i afeleti. O lea, faatasi ai ma le lagolago uma ma le faamalosiau a ona taitai ma tagata o lana au, sa siitia ese atu lau uo talavou i se isi aoga, lea sa ia faamoemoe atonu e na te saofaga atu ai se mea e sili atu.

Sa lelei mea uma mo ia i le aoga fou, ma sa vave ae avea lau uo ma se tagata faaoso. E te iloa le isi mea na tupu—sa i ai i le faatulagaga a le au lenei alii talavou e toe foi e taalo e faasaga i lana au muamua i le Aai o Sate Leki.

O le tulaga sauaina matautia na lafo mai e tagata mata-mata i lena po i lenei alii talavou—o se tagata faatoa faaipoipo o le e totogi lana sefuluai, auauna atu i le korama a toeaina, tuuina atu auaunaga alofa i talavou a lona nuu, ma o loo faatalitali ma le fiafia mo se pepe fou e oo mai ia te ia ma lona toalua—sa le tatau ona aafia soo se tagata soifua i soo se mea, i soo se taimi, po o le a lava lana taaloga po o le iunivesite po o ana filifiliga patino e uiga i soo se tasi o i latou.

Po o a lava tulaga po o finauga po o se faafitauli, e leai se soo moni o Keriso e mafai ona ia tuua lana tapuaiga i le faitotoa.

O le taitai o lenei au asiasi, o se tasi iloga i le pasiketipolo, sa liliu atu ia te ia i le maea ai o se taaloga mataina ma faapea atu: “O le a le mea o tupu iinei? O oe o se tama o le nuu ua faamanuina. O ou tagata nei. O au uo nei.” Ae o le mea e sili ona leaga ai i na mea uma, sa ia fai ma le le mautonu atoa, “Pe le o le toatele ea o nei tagata o tagata o lau ekalesia?”

2. Sa valaaulia au e lauga i se faigalotu a se siteki o talavou nofofua matutua. Ao ou ulufale atu i le faitotoa pito



i tua o le nofoaga autu o le siteki, sa ulufale e tusa ma le taimi lava e tasi se tamaitai talavou i lona 30 tausaga. E oo lava i le toatele o tagata o loo agai atu i le falelotu, sa le fai-gata ona matauina o ia. Sa ia te ia ni nai pe'a, o ni tautaliga eseese i taliga ma le isu, lauulu e faatutu i luga sa vali i soo se ituaiga o lanu, o se sakete sa pupuu tele, ma se ofutino sa le talafeagai.

Sa oo mai ni fesili i lou mafaufau: Pe o lenei tamaitai ea o se agaga o loo tauivi e le auai i lo tatou faatuatuaga, o le sa taitai mai—pe sili atu, sa aumaia e se tasi—i lenei faigalotu i lalo o le taitaiga a le Alii e fesoasoani ia te ia ia maua le filemu ma le taitaiga o le talalelei e na te manaomia i lona olaga? Po o ia o se tasi o se ua se ese mai nisi o faa-moemoega ma tulaga faatonuina ua fautuaina e le Ekalesia mo ona tagata auai, ae o loo fesootai mai pea ma filifili e auai i lenei gaoioiga o le Ekalesia i lena po?

3. Ao auai atu i le faapaiaina o le Malumalu i le Aai o Kansas Misuri, sa ma nonofo ma Sister Holland i le aiga o Brother Isaac Freestone, o se alii leoleo i lana galugega ma se fataulaga sili i le Siteki o Liperate Misuri. I a matou talatalanoaga sa ia tau mai ia i maua, i le leva o se tasi o afiafi, sa valaauna o ia e suesue se tagi i se vaega patino e le saogalemu o le aai. I le lotolotoi o le musika leotele ma le manogi o maruana i le ea, sa ia maua ai se fafine e toatasi ma nai alii o loo inupia ma tautatala i upu masoa, sa manino le leai o se manatu o i latou uma i tamaiti e toalima—e tusa ma le lua i le valu tausaga le

matutua—o faapupuu faatasi i se potu e tasi, ao taumafai e momoe i luga o se foloa palapala e aunoa ma se moega, leai se momi, leai ni aluga, leai ma se mea e tasi.

Sa autilo Brother Freestone i kapoti o le umukuka ma totonu o le pusa aisa pe mafai ona ia maua ai se apa e tasi po o se katuni po o se pusa o soo se ituaiga o meaai—ae sa ia le mauaina se mea. Sa ia faapea mai, sa tele atu meaai a le taifau o loo i ou tuafale nai lo na fanau.

I totonu o le potumoe a le tina, sa ia maua ai se momi e aunoa ma ni ieafu, ma na o le pau lena [o le momi] i totonu o le fale. Sa ia sueina seia ona maua ni ieafu, e tuu i luga o le momi, ma tuu uma i ai tamaiti e toalima i le moega le tumau. Faatasi ai, ma loimata i ona mata, sa ia tootuli ma ofoina atu se tatalo i le Tama Faalelagi mo lo latou puipuga ma fai atu ia manuia le po.

Ao ia tu i luga ma savali atu i le faitotoa, sa oso mai se tasi o le fanau mai le moega, ma tamoe atu ia te ia, ma tago i lona lima, ma augani atu, “Faamolemole e *mafai* ona e vaetamaina au?” Ma le faateleina o loimata i ona fofoga, sa toe tuu e Brother Freestone le tamaitiiti i le moega, ma maua le tina o loo onā (ua leva ona sosola ia alii), ma faapea atu ia te ia: “Ou te toe foi mai taeao, ma ia i ai se suiga i totonu o le fale lenei i le taimi ou te savali mai ai i totonu o lenei faitotoa. Ma o le a i ai nisi suiga pe a uma lena mea. Ou te folafola atu ia te oe lena mea.”⁴

O a mea ua tutusa ai nei mea e tolu na tutupu? Latou te tuuina mai ni faataitaiga e tolu laiti, o mea eseese o le



olaga moni o Papelonia—o se tasi o se amioga leaga tele faavalevalea i se taaloga pasiketipolo, o se tasi o luitau i le tulaga patino faaleaganuu ma iloatino ma i latou o e o ese le auala o soifua ai nai lo tatou, ma o se tasi o se faafitauli tele tele ma le ogaoga.

Lesona 1: Aua Lava Nei Tuua Lau Tapuaiga i le Faitotoa

Muamua, ia tatou talanoa e uiga i le mea na tupu i le pasiketipolo. O le aso ina ua maea le taaloga, ina ua i ai ni nai faamasinoga faalauaitele ma se valaau mo se faatoesega i le mea na tupu, na faapea mai se alii talavou, i le faaiuga: “Faalogo. O lea tatou te talanoa e uiga i le pasiketipolo iinei, e le o le Aoga Sa. Afai e te le mafai ona gafatia le tauvalaau (a tagata matamata), ona aua lea ona taalo i se taaloga. Matou te totogiina se tupe tele e matamata ai i nei taaloga. E mafai ona matou amioai i auala e matou te mananao ai. Matou te tuua a tatou tapuaiga i le faitotoa.”

“Matou te tuua a tatou tapuaiga i le faitotoa”? Lesona numera muamua mo le faatuina o Siona i le seneturi lona 21: E te *le* tuua lau tapuaiga i le faitotoa.

O lena ituaiga o le avea ai ma soo e le tatau ona i ai—e le o se avea ai ma soo. E pei ona aoao mai le perofeta o Alema, e tatou te “tutu o ni molimau a le Atua i taimi uma ma i mea uma, ma i nofoaga uma atonu [tatou] te i

ai” (Mosaea 18:9)—*e le na o sina taimi, i nai nofoaga, pe ona ua tele ai a le tatou au.*

Po o a lava tulaga po o finauga po o se faafitauli, e leai se soo moni o Keriso e mafai ona ia tuua lana tapuaiga i le faitotoa.

Lesona 2: Ia Agaalofa ae la Faamaoni i Poloaiga

E taitaiina atu au e lena mea i le tamaitai talavou i le faigalotu. Ae o le a tali atu se tasi ia te ia, o le tulafono faavavau e ao ona atagia ia tatou amioga o tatou talitonuga faalelotu ma o tatou tautinoga faaletalalelei. O le mea lea, o le auala tatou te tali atu ai i soo se tulaga e ao ona faaleleia ai se mea, ae le o le atili ona faaletonu ai. E le mafai ona tatou amio pe tali atu i se auala tatou te lagona ai le tausalaina i se solitulafono e sili atu nai lo, i lenei tulaga, ua i ai o ia.

E le faapea ua tatou le maua ni manatu, tatou te le maua ni tulaga faatonuina, pe i se isi itu ua tatou le amanaiaina atoa poloaiga paia o “poloaiga o mea e ao ona tatou faia” ma “poloaiga o mea e le tatau ona tatou faia.” Ae o lona uiga e tatau ona tatou ola ai i na tulaga faatonuina ma pui-puia na poloaiga i se auala amiontonu i lo tatou gafatia sili, le auala na soifua ai ma pui-puia ai e le Faaola i latou. Ma sa Ia faia lava mea e tatau ona faia ia sili atu le tulaga—mai i

le aoaoina o le upumoni i le faamagaloina o tagata agasala i le faamamaina o le malumalu.

O lea i la tatou uo fou, tatou te amata, aemaise lava, e ala i le manatuaina o ia o se afafine o le Atua ma e faavau le taua. Tatou te amata i le manatuaina o ia o se afafine a se tasi. Tatou te amata i le agaga faafetai ua i ai o ia i se gaoioiga a le Eklesia, e le o aloese mai se tasi. O se aotegela, tatou te taumafai i le mea sili i lenei tulaga i se manao e fesoasoani ia te ia avea ma tamaitai silisili.

Tatou te tatalo le leoa pea: O le a le mea sao e faia iinei? O le a le mea sao e tau atu? O a mea o le a *iu ai ina* sili atu ona lelei lenei tulaga ma ia? O le faia o nei fesili ma le taumafai moni e faia le mea e faia e le Faaola ou te manatu o le uiga o Lana fetalaga ina ua Ia fetalai, “Aua le soona faamasino, a ia faamasino i le faamasinoga tonu” (Ioane 7:24).

E le mafai lava e lenei Eklesia ona fetuunaia ana aoaoga faavae ina ia fetaui lelei ma faaleagafesootai pe ia taliaina lelei faaupufai po o se isi lava mafuaaga. E na o le puipuiga o upumoni faaalia ua tuuina mai ia i tatou soo se saogalemu lea e siitia ai le isi o e atonu ua lagona le popole pe tuulafoaiina. O lo tatou agaalofa ma lo tatou alofa—o uiga ma mea e manaomia taua mo lo tatou faaKerisianoina—e le tatou lava *ona faauigaina* o se fetuutuunaiga o poloaiga.

Pe a tatou feagai ai ma na tulaga, e mafai ona matua luitauina ma le mautonu. Atonu e mafai ona fesili tagata talavou, “Ia, tatou te le talitonu e tatau ona tatou ola pe amioai i sea ituaiga auala, ae aisea ua tatou faia ai isi tagata ia faia faapena? E le o i ai so latou filifiliga saoloto? Pe tatou te le o faafiaamiontu ma faamasino atu, ma faamalosia lo tatou talitonuga i isi, ma poloaiina i *latou e faatinoina* i se auala faapitoa?”

I na tulaga e tatau ona e faamatalaina ma le faaeteete pe aisea e puipuia ai nisi o mataupu faavae ao *nisi* o agasala e faatuiese *po o fea lava e maua ai* aua o mataupu ma tulafono e aofia ai e *le na* o le faaleagafesootai pe faaupufai ae e faavavau foi lo latou taunuuga. Ma ao tatou moomoo ina ia le faatiga ia i latou o e ese talitonuga mai ia i tatou, ua sili atu lo tatou naunau ia le faatiga i le Atua.

E tai tutusa lava ma se talavou ua faapea mai, “Lea la ua mafai ona ou aveina se taavale, ou te iloa e tatau ona ou tu i se moli lanumumu, ae e tatau moni lava ona tatou faamasino atu ma taumafai e faatutu uma isi tagata

i moli lanumumu? E tatau ea ona faia e *tagata uma* mea ua tatou faia? Pe le o i ai ea i isi lo latou faitalia? E tatau ea ona latou amioai e pei o i tatou?” E tatau la ona e faamatalaina pe aisea, ioe, tatou te faamoemoe ia tutu tagata *uma* i se moli lanumumu. Ma e tatau ona e faia lenei mea e *aunoa ma le* faitioina o i latou o e solitulafono pe o e ese talitonuga nai lo mea tatou te talitonu i ai ona, ioe, e i ai lo latou filifiliga saoloto.

O loo i ai se eseesege tele o talitonuga i lenei lalolagi, ma o loo i ai foi le faitalia e filifili ai mo tagata uma, ae e leai ma se tasi e agavaa e fai se mea e pei e le o fetalai mai le Atua i nei mataupu, pe foliga mai foi na o le pau le taimi e taua ai

poloaiga pe afai ua malilie i ai tagata lautele. I le sene-turi lona 21, e le mafai ona tatou toe sosola ese. O le a tatau ona tau mo tulafono ma tulaga ma siosiomaga e mafai ona faatagaina le saolotoga e auai ai i gaoioiga faalelotu ma lo tatou faa-maoniga i ai mai le malo. O se tasi na o auala e mafai ai ona tatou faatagaina le i ai i Papelonina, ae le o ia mea.

Ou te le iloa se tomai e sili atu ona taua ma se amiosao maoae mo i tatou e faaali atu ai i se lalolagi lea e le mafai ona tatou sosola ese mai ai nai lo le savavali i lena ala ma le faaeteete—ma tu mama ai e tusa ma mea na tautino mai e le Atua ma tulafono ua Ia tuuina mai, ae i le faia o lena mea i le agaalofa ma le malamalamama ma le alofa mama maoae.

Lesona 3: Faaaoga Tulaga Faatauaina o le Talalelei ina ia Manuia ai Nuu ma Atunu

O le a le toatele i tatou e avea ma ni leoleo po o sui o le tautua faaleagafesootai po o ni faamasino o loo galulu i tulaga faaletulafono, ae o i tatou uma ua tatau ona tausia le manuia o isi ma le saogalemu lelei o le lautele o tatou nuu. I le talanoa ai e uiga i le manaomia mo i tatou e uunaia le sosaiete i fafo atu o o tatou lava aiga, na saunoa mai ai Elder Quentin L. Cook, o le Korama a Aposetolo e Toasefululua:



"E le gata i le puipuia o o tatou lava aiga, ae e tatau foi ona avea i tatou ma puna o le malamalama e puipuia ai o tatou nuu. Na fetalai mai le Faaola, "Ia faapea ona pupula atu lo outou malamalama i luma o tagata, ina ia latou iloa la outou amiolelei, latou te vivii atu ai i lo outou Tama o i le lagi.' . . .

"I lo tatou lalolagi ua matua faateleina le amioletonu, ua tatau ai lava i tulaga faatauaina e faavae i le talitonuga faalelotu ona avea o se vaega o le talanoaga faalauaitele. . . .

"O le faatuatuaga faalelotu o se punavai o le malamalama, iloa, ma le poto ma e manuia ai le lalolagi i se ala maoae."⁵

Afai tatou te le aveina faamanuiaga o le talalelei i o tatou nuu ma atunuu, o le a le lava lava a tatou alii leoleo—o le a le lava lava Isaac Freestones—e faamalosia le amio pulea lelei e tusa lava pe na faamalosia mai. Ma e le o lena. O na fanau o i lena fale e aunoa ma se meaai po o lavalava

o ni atalii ma afafine o le Atua. O lena tina, ua sili atu le tausalaina aua o ia e matua atu ma e tatau ona sili atu ona gafataulima [le fanau], o ia foi o se afafine foi o le Atua. O ia tulaga atonu e manaomia ai le alofa malosi i auala aloaia, e oo lava i le faaletulafono, ae e tatau ona tatou taumafai e fesoasoani pe o afea ma o fea tatou te mafaia ai aua tatou te le tuuina a tatou tapuaiga i le faitotoa, e tusa lava pe ua tatou lagonaina o loo faatinoina e isi i ni auala faanoanoa ma lē faamoemoeina.

E leai, e le mafai ona tatou faia mea uma, ae e mafai ona tatou faia se mea. Ma i le tali atu i le valaau a le Atua, o le fanauga a Isarael o i latou ia e faia—e le o le sosola ese mai Papelonie i lenei taimi ae ia osofaia. E aunoa ma le manatu mama i ai, e mafai ona tatou ola faalauaitele ma le le faalagolago i la tatou talalelei ua tatou maua uma ai ituaiga o avanoa e fesoasoani ai i aiga, faamanuiaina o tuaoi, ma le puipuia o isi, e aofia ai ma le tupulaga faiae.



Faaali Lou Alofa ia Iesu Keriso

Ua valaaulia le Au Paia o Aso e Gata Ai e avea ma fefete i le paluga, o le masima e le aveesea lona magalo, o le malamalama ua tu i luga o le mauga e le tuu i lalo o le mea e fua ai saito. Ia amata loa ona faia se faataitaiga!

Afai tatou te faia ma talanoa i le mea sao ma aapa atu ma le agalelei i a tatou upu ma a tatou galuega, ma, pe a faapuupuu e le Faaola Lana galuega i le amiotonu, ma fetalai mai ua oo mai le iuga i lenei tisipenisione mulimuli, ma oo mai Lona mamalu, o le a Ia mauaina i tatou o faia le mea sili tatou te mafaia, taumafai e ola ai i le talalelei, ma taumafai e faaleleia atili o tatou olaga, lo tatou Ekalesia, ma lo tatou lalolagi i le auala sili tatou te mafaia.

Pe a Ia afio mai, ou te manao *tele* ia maua mai o ola ai i le talalelei. Ou te manao ia maofa i le taimi lava o le faatinoina o le faasalalauina o le faatuatua ma le faia o se mea lelei. Ou te manao ia fetalai mai le Faaola ia te au: "Jeffrey,

*Ua valaaulia le Au Paia o Aso
e Gata Ai e avea ma fefete i le
paluga, o le masima e le aveesea
lona magalo, o le malamalama ua
tu i luga o le mauga e le tuu i lalo
o le mea e fua ai saito.*

ou te iloaina oe e le ona o lou faalagiga ae ona o lou olaga, o le auala o e taumafai e ola ai ma tulaga faatonuina ua e taumafai e puipuia. Ou te vaia le faamaoni o lou loto. Ou te iloa sa e taumafai e faalelei muamua ni mea ma i le tau-lamua ai i le avea atili ai o oe lava ma e ala i le folafolaina o lau upu ma le puipuia o lau talalelei i isi i se auala sili ona agaalofoa e te mafaia."

O le a Ia faaopoopo moni lava: "Ou te iloa sa e le manuia i taimi uma i au lava agasala ma tulaga o isi, ae ou te talitonu sa e taumafai faamaoni. Ou te talitonu i totolu o lou loto, e te alofa faamaoni ia te au."

Ou te manao e i ai se mea e pei o lena feiloiga i se aso aua e sili atu lou manao i ai nai lo seisi mea i lenei olaga faaletino. Ma ou te manao i ai mo oe. Ou te manao i ai mo i tatou uma. "Israelu, Ua Valaau Mai le Atua"⁶—ua valaau mai ia i tatou ia ola patino i le talalelei a Iesu Keriso i auala laiti ma auala e tele, ia aapa atu ia i latou o e atonu e le foliga pe laei pe amioai e pei o i tatou, ma o le taimi lena (po o fea tatou te mafaia) ia sili atu ona o e auauna atu i nuu lautele e mafai ona tatou uunaia.

Ou te alofa i le Alii o Iesu Keriso, o le ona le auauna lea ou te taumafai e avea ai. Ma ou te alofa i lo tatou Tama Faalelagi, o le na agalelei tele e tuuina mai o Ia ia i tatou. E tusa ai ma lena meaalofa, ou te iloa o loo valaau mai le Atua i Israuelu o aso e gata ai ia sili atu ona faapei o Keriso, ma ia sili atu ona paia nai lo le taimi nei i lo tatou naunau-taiga e ola i le talalelei ma faatuina Siona. Ou te iloa foi o le a Ia tuuina mai le malosi ma le paia e avea ai ma soo moni pe afai tatou te talosaga atu i ai. ■

Mai se lauga o le faigalotu a le OAE, "Israuelu, Ua Vala'au Mai le Atua," na tuuina atu i le Junesite o le Setete o Dixie i St. George, Iuta, i le aso 9 o Setemba 9, 2012. Mo le lauga atoa, alu i le lds.org/broadcasts.

FAAMATALAGA

1. Tagai Perry Miller, *Errand into the Wilderness* (1956), 2–3.
2. "O Mai, O Mai, Outou le Au Paia," *Viiga*, nu. 17.
3. Brigham Young, i le James S. Brown, *Life of a Pioneer: Being the Autobiography of James S. Brown* (1900), 121.
4. Isaac Freestone, aafiaga na faasoa atu i le tusitala, Me 5, 2012.
5. Quentin L. Cook, "Ia I Ai le Malamalama!" *Liahona*, Nov. 2010, 28, 29.
6. "Israuelu, Ua Valaau Mai le Atua," *Viiga*, nu. 6.

O LA'U TUSI SA TUU I LE MAA FAAMANATU

le aluga o le tau mafanafana o le 2003, sa ou i ai i Michigan, ISA, e sailia se tuaa e suafa ia Ropati Hall. I le faaiuga o la'u malaga, sa ou toe asia se fanuatanu sa ou i ai muamua i le 20 tausaga talu ai.

Ina ua ou asia le fanuatanu i le taimi muamua, sa ou matauina ni fualau i se tasi o maa faamanatu o loo i ai le faaiu Hall. O le taimi lenei sa ou tusia ai se tusi, tusi ai ma le aso, ma faapalasitika ina ia puipuia ai mai le tau. Ona ou tuua lea o le tusi ma le agaga tatalo i le maa faamanatu, ma le faamoemoe o le a maua e se tasi o le a mafai ona fesoasoani mai ia te au e aoao atili e uiga ia Ropati Hall. Sa ou toe foi i le aiga

i Kalefonia ma le faamoemoe ae le talitonu tele o le a i ai se mea o le a tupu mai lenei tusi.

O le vaiaso mulimuli ane, sa ou maua ai se tusi mai se tausoga mamao e igoa ia Deke Bentley.

"O ananafi sa ou maua ai se aafiaga uiga ese," na ia tusia. "I le 3:00 p.m. Sa ou alu e faatau mai ni sitoloperi ae ou filifili loa e tu i le Fanuatanu o le Auala Valevalenoa e siaki tuugamau a ou tuaa. Ou te le i alu ai iina mo ni nai tausaga. I autafa o tuugamau sa i ai lau kata."

Sa alu Deke i le fanuatanu i le aso lava na ou tuua ai le tusi. Sa ou valaau loa ia te ia i le taimi lena. I le aluga o la ma talanoaga, sa ou iloa ai e nofo

o ia i Hillsdale, e silia ma le 50 maila (80 km) mai le fanuatanu.

I nai masina mulimuli ane, sa ou toe foi ma le naunautai i Michigan e asiiasi ia Deke. Na ia tau mai ia te au sa i ai tagata o lona aiga o loo tanuina i le fanuatanu e feagai tonu lava ma lona fale, ma sa ia fesili mai pe ou te fia alu ai iina. Sa ia tau mai ia te au e i ai i le fanuatanu ni maa faamanatu se fa o le au Halls, e toalua e na te le iloa se mea e uiga i ai.

Sa faasino mai e Deke ia te au ia maa faamanatu. O [maa faamanatu] e lua e na te le iloa se mea e uiga i ai, o Matini ma Anna Hall e ona. Ou te le i aumaia au faamaumauga, ae sa ou manatua manino le sailia o se Matini Hall.

Sa ma faanatinati loa i le falefaamasino a le itumalo i le itula ao lei tapunia, ma le faamoemoe i se faamaumauga o le otu o le a faailoa mai ai matua a Matini. Sa i ai lava! O le tama o Matini o Ropati Hall! Sa faamautinoa mai e le Agaga Paia ia te au o lau sailiiliga umi ua faaiuina.

O Deke, e le o se tagata o le Ekalesia, sa ia faapea mai, o le mauaina o Ropati Hall na foliga mai "e toetoe lava a faaleagaga." Sa ou ataata, ma le iloaina o le Agaga sa taitaiina au.

"Atonu sa e faanoanoa e te lei tuua lau tusi i le 20 tausaga talu ai," o le tala lea a Deke, "o le mea moni sa ou siitia mai i Hillsdale i le tolu tausaga talu ai!"

O lenei aafiaga sa avea o se lesona ia te au faapea e moni lava o le talafaa-solopito o aiga o se vaega o le galuega a le Atua ma e Na te taitaia i tatou i a tatou taumafaiga amiontonu. ■

Marianne Chaplin Stovall, Kalefonia, ISA



MATA E FAAMALOLO E LE ALII LE MA TAMA?

Ina ua fa tausaga o le ma tama, e masani lava ona ia fai mai ia te au e usu le pese "Matai e, Ua Sou le Vasa" (*Viiga*, nu. 58). E susulu ona mata laiti i le aluga o le tali ina ua poloaiina e le Alii le matagi ma galu ia filemu. E na te fesili mai ia te au e uiga i le mana o Iesu. Ou te tali atu e mafai e Iesu ona faia soo se mea i le amiontonu aua ua ia te Ia le mana uma. Sa avea le Faaola ma tagata toa a lo ma atalii.

Ae ina ua 13 tausaga le matua a le ma tama, sa amata ona ia lagona le atuatuvale tele. Sa le toe i ai sona manao e talanoa po o le oo lava i le ai. Sa ia le toe fafia i ana gaoioiga sa i ai muamua, ma aemaise lava sa le i manao e auai i tatalo faaleaiga po o afiafi faaleaiga. Sa foliga mai ua le toe i ai sona fafia i le ekalesia po o le talalelei.

Sa tatalo ma anapopogi lo matou aiga atoa mo ia, na faapena foi le toatele o tuagane ma uso mai la matou uarota ma siteki ma le toatele o a ma uo ma aiga. Sa pei lo matou taumafaiga o aafiaga a Alema le Matua i le tatalo ai mo lona atalii (tagai Mosaea 27:14, 22-23).

Sa ma le mananao e faamalosia i le ma tama le talalelei, o lea sa ma tau atu ai ia te ia e le manaomia ona ia auai i a matou tatalo faaleaiga po o afiafi faaleaiga, ae ma te mananao na te i ai faatasi iina ma i maua. Ao tatou mulimuli i afioga a le Faaola ina "ia tatalo atu e le aunoa i le Tama, i o outou aiga . . . ina ia . . . faamanuiaina a outou fanau" (3 Nifae 18:21), sa sili atu le mamana uma o a matou tatalo faaleaiga ma afiafi faaleaiga. Sa matou lagonaina le Agaga i lo matou aiga. Ma e ui ina sa leai se

pisa a le ma tama, sa i ai o ia iina.

Sa faifaimalie lava i le lua tausaga na sosoo ai, sa matou vaaia o a matou tatalo ma afiafi faaleaiga sa i ai se uunaiga i lo ma atalii. Ao faia se tasi o afiafi faaleaiga, sa ia tuuina mai se molimau i le Faaola ma fesili mai pe mafai ona ia saunia se afiafi faaleaiga. Sa amata ona ia auai i tatalo faaleaiga ma auai ma le fafia i le lotu. Sa ia aafia i se liuga tele o le loto na oo mai ao ia lagonaina le alofa togiola o le Faaola (tagai Alema 5:26). Sa laveaiina moni lava e le Alii, ma Lona mana faamalolo le ma tama.


Sa amata ona ia toe fafia ma fafia i le olaga, ma naunau e fesoasoani atu i

isi ma faaalia le alofa. Sa ia tau mai ia te au na ia iloa sa faamalolo o ia e le Faaola. O tofotofoga a le ma tama na fesoasoani ia te ia e atiae se molimau mamana ma le faateleina o le alofa mo ma faamoemoe i le Faaola. Sa ia auauna atu i le Alii o se faifeautalai i le Misiona a Atenitina Buenos Aires i Saute. I le maea ai o lona toe foi mai, sa ia faaipoipo i le malumalu, ma ua ia te ia ma lona toalua se afafine matagofie.

Ou te iloa ua i ai i le Faaola se mana e faamalolo ai, e galueaiina ai vavega, ma faafiafiaina ai i tatou i lenei olaga ma i le olaga a sau. ■

Ana Cremaschi Zañartu, Santiago, Chile

Ina ua 13 tausaga le matua a le ma tama, sa ia feagai ma le atuatuavale tele ma le toe manao ai e auai i tatalo faaleaiga po o afiafi faaleaiga.



O OE O SE MAMONA?

Sa ou mamao ese mai le aiga ao sauai i se fonotaga faavaomalo mo lau galuega. E faitau selau tagata sa auai, ae sa na o au lava mai i lau setete ma le itulagi.

I se tasi afiafi, sa faia ai se taumafataga o le afiafi mo tagata auai uma. Ao matou ulu atu i le fale mo le taumafataga, sa tofu i matou ma ni pepa ulufale se fa e faaaoga i le pa e oka fua ai ia meainu malolosi. Sa oo mai ia te au le faigofie tele mo se tasi e mamao mai le aiga ona faaosooosoina i lena avanoa, ma le mafaufau o le a leai lava se tasi o le a iloaina. O se manatu puupuu lava, ma sa ou tuuina atu le pepa ulufale i le tagata o i le faitotoa.

I le taimi o le taumafataga, sa matou nonofo faatasi ma ni tagata e le masani i ai e toafitu. Sa inu lau vai ao matou aai, talanoa, talie, ma fesuiai faamatalaga o le a fesoasoani ia i matou i a matou galuega.

O le taeao na sosoo ai i le 'aiga o le taeao, sa ou feiloai atu i se tamalii lea sa nofo i lau laulau. Sa ou fiafia lava i le iloaina i le pine o lona igoa o ia e sau mai i lou nuu—o se nuu ou te le i nofo ai mo le 35 tausaga. Ina ua maea le aoga maualuga, sa ou tuua lou aiga mo le kolisi, faaipoipo, ma siitia ese atu.

Ao ma talanoaina nofoaga ma mea na tutupu o le nuu sa ma iloa uma, sa ia fesili mai ia te au pe o i ai lava sou aiga iina. Sa ou tali atu e leai, ae sa tele au uo lelei iina ma o loo matou fesootai pea. Sa ia fesili mai po o ai i latou, ma sa amata ona ou tau i ai nisi o i latou.

Ina ua mavae ni nai uluai igoa, sa ia taofi au ma faapea mai, "Faatali, o oe o se Mamona? O tagata uma ua e tauina mai igoa o tagata Mamona."

Ina ua ou faailoa atu o au o se tagata o le Au Paia o Aso e Gata Ai, na ia tau mai ia te au o ni tagatanuu lelei

na uo ma le auala o latou auauna atu ai i le alalafaga ma avea ma faataitaiga lelei i tagata uma. Mo ni nai minute, sa ia faasoa mai lona agaga faamemelo mo le Ekalesia ma au uo, ma tau mai ia te au le auala o avea ai i latou o ni faufautua mo le lelei i le alalafaga.

Ao ma faamavae, sa le tea ma lou mafaufau le mea semanu e tupu pe ana ou filifili e faaaoga na pepa ulufale [mo meainu malolosi]. Sa aoaoina au e filifili le mea sao mai na lava tagata na ma talanoa i ai. Semanu ou te le mautonu ma maasiasi e tautino atu o a'u o se tagata o le Ekalesia pe ana faapea ou te faaaogaina pepa ulufale [mo meainu malolosi].

Ou te faafetai ai lava mo faataitaiga a na uo agavaa, malolosi, ma auauna atu—35 tausaga mulimuli ane ma le 2,000 maila (3,220 km) le mamao mai le aiga sa ou ola ae ai. ■

Carol A. Bowes, Carolina i Matu, ISA



A hand in a pink sleeve holds a green safety belt. Another hand in a blue sleeve reaches out to take the other end of the belt. The background is a soft yellow gradient.

Ao matou ulu atu i le fale mo le taumafataga, sa tofu i matou ma pepa ulufale e fa e faaaoga i le pa e oka fua ai ia meainu malolosi.

SA TALI LE PEROFETA I LAU TATALO

Ile faaiuga o lou tausaga lona lua, sa ou talosaga ai i le polokalama o le faia o manamu faakalafi i lau iunive-site. Sa lei taliaina au, ae sa ou agavaa e toe talosaga i le tausaga e sosoo ai. Sa ou le fiafia e faatalitali mo le isi tausaga e faauu ai.

O le mea e sili ona latalata i la'u matata o le pueata. O lea sa ou tatalo ai e uiga i le suia o lau matata ma sa lelei le lagona e uiga i ai. Sa na o lou manao lava ia maua lau faailoga!

I le amataga o le semesa o le tau-toulu, sa i ai au vasega i ata tifaga ma le talafaasolopito faaleagafesootai i le pueina o ata. Sa ou fiafia i [vasega] uma e lua. Ae ao ou tilotilo atu i le polokalama o lau vasega o ata tifaga, sa ou matauina le manaomia e tamaiti aoga o le matamata i le tele o ata mo tagata matutua. I lau vasega o le pueina o ata, sa taua ai e le faiaoga o ata o le a matou suesueina o le faatupu vevesi, atuatuvale, ma feusuaga. Sa ia fai mai o le tele lena o le uiga o le pueina o ata i nei aso.

Sa ou matua faanoanoa tele ao ou fuafuaina le mea e fai. Sa ou iloa e le aoaoina e le talalelei ia ituaiga o mea, ae e manaomia nei vasega. Sa ou mafaufau i le mau e uiga i le i ai i le lalolagi ae le ni o o le lalolagi (tagai Ioane 15:19). E mafai ea ona ou i ai i nei vasega ae le ni o o le vasega?

Sa ou tatalo ia iloa le mea e fai ma ia maua le faatuatua e faia ai le mea sao. Sa ou fefautuaai foi ma lou toalua, matua, ma lou uso. Ao ou talanoa i lou uso, sa ia faamanatu mai ia te au le fuaiupu lenei: "Aua se a le aoga i le tagata pe afai na te maua le lalolagi uma, a e maumau lona ola? se a foi se mea e avatu e

le tagata e togiola a'i lona ola?" Mataio 16:26.

Sa ou iloa e taua le aoga, ae pe sa sese kosi suesueina? E mafai faapefea ona ou alu ese le tumau mai le aoga, ao lea ua matua latalata mai lava le mauaina o le faailoga o le kolisi?

I le leva o le po i se tasi po ao ou ala faatasi ma lo ma pepe na ma'i, sa oo mai se manatu ia te au e sue Peresitene Thomas S. Monson i le Initonet. E lei umi ae ou matamata i se lauga o le konafesi aoao na tuuina mai e Peresitene Monson ia Oketopa 2011. Sa ou faalogo ma le totoa ao ia talanoa e uiga i le faaitiitia o mea mama ua taliaina e le lalolagi, ma sau-noa mai o amioga le talafeagai ma le mama ua oo ina taliaina e le toatele.

Ona ia saunoa mai lea i le mea tonu na manaomia ona ou faalogo i ai: "E tatau ona tatou faaeteete i se

lalolagi ua mamao ese lava mai mea faaleagaga. E taua lo tatou teenaina o soo se mea e le ogatusa ma o tatou tulaga faatonuina, teena i le faagaso-logsina ia lafoaia ai le mea e sili ona tatou manaomia: o le ola e faavavau i le malo o le Atua."¹

O nei upu sa uunaia malosi au faatasi ma le mana tele. Ao tafe ifo loi-mata i ou mata, sa ou iloa sa tali mai e se perofeta soifua lau tatalo.


E ui lava ina ua ou tolopoina au fuafuaga mo le faauuga, ou te iloa o le a faamanuia e le Alii lou aiga ma au ao matou mulimuli i le perofeta, teena le manatu o le lalolagi, usiusi-tai i poloaiga, ma lagolagoina tulaga faatonuina o le talalelei. ■

Derrick Fields, Misuri, ISA

FAAMATALAGA

1. Peresitene Thomas S. Monson, "Tutu i Nofoga Paia," *Liahona*, Nov. 2011, 83.

Ile leva o le po i se
tasi po ao ou ala
faatasi ma lo ma pepe
na ma'i, sa oo mai se
manatu ia te au e sue
Peresitene Thomas S.
Monson i le Initonet.





Saunia e Bishop

Gérald Caussé

Fesoasoani

Muamua i le

Au Epikopo

Pulefaamalumalu

Mulimuli i le Ala o le **FIAFIA**

Ole autalavou, i lona aotelega, o le taimi lelei lava e faia ai ni fuafuaga faaletagata lava ia. I le avea ai ma se talavou matutua e tatau ona e maua miti mo lou lumanai. Atonu o lau miti o le faamoemoe o le ausia faafeleti, le fatuina o se galuega maoae o le faatufugaga, po o le mauaina o se tipiloma po o le tulaga faalegaluega. Atonu o i ai se faatusa taua i lou mafaufau o lou toalua i le lumanai po o se ava.

E fia ni ou moomooga o le a tau-nuu? Ua tumu le olaga i le le mautonu. O le a i ai taimi taua mo outou atonu o le a suia le ala o lou olaga i se taimi vave. O na taimi e mafai ona aofia ai le le sili atu nai lo o se vaaiga, se talanoaga, po o se mea na tupu e lei fuafuaina. O le a i ai o avanoa fou, e pei o le folafolaga na saunia e Peresitene Thomas S. Monson, e uiga i le tausaga o le auaunaga faafaifeatalai.¹ O nisi taimi e oo mai le suiga o kosi i o tatou olaga mai luitau po o faanoa-noaga sa le i faamoemoeina.

O le tele o tagata e le fiafia i le le mailoa. O le le mautonu i le olaga e mafai ona fatuina ai le leai o le

lototele, o se fefe i le lumanai. O nisi e faatuai le faia o ni tautinoga ona o le fefe i le toilalo, e tusa lava pe o i ai ni avanoa lelei. Mo se faataitaiga, atonu e faatuai ona latou faaipoipo, sailia o se aoaoga, amataina o se aiga, po o le faamautuina i se galuega mautu, ae filifili e faaalu vale le taimi ma tumau ai i totonu o le mafanafana o fale a o latou matua.

O se isi filosofia o le a faatapulaa ai i tatou ua faaalia i lenei faaupuga: "Aai, feinu, ma fiafia, aua o taeao tatou feoti" (2 Nifae 28:7). O lenei filosofia e fiafia e faananaau i tuinanau o le taimi nei e tusa lava po o a o latou tau-nuuga i le lumanai.

O Le Ala o le Fiafia

O loo i ai se isi auala nai lo auala o le fefe po o le masalosalo po o tuinanauga faaletagata—o se auala e aumaia ai le filemu, toafimalie, ma le toofilemu o le olaga. E le mafai ona e puleaina tulaga uma o lou olaga, ae e mafai ona e puleaina lou fiafia. O oe lava o lē mamanuina.

O lou fiafia o le tele lea o taunuuga o lau vaaiga faaleagaga ma mataupu

E sili ona faala-golago lou fiafia i mataupu faavae e te filifilia e mulimuli i ai nai lo tulaga i fafo atu o lou olaga.

faavae lea e te faavae ai lou olaga nai lo se isi lava mea. O le a aumaia e nei mataupu faavae le fiafia ia te oe e tusa lava po o a luitau ma ni mea faatei e le i fuafuaina. Sei ou iloiloina nisi o nei mataupu faavae taua.

1. Iloa Lou Taua Faaletagata Lava Ia

Talu ai nei sa ou faaaluina ai ma lou aiga ni nai aso malolo i saute o Farani. I se tasi afiafi, ina ua faatoa goto le la ma uftia e le pogisa le nuu i tua, sa ou filifili e taoto i lalo i luga o



Faatuatua i
Folafolaga a
le Atua.

Iloa lou taua
faaletagata
lava ia.

Avea ma
tagata ua
avea ai oe.

se nofoa o le potu i fafo o le fale. Sa amata ona sailiilia e ou mata le lagi. I le taimi muamua sa pogisa atoa. Na faafuasei lava, ona i ai se malamalama i le lagi e pei o se aloiafi, ma le lona lua, ma le lona tolu. Na auauai, ao fetuunaia ou mata i le pogisa, sa ou iloa ai lou faamemelo atu i le lematafiaaulia o le anoano o fetu. O le mea sa ou mafaufau i ai o se lagi pogisa na suia i le Ala o le Aniva.

Ao ou mafaufau i le tele o le atu laulau ma lou lava tulaga faaleatua faaletino, sa ou fesili ifo ia te au lava, "O ai au ua i ai luma o nei mamalu ma le matagofie?" Sa oo mai se mau i lou mafaufau:

"A ou vaai atu i lou lagi, o le galu ega a ou tamatamai lima, o le masina atoa ma fetu na e faia;

"Se a ea le tagata e te manatu mai ai ia te ia? ma le atalii o le tagata e te asiiasi mai ai ia te ia?" (Salamo 8:3–4).

Na sosoo mai ai ma lenei fuaitau faamafanafana:

"Aua ua e faamaulalo ane teisi o ia i agelu, ua e faapaleina foi o ia i le mamalu ma le matagofie" (Salamo 8:5).

O le faamatalaga feteenai lenei ma le vasega o le Foafoaga. E tele ma e le iu le atulaulau, ae i le taimi lava e tasi, ua tofu i tatou taitoatasi ma se taua tulaga ese e matagofie ma le iu i le silafaga a lo tatou Foafoa. O lou i ai faaletino e matua itiiti lava, ae o lou taua faaletagata lava ia e le mafuatina lona taua i lou Tama Faalelagi.


O le iloaina e silafia i tatou e le Atua ma alofa ia i tatou taitoatasi e pei o se malamalama e faamalamalama-inia o tatou olaga ma tuuina mai lona taua. Po o ai lava au, pe ou te maua ni uo pe leai, pe ou te lauiloa pe leai, ma e tusa lava pe ou te lagona le tuulafoaiina po o le sauaina e isi, ua ou maua se faamautinoaga atoatoa e alofa lou Tama Faalelagi ia te au. Na te silafia ou manaoga; Na te malamalama i ou atugaluga; ua Ia naunau e faamanuia au.

Vaai faalemafaufau po o le a se uiga ia te oe pe afai e mafai ona e vaai ia te oe lava e pei ona silasila mai le Atua ia te oe. Ae faapefea pe a e vaai ia te oe lava ma le agalelei, alofa, ma le mautinoea e tasi e pei ona faia e le Atua? Vaai faalemafaufau i le aafiaga o le a i ai i lou olaga ina ia malamalama i lou gafatia e faavavau e pei ona malamalama i ai le Atua.

Ou te molimau atu o loo i ai o Ia iina. Saili ia te Ia! Saili ma suesue. Tatalo ma ole atu. Ou te folafola atu o le a auina mai e le Atua ni faailoga moni o Lona i ai ma Lona alofa mo oe.

2. Avea ma Tagata Ua Avea Ai Oe²

O le avea ma o outou lava tagata moni e foliga mai o se feeseseseaiga.



Atonu o le a aumai se tusi mai i lou tagata i le muai olaga e faapea, "Lau pele o a'u, ou te faamomoe o le a e manatua lou naunautaiga sili o le avea ma se soo o Iesu Keriso."

E mafai faapefea ona ou avea ma se tasi ua avea ai au? O le a ou faaali atu lenei matapu faavae e ala i se tala.

O le ata tifaga *O Le Vaitau o Mafuaaga* ua faamatalaina ai le tala ia Marguerite, o se tagata teutupe manuia ua i ai se olaga pisi e tumu i faigamalaga ma fonotaga. E ui lava sa ia te ia se alii alofa o loo tauanau o ia e faaipoipo, sa ia fai mai e leai sona taimi mo se faaipoipoga po o se fanau.

O le aso na atoa ai lona 40, sa ia maua se tusi faalilolilo o faapea mai, "Lau pele o au, o le asō ua fitu ou tau-saga ma ou te tusia lenei tusi mo oe e fesoasoani e te manatua ai folafolaga sa ou faia ina ua fitu ou tausaga, ma faamanatu foi ia te oe le ituaiga o mea ou te fia avea ai." O le tusitala o le tusi e le o se isi lava nai lo Marguerite, ina ua fitu ona tausaga. O mea na sosoo ai o nai tusi lea e auiliili ai le faamatalaina e le teineitiiti laitiiti o ana sini o le olaga.

Ua iloa e Marguerite o le ituaiga o tagata o avea ai o ia e le o le tagata lea sa ia manao e avea ai ao teineitiiti. Ao ia filifili e toe avea ai ma le tagata sa ia mafaufauina ao teineitiiti, sa suia atoa lona olaga. Sa ia toe faalelei ma lona aiga ma naunau e tuuto atu lona olaga atoa e auauna atu ai i tagata e le tagolima.³

Pe afai e mafai ona e mauaina se tusi mai i lou muai olaga, o le a se mea e tau mai? O a aafiaga o le a faia ia te oe e lena tusi mai se lalolagi ua galo ae o se lalolagi moni pe afai o le a e mauaina i lenei vaitaimi?

Atonu o lenei tusi e tau mai ai se mea faapenei: "La'u pele o au, ou te tusi atu ia te oe ina ia e manatua le tagata ou te fia avea ai. Ou te faamomoe o le a e manatua lou naunautaiga sili o le avea ma se soo a lo tatou Faaola, o Iesu Keriso. Ou te lagolago i Lana fuafuaga, ma pe a ou i ai i le fogaeleele, ou te manao e

fesoasoani ia te Ia i Lana galuega o le faaolataga. Faamolemole ia man tua, ou te manao e avea ma se vaega o se aiga o le a faatasia mo le faava vau atoa."

O se tasi o faigamalaga maoae o le olaga o le iloaina pe o ai moni i tatou ma pe o fea sa tatou o mai ai, ona tumau lea i le ola ai e tusa ma lo tatou faasinomaga moni o ni fanau a le Atua ma le faamoemoega o lo tatou olaga.

3. Faatuatua i Folafolaga a le Atua

O se aoaoga mai le perofeta o Malaki o loo totonugalemu o le Toefuataina o le talalelei: "Ma o le a ia totoina i loto o fanau folafolaga na faia i tama, ma o le a liliu atu loto o fanau i o latou tama." (Iosefa Samita—Tala faasolopito 1:39). Faafetai i le Toefuataiga, o outou o fanau o le folafolaga. O le a e maua i le avea ai ma se tofi le folafolaga na faia i o outou tama.

Toe fatau lou faamanuiaga faa peteriaka. O lenei faamanuiaga ua

faamaonia mai ai e le Alii lou sootaga i se tasi o ituaiga e sefulu ma le lua o Isaraelu, ma ona o lenei mea, e ala i lou faamaoni, e avea oe ma se suli i le tele o faamanuiaga na folafola atu ia Aperaamo, Isaako, ma Iakopo. Na folafola atu e le Atua ia Aperaamo, "O i latou uma o e talia lenei talalelei, e faaigoaina i latou i lou igoa, ma avea i latou ma au fanau, ma o le a latou tutu mai foi ma viia oe, o so latou tamā" (Aperaamo 2:10).

O nei faamanuiaga e faaletino, ma afai e faia la tatou vaega, o le a faia e le Alii Lana vaega. I le isi itu, e le faamautinoaina e nei folafolaga le ogatusa o mea uma e tutupu i o tatou olaga ma o tatou faamoemoega ma manaoga. Nai lo lena, o folafolaga a le Atua e faamautinoa mai o mea e tutupu ia i tatou o le a ogatusa ma Lona finagalo. O le mea aupito sili e mafai ona tatou mananao ai i lenei olaga o le faaogatasi lea o o tatou loto

ma le finagalo o le Atua—inia ia talia ina fuafuaga mo o tatou olaga. E Na te silafia mea uma mai le amataga, e i ai se vaaiga e le maua e i tatou, ma e alofa ia i tatou i se alofa e le iu.

Ou te faailoa atu lenei mataupu faavae faatasi ai ma se aafiaga patino. A o ou laitiiti, sa ou filifili e sauni mo se suega ulufale i le aoga sili ona lelei faapisinisi i Farani. O le sauniuniga, lea sa alu ai se tausaga, sa luitauina tele. I le amataga o le tausaga, sa ou filifili po o le a lava le faigata o le galuega, o le a ou le avea lava au suesuega ma mea e taofia ai au mai le auai i au sauniga o le Aso Sa po o le vasega inisitituti faatasi i le vaiaso. Sa ou talia foi se valaauga e avea ma failautusi i lau uarota o talavou matutua. Sa ou mautinoa o le a silafia e le Alii lou faamaoni ma o le a fesoasoani ia te au e ausia ou faamoemoega.

I le faaiuga o le tausaga, ina ua latalata mai suega, sa ou lagona sa ou faia le mea sili. Ina ua ou taunuutatu mo le suega i se aoga e sili ona faa alalogia, sa ou maua le toafimalie atoa o le a tali mai le Alii i ou manaoga. Ae paga lea, o le suega i au mataupu sili ona malolosi sa avea ma mala e le i faamoemoeina—sa ou maua se togisa taofia ai au mai le auai i lenei aoga sa mananao le toatele ia auai. Sa ou popole. Na mafai faapefea ona tuula foai au e le Alii ae sa ou tumau i lou faamaoni?

Ina ua ou auai atu i le suega tau fesootaiga mo le aoga lona lua i lau lisi, sa faatumulia au i le masalosalo. I lenei aoga,

**Sa ou maua ai se
tasi o togi au
pito sili e mafai
ona maua, lea
na faataga ai au
i lenei aoga ma
se tulaga o le
faamamaluina.**



o le suega sa tele ona tog i se faatalanoaga ma le au faamasino ae pulefaamalumalu ai le faatonu o le aoga. O le amataga o le faatalanoaga sa o se mea masani lava—seia oo ina ua fesiligia au i se fesili le taua: “Matou te iloa sa tele lou suesue ia saunia ai mo lenei suega. Ae matou te fia iloa po o a au gaoioiga i fafo atu o au suesuega.”

Sa sikipi le pao o lou fatu! Mo le tausaga e tasi sa na o le lua mea sa ou faia: suesue ma alu i le lotu! Sa ou fefe o le a le lelei le malamalamai o le faamasino i se faamatlagi o lou auai i le Ekalesia. Ae i le tasi sekone sa ou faia le faaiuga e tumau faamaoni i ou mataupu faavae.

Pe a ma le 15 minute, sa ou faamatlagina ai au gaoioiga i le Ekalesia: o au sauniga o le Aso Sapati, vasega o le inisitituti, ma tiutetauave o se failautusi a le uarota. Ina ua uma, sa saunoa mai le faatonu o le aoga.

“E te iloa, a o ou laitiiti, sa ou aoga i le Iunaite Setete,” o lana tala lea. “O se tasi o au uo mamae o se Mamona. O ia o se alii talavou ofoofogia, o se tasi sa i ai uiga faaletagata maoae. Ou te manatu o tagata Mamona o ni tagata lelei tele.”

I lena aso sa ou maua ai se tasi o tog i aupito sili e mafai ona maua, lea na faataga ai au i lenei aoga ma se tulaga o le faamamaluina.

Sa ou faafetai i le Alii mo Lona agalelei. Ae, e tele tausaga na faaaluina faatoa ou malamalamai i faamanu-iaga faavavega ia na ou le auai atu ai i le aoga muamua. I le aoga lona lua,

sa ou feiloai atu i tagata taua. O faamanuiaga o lau mafutaga ma i latou sa iloagofie i le aluga umi atoa o lau galuega ma o loo taua pea i lou olaga ma i olaga o tagata o lou aiga.

Afai e le ogatasi se mea ma le auala sa e faamoemoe i ai pe na faamoemoeina ina ua maea ona e faia mea uma i lou malosi, ia sauni e talia le finagalo a lou Tama Faalelagi. Na te le tuuina mai ia i tatou se mea e le lelei le taunuuga mo i tatou. Faalogo i lena leo malu o musumusu i o tatou taliga: “Aua ua i ai tagata uma i lou lima; ia filemu ma iloa o A’u o le Atua” (MF&F 101:16).

E I Ai Le Faamoemoe i le Lumanai, Pei Foi o o Outou Faatuatua

O le tele o lou mafaufau i le gasologa o lou olaga ma lou toalua, o Valérie, o le tele foi lea o lou talitonu, o le mea sa faia se eseesege ona sa tutusa o maua vaaiga i le ola e faavavau ao ma talavou. Sa ma mananao e amata se aiga e faavavau. Sa ma iloa le mafuaaga ua ma i ai i le lalolagi ma o ma faamoemoega e faavavau. Sa ma iloa e alofa le Atua ia i maua ma sa tele so maua taua i Ona fofoga. Sa ma maua le faamautinoaga uma o le a Ia tali mai i a ma tatalo i LANA ala ma i le taimi sa Ia talitonuina e lelei.

Ou te le iloa pe ua ma saunia e talia LANA finagalo i mea uma aua o se tasi lena o mea sa ao ona ma aoao-inia—ma sa ma faaaauau pea ona aoao-inia. Ae sa ma mananao e faia le mea sili e mulimuli ai ia te Ia ma faapaiaina i maua lava ia te Ia.

Ou te molimau atu, faatasi ai ma Peresitene Monson, “e i ai le faamoemoe i le lumanai, pei foi o o outou faatuatua.”⁴ E sili ona faalagolago lou fiafia i mataupu faavae e te filifila e mulimuli ai nai lo tulaga i fafo o lou olaga. Ia faamaoni i nei mataupu faavae. E silafia ma alofa le Atua ia te oe. Afai e ogatusa lou olaga ma LANA fuafuaga e faavavau ma afai e te maua le faatuatua i Ana folafolaga, ona i ai lea o le faamoemoe i lou lumanai!

O i ai ni au miti ma ni sini? E lelei lena! Galue i lou malosi e te mafaia ina ia ausiaina. Ona tuu lea i le Alii e faia le vaega o totoe. O le a Ia faia oe i se mea e te le mafai ona faia e oe lava.

Ia talia LANA finagalo i taimi uma. Ia saunia e alu i soo se mea ua Ia poloai oe e te alu i ai ma ia faia mea ua Ia poloai oe e faia. Ia avea ma alii ma tamaitai ua Ia faafaillele oe e avea ai.

Ou te molimau atu o lenei olaga o se taimi matagofie o le faavavau. Ua tatou i ai iinei ma se sini faamamaluina—o le sauniuni e fetaiai ma le Atua. ■

Mai se lauga o le faigalotu a le OAE na tuuina atu i le Tapeneko i Sate Leki i le aso Novema 12, 2012. Mo le lauga atoa, alu i le lds.org/broadcasts.

FAAMATALAGA

1. Tagai Peresitene Thomas S. Monson, “Susu Mai Ia ma Maliu Mai i le Konafesi,” *Liahona*, Nov. 2012, 4–5.
2. O lenei fuaiaua faaaloaia ia Pindar, o se tasi o faisolo tautaua i Peru. Tagai Pindar, *Pythian* 2.72, i le *Olympian Odes*, *Pythian Odes*, ed. ma faali. William H. Race (1997), 239.
3. Tagai *L’âge de raison (With Love . . . from the Age of Reason)*, taitaia e Yann Samuell (2010).
4. Thomas S. Monson, “Ia Outou Lototetele,” *Liahona*, Me 2009, 89.

Faasoaina Atu o le
Talalelei i Luga o le

Initoneti

Saunia e Maria Mahonri-Yggrazil
Arduo Andaca

Sa ou le maua le lototoa i taimi uma i le faasoaina o le talalelei i au uo. Sa iloa e le toatele o i latou lau tapuaiga, ae sa ou le faia se isi mea e faasoai ai lau molimau. E ui i lea, afai sa i ai i se tasi se manatu sese e uiga i le Ekalesia, ou te taumafai i le mea sili e faasao.

Ina ua ou amata i le kolisi, sa ou auai atu i le sosaiete o talanoaga faafinau. Sa iloa e isi tagata auai o au o se tasi o le Au Paia o Aso e Gata Ai pe a ou faasoaina i latou i mea latou te fai mai e uiga "i Mamona" pe a maea le talanoaga faafinau. Ou te le i talanoa muamua lava e uiga i lau lotu, o lea sa tele ai ni au fesili i lena aso. Sa ou lagona le fefe ma toetoe lava a 'aloese mai le taliina. Sa ou iloa mea sa ou talitonu i ai, ae sa ou leiloa pe faapefea ona faasoaina atu. Sa ou tatalo ae foliga mai sa ou le maua se tali.

I nai aso mulimuli ane, ao ou i ai i luga o le uepisaite o le Facebook, sa ou vaaia se tusiga mai LDS.org lea sa tusia i luga e lou taitai mai le ekalesia. Sa ou iloa ai e mafai foi ona ou tusia ni mea i luga [o le uepisaite] mai le Ekalesia. Sa ou sueina autu sa fesiliga e lau au o le talanoaga faafinau e uiga i ai, faasala-lau sootaga i lau itulau, ma faapipii ia i latou uma sa aofia ai. Sa ou lagona o le a sili atu ona latou fiafia i tali.



Sa ou iloa mea sa ou talitonu i ai, ae sa ou lagona le popole ao taumafai e tali uma fesili sa i ai o lau au o le talanoaga faafinau e uiga i le Ekalesia.

Ou te le i tusia muamua ni mea e uiga i lou talitonuga i luga o le initonet, o lea sa toatele ai nisi tagata fialoa ua fesilisili e uiga i lau lotu. Ao latou fai maia ni fesili, sa ou taumafai e tuuina atu tali faigofie faatasi ai ma sootaga i anomea o le Ekalesia. O lenei auala o le a le faalagolago ai tagata i nao au tali ae e mafai foi ona faalagolago i saunoaga a Pulega Aoao e uiga i o latou fesili. Afai ae oo atu le talanoaga i se tulaga maaleale, o le a ou tali atu i le tagata i se tulaga

faalilolilo e ala i le auina atu o se savali.

Ou te matua fiafia e maua anomea o le Ekalesia i le initonet. Ou te lagonaina pea le popole i soo se taimi pe a faafuseia au i se fesili e se tasi e uiga i le Ekalesia. Ae ou te le o toe faatalitali mo latou fesili e oo mai; ou te muai taina anomea o le Ekalesia i le initonet. Ou te iloa e mafai ona fesoasoani nei anomea i au uo uma e lololu ma le lolotu. ■

E alala le tusitala i Metro Manila, Filipaina.

Faitalia ma Tali: ILOAINA O FAAALIGA

O mea e foliga mai i nisi taimi o se papupuni pogisa i fesootaiga
o se laasaga tele e faia ia talitonuina.



Saunia e Elder
Richard G. Scott

O Le Korama
a Aposetolo e
Toasefululua

Sa nofo faasaga mai ia te a'u se tamaitai o tagi māsūsū. Sa na ia faamatala mai ia te au ma loimata, "Ua ou le iloa po o le a se isi mea ou te talitonu i ai." Sa talanoa i lona feagai ma tauiviga ma le tatalo i le tele o aso ia iloa pe faapefēa ona fai se faaiuga matuā ttauā i lona olaga, ae aunoa ma le faamanuiaina. Sa faalia lona loto mafatia, "Ua ou le iloa po o le a le mea e fai. Afai e te tau mai le mea ou te faia, o le a ou faia." Faatasi ma lona lima i luga o le tusitusiga paia, sa ia fai mai, "Na tau mai e le Atua o le a Ia fesoasoani ia i tatou. Ua la tali i tatalo o tagata taitasi, aisea ua Ia le tali mai ai mo au?"

A pu'ea se tasi i le femilosaiga o faalogoga maaleale, e faigata ona ia iloa le mea e fai i le na o ia. O la'u tatalo o le fesoasoani ia te oe o lo'o maua i la lagona.

A le maua tali i tatalo faanatinati, atonu tatou te le o malamalama i nisi o mea moni e uiga i le tatalo, pe ona tatou te le o iloaina ia tali pe a oo mai.

Mataupu Faavae o le Tatalo

O le fesootaiga ma lo tatou Tama i le Lagi e le o se mataupu faatauvaa. O se avanoa paia. O loo faavae i luga o mataupu faavae le masuia e faavavau. Tatou te mauaina le

fesoasoaniga mai lo tatou Tama i le Lagi mai tali i lo tatou faatuatua, usiusitai, ma le faaogaina tatau o le faitalia.

O se mea sese le faapea, o tatalo taitasi tatou te tuuina atu o le a maua vave lona tali. O nisi tatalo e manaomia lo tatou matuā manatunatu mae'aeā i ai. E moni, e oo mai faagae'etiaga ae tatou te lei saili patino i ai. E masani ona aofia faalauaitele i se mea tatou te manaomia ona iloa ae i se isi itu, e le mafai ona tatou maua.

Sa ia fai mai, "Na tau mai e le Atua o le a la fesoasoani ia i matou. Ua la tali i tatalo a isi tagata. Aisea, ua la le tali mai ai ia te au?"

Ua tatou i ai iinei i le fogaelele ina ia tatou maua se poto masani e le mafai ona tatou maua i se isi lava ala. Ua tuuina mai ia i tatou le avanoa e tuputupu ai, ia atiina ae, ma oo i le matua faaleagaga. I le faia o lea, e tatau ona tatou aoao ia faaaoga mea moni. O le ala tatou te faafetai'aia ai luitau ma fōia faafitauli ogaoga e matua taua mo lo tatou fiafiaga.

I le faateleina o le malamalama i le uiga o le tatalo, sa ou faalogo i fautuaga mai isi, mafaufau loloto i mau, ma suesue i soifuaga

o perofeta ma isi. Ae o le mea e foliga ua sili ona fesoasoani mo au o lo'u vaia i lou mafaufau o se tamaitiiti o faalatalata ma le talitonu atoatoa i se Tamā agaalofa, agalei, poto, ma malamalama, o lē e finagalo ia tatou manuia.

Aua le faapopoleina oe ona o le faaletonu o le faailoaina atu o ou lagona. Tau lava ina ia e talanoa i lou Tamā. E Na te faafogfa i tatalo uma taitasi ma tali mai i Lona lava ala.

A tatou faamalamalamaina se faafitauli ma faailoa atu le ala e foia ai, o nisi taimi Na te tali mai īoe, ao nisi taimi e leai. E masani lava e Na te taofi se tali, e le faapea ona ua le popole, ae peitai ona e atoatoa Lona alofa ia i tatou. E finagalo o Ia ina ia tatou faaaoga mea moni ua na Ia tuu mai ia i tatou. Mo lo tatou tuputupu ae, e tatou te mana'omia le talitonuina o lo tatou atamai ia faia ai faiuga sa'o, E tatou te mana'omia le fai o mea ua tatou *lagona* e sa'o. E i ai le

taimi, o le a Ia tali mai ai. Na te le tuulafoaia i tatou.

Ua ou faailoa atu le ala moni o la tatou faia ma lo tatou Tamā. E matua leai lava se mea e uiga ia i tatou e Na te lē silafia. Ua Na silafia, mea uma tatou te mananao ai ma saunia tali uma. Ae peitai, ona o Lona faamoemoe o lo tatou fiafia faavavau, Na te faamalosi mai ia i tatou ia faia filifiliga sao.

Auala e Tolu e Maua ai Tali

1. Vaavaai mo Faamaoniga Ua Uma Ona la Taliina Oe

E pei lava o le toatele o i tatou, e le'i iloaina e Oliva Kao-tui le faamaoniga o tali i tatalo ua uma ona tuuina atu e le Alii. Ina ia tatalaina ona—ma o tatou—mata, sa tuuina atu lenei faaaliga e ala atu ia Iosefa Samita:

“Amuia oe ona o mea ua e faiā; aua sa e ole mai ia te au, ma faauta, *o le tele o taimi na e ole mai ai na e maua ai*



faatonuga mai lo'u Agaga. A na e le faapea, po ua e le oo mai i le mea ua e i ai i le taimi nei.

"Faauta, ua e iloa na e ole mai ia te a'u ma sa Ou *faapupulaina lou mafaufau*; ma o lenei ua Ou tau atu ia te oe nei mea ina ia mafai ona e iloa ai sa faapupulaina oe e le Agaga o le upumoni" (MF&F 6:14–15; faaopoopo le faatusilima).

Afai e te lagona e le o tali mai le Atua i *au* tatalo, mafaufau loloto i mau nei—ona e tilotilo toto'a lea i ni faamaoniga i lou lava olaga i tali ua uma ona maua mai ia te Ia.

2. *Ia Gauai Atu i Lagona*

Ina ia fesoasoani ia i tatou taitoatasi ia iloa tali e tuuina mai, sa fetalai le Alii:

"Afai e te manao i se isi molimau, liliu ane lou mafaufau i le po na e tagi mai ai ia te a'u i lou loto, ina ia mafai ona e iloa e uiga i le moni o nei mea.

"*Ou te lei tautala atu ea le filemu i lou mafaufau e uiga i le mataupu?*" (MF&F 6:22–23; faaopoopo le faamamafa).

Ua saunia e le alii nisi va'aiga manino e ala mai i le faatuaina o tatou ia matua su'esu'eina se faafitauli ma'ea'ea i o tatou mafaufau ona ole atu lea pe ua tonu lea:

"Afai ua sao o le a Ou faia ia mu lou loto i totonus ia te oe; o lea, o le a e *lagona* ai ua sao.

"Ae afai ua le sao, o le a e le maua ni *lagona*, faapena, ae o le a e maua se mafauauga papa" (MF&F 9:8–9; faaopoopo le faamamafa).

3. *Galue Pe a la Taofia se Tali*

E matuai ttau lava ona iloa o le Alii e tali mai foi i le ala lona tolu i le tatalo e ala i le *taofia o se tali* ao ofoina atu le tatalo. Aisea o le a Na faia ai lea mea?

O Ia o lo tatou Tama e atoatoa. E sili ona alofa ia i taou i le mea ua tatou malamalama i ai. Na te silafia le mea e lelei mo i tatou. Na te silafia le iuga mai le amataga. Na te finagalo ia tatou faia ni galuega e maua ai le malamalama tatou te manaomia:

Pe a tali mai o Ia *ioe*, o le tuuina mai lea ia i tatou o le faamaoniga.


Pe a tali mai o Ia e *leai*, o le puipuia lea o i tatou mai le sese.

Pe a *taofia le tali*, o le faatupuina lea o i tatou e ala i le faatuatua ia te Ia, usiusitai i Ana poloaiga, ma le lotomalie e saili le mea moni. Ua fuafuaina o le a faamasinoina i tatou e tusa ma a tatou filifiliga ina ia tusa ai ma ana aoaoga, e aunoa ma le muai tuuina mai o se faamaoniga. E le tatau

ona tatou nonofo ma faatalitali, po o le muimui ona ua le fetalai mai le Alii. E tatau ona tatou faia se galuega.

E masani lava ua tatou filifili e faia le mea e sao. O le a Ia faamautinoa le sao o a tatou filifiliga i Lana ala. O lena faamaoniga e masani ona oo mai e ala i taga o fesoasoaniga e maua i le aluga o le ala. Tatou te iloaina i latou e ala i le maaleale faaleagaga. E faapei i latou o ni faamatalaga mai se Tama alofa o se faamaoniga o Lana faamaoniga. Afai, i le faatuatua, e tatou te amata ai se mea e le o sao, o le a Ia faailoa mai ia i tatou ae tatou te lei mamao tele i tua. Tatou te lagonaina lena fesoasoani e ala i le iloaina o lagona atuatuvalue ma le le mautonu.

O taumafaiga a Nifae ia maua papatusi apamemea ua faaalia ai le auala o galue ai le mataupu faavae (tagai 1 Nifae 3:6–7). Ina ua maea taumafaiga le manuia e lua, sa tumau pea le faatuatua o Nifae. Sa ia tolotolo atu i le aai e agai i le fale o Lapana e aunoa ma ni tali. Na fai mai a ia "Sa taitaiina a'u e le Agaga, ma sa ou le mua'i iloa mea ou te faia," ma sa



toe faaopoopo mai o ia i ni upu taua lava, “*ae ui i lea na ou alu atu.*” (1 Nifae 4:6–7; faaopoopo le faamamafa).

Na naunau Nifae e taumafai pea lava pea, i le faaaoga-in a ana taumafaiga silisili. Sa ia faaalia le faatuatua o le a ia maua le fesoasoani. Sa ia teena le faavaivai. Ae ona sa ia galue, maua le faamautinoaga i le Alii, sa usitai, ma faaaoga-in ma le tatau lana fitalia, sa ia maua le taitaiga. Na musuia o ia i laasaga taitasi i le faamanuiaina, ma e tusa ai ma upu a lona tina “na foaiina atu le . . . *mana* e fai ai le mea na poloaiina e le Alii” (1 Nifae 5:8; faaopoopo le faamamafa).

Sa iloa e Nifae le manaomia o lona talanoa atu i le Atua, ia faatino le faatuatua, ma ia galue ina ia ona maua le fesoasoani, mai lea tulaga i lea tulaga. E leai sona muimui pe fesili mo se faamalamalamaga auiliili. Peitai, i se vaaiga patino, na te lei faatalitali mo se fesoasoani. Na ia galue! E ala i le mulimulitaia o tulafono faaleagaga, sa musuia o ia ma tuuina i ai le mana e galue ai.

Faatuatuaaina o le Finagalo ma le Auala a le Atua

E i ai nisi taimi tatou te le maitauina ai tali i tatalo talu ai o le uunaia e le manao ia faamaonia o tatou faanaunauga. Ua le mafai ona tatou vaai o le Alii e na te tuu mai ia i tatou ia faia se isi mea. Ia faaeteete i le sailiilia o Lona finagalo.

Ou te tautino atu ou te matua le iloa pe faapefea ona faia se faaiuga sao vagana ona o loo i ai le amiontonu ma le talitonuga i se Tamā Faalelagi. O le a le mafai lava ona faatino mataupu faavae pe a faaaogaina ma le manatu e i ai le fitalia e faasagatau i le finagalo o le Atua. A o i ai se agasala le salamoina, o le a tu'ua na'o i tatou ia tatou lava togafiti e taofiofia ma tauivi ai na'o tatou. Tatou te *faatoa mafai* ona sao mai e ala i lo tatou lava salamō.

Ao tatou saili musumusuga e fesoasoani i le faia o a tatou faaiuga, e aumaia e le Alii uunaiga malu. O nei mea e manaomia ai lo tatou manatunatu, faatino le faatuatua, ia galue, tauiviga mamafa i nisi taimi, ma faatino. E seasea maua le tali atoa i se mataupu mafaufaufauna faigata ma taua i le taimi e tasi, e auauai mai e aunoa ma le iloa o le taunuuga.

Ua ou sefeina le vaega aupito sili ona taua e uiga i le tatalo seia oo i le faaiuga. O le loto faafetai! O lo tatou taumafaiga faamaoni e faafetai atu i lo tatou Tama pele e faatupulaia ai faalogona matagofie o le filemu, taua o le tagata lava ia, ma le alofa.

Aisea e foliga ai o [tagata] e sili ona matitiva e sili atu ona silafia le auala e faafetai ai i le Alii? I laufanua maualuluga o Kuatemala, e toetoe lava a le mafai e tagata o le au paia ona feola. O le malaga i le malumalu e manaomia ai le osigataulaga maoae. O se asiasiga e faaalu ai se tausaga o sauniuniga. O loo i ai le galue malosi, le ositaulaga e sefe meaai ma lavalava, le faia, le valiina, ma le suiina o lavalava fou. O loo i ai le savaliga umi i mauga, le sopoia o le Vaituloto o Isabel, le tietiega i le pasi ma ni meaai laiti. Le lelavava ma le vaivai, sa latou taunuui ai i le malumalu. Sa

O nisi taimi o tali i tatalo e le iloaina aua ua tatou naunau tele e mananao i se faamautinoaga o o tatou lava manaoga.

latou fulufulu seia o latou susulu, faia o latou laei fou, ma ulufale atu i le maota o le Alii.

Ma le toe laeiina o laei papae, ua aoaoina i latou e le Agaga, maua sauniga, ma osia feagaiga. O se tasi o tina mai atumauga sa sili ona ootia ona o le agaga ma le faauigaga o le faaeeega paia. I le ulufale atu i le potu selesitila, sa ia vaaia ai o nonofo isi, ma ifo ma le migao o latou ao, ma le le nofouta i ai o isi. Sa ia ifo, ma masusu, ma mo le luasefulu minute sa ia liligi atu lona loto i lona Tama o i le Lagi. Muli-muli ane, faatasi ai ma lona ofu o loo susu i ona loimata, sa ea i luga lona ulu. Sa fesili i ai le faatina lelei, “E mafai ona ou fesoasoani?” Sa ia tali atu, “Oi, mata e te mafai? O lou faafitauli lea: Sa ou taumafai e tau atu i le Tama o i le Lagi lo'u agaga faafetai mo o'u faamanuiaga uma, ae ou te le i lagonaina sa ou fesootai atu. E mafai ona e fesoasoani mai ia te a'u e ta'u atu i a te Ia lo'u faafetai tele?”

E moni lenei fautuaga e uiga i le tatalo. Ua ou suesueina e ala i au lava aafiaga faaletagata. Ua ou iloaina o nisi taimi o le mea e foliga mai o se papupuni pogisa i fesootaiga, o se laasaga tele lea e faia ia talitonuina.

Afai e te sailia Lana fesoasoani, ia mautinoa o loo e ola mamā, o loo agavaa au faamoemoega, ma o loo e nau-nau e fai mea Na te finagalo ai—aua o le a *Ia* tali mai i au tatalo. O ia o lou Tama alofa; o oe o lona atalii ma afafine faapelepele. E atoatoa Lona alofa ia te oe ma e finagalo e fesoasoani ia te oe. ■



Ae Faapefea pe Afai Ou Te Le Lagonaina se MU i le **LOTO?**

*Pe a e iloaina le mea e vaavaai i ai, e mafai ona sili
ona faigofie ona iloa le Agaga Paia*

Saunia e Rachel Nielsen

“**V**alaaulia Mr. Wood* i le seminare.” Na oo mai le manatu i lou mafaufau i le taimi na ou faalogo ai i le faasilasilaga, ma sa ou manatu vave o se mea valea lena mea. Aisea o le a ou valaaulia ai lau faiaoga o le musika e sau i le seminare i le 5:30 i le taeao?

E lei leva ona tau mai e le peresitene o le seminare i la matou vasega faapea o le a matou faia se aso faafetai mo faiaoga. Sa luiina i matou e valaaulia nisi o a matou faiaoga i le aoga e faatasi ma i matou i le seminare i le

*Ua suia le igoa.

taeo lea o le a matou faafetai ai ia i latou mo lo latou auaunaga. Sa ou mafaufau i le vaiaso atoa ina ua uma ona ou faalogo i lenei faasilasilaga, e valaaulia Mr. Wood. O taimi uma lava ou te alu ai i le seminare pe vaaia o ia i le vasega o le musika, sa toe oo mai le manatu: “Valaaulia Mr. Wood i le seminare.” Ina ua mavae ni nai aso o lenei mea, sa le mafai ona ou toe le amanaiaina le manatu.

I se tasi taeao ao aumai i fafo e tamaiti aoga o le vasega musika a latou mea faifaili, sa ou faataatia eseia

lau putoso ma alu atu ia Mr. Wood. Sa tatavale lou fatu ma sa tetete ou lima, ae sa ou tatalaina lou gutu e tuuina atu le valaaulia, sa ou lagona le mafanafana.

I lou maofa, na fai mai Mr. Wood o le a ia sau! Sa ia fia iloa le mafuaaga ou te alu ai i le seminare i taeao uma ao le i faia le aoga, ma sa fia manao e aoao atili. Ina ua uma ona ou tuuina atu ia te ia faamatalaga uma, na ou savali ese ma le tumu i le olioli.

I le aluga o lenei aafiaga, ou te le i lagonaina se mu i le loto (tagai

MF&F 9:8). Ae, sa ou lagona le Agaga Paia. O le manatu faifaipea lea na oo mai e valaaulia Mr. Wood (tagai MF&F 128:1), o le mafanafana na ou lagonaina ina ua ou valaaulia o ia (tagai Ioane 14:26), ma le olioli na ou lagonaina ina ua maea ona ou valaaulia o ia (tagai Kalatia 5:22) na oo mai mai le Agaga. Ae afai sa ou sailia mo na o se mu o le loto, atonu sa ou leiloa ao uunaia au e le Agaga Paia.

E talanoa mai le Agaga Paia i le tele o auala, ma pe a e suesue pe faapefea ona Ia fesootai mai, o le a e iloaina le mea e saili i ai ao e taumafai ia iloa pe o Ia faatasi ma oe ma pe o Ia aoao pe taitai oe.

Vaavaai mo Mea Laiti ma Faatauvaa

Ao le i vaavaai i le tele o auala e fetalai mai ai le Agaga Paia ia i tatou, e manaomia ona tatou manatua o le tele o taimi, e filemu ma itiiti faaaliga. Afai o tatou vaavaai mo se aafiaga faapei o Alema le Itiiti ma se agelu ma se mafuie, atonu o le a tatou misia uunaiga faifai pea ma filemu atu mai le Agaga Paia. Ua lapatai mai e Elder David A. Bednar, o le Korama a Aposetolo e Toasefululua e faapea, afai tatou te “faamamafaina tele faaaliga faaleagaga ofoofogia ma le matautia,” o le a tatou le patipatia ia “uunaiga laiti auauai faaleagaga” lea e sili atu ona taatele.¹ Ao e tau-mafai ia iloa le Agaga Paia, vaavaai mo uunaiga laiti ma faatauvaa.


Vaavaai mo Auala o Fesootai Mai ai le Agaga Paia

Afai e te le i lagonaina lava se mu i le loto, aua le popole. E toatele tagata o e iloa le uunaiga a le Agaga Paia i lenei auala, ae e fetalai mai foi o Ia i le tele o isi auala, ma e te le tau lagonaina le mu o le loto e lagona ai Lona faatasi mai. O le mea moni, ao e aoaoina auala e uunaia ai oe e le Agaga Paia ma vaavaai mo i latou i lou olaga, atonu o le a e iloa ua sili atu ona Ia fesootai mai ia te oe nai lo lou iloaina.

O lenei lisi e aofia ai na o se vaega toaitiiti o auala e fesootai mai ai le Agaga Paia. Suesue i tusutisiga paia ma upu a perofeta o aso nei, faapea foi ma itulau 96–97 i le *Talai Lau Talalelei: O Se Taiala mo le Galuega Faafafeautalai* (2004) ia iloa ai isi auala e mafai ona Ia talanoa mai ia te oe.

“E galueaiina moni le agaga o faaaliga ao oo mai mafaufauga ma lagona i o tatou mafaufaug ma loto e ala i le manao o le Agaga Paia. (Tagai MF&F 8:1–2; 100:5–8.)”² E mafai ona talanoa mai le Agaga Paia ia te oe e ala i:

- Lagona o le alofa, olioli, filemu, onosai, agalelei, faamaoni, agamalu (tagai Kalatia 5:22–23).
- Mafaufauga e faatumuina le mafaufaug po o le uunai malosi o ou lagona (tagai MF&F 128:1).
- O se manao e faia mea lelei ma usitai i poloaiga (tagai Mosaea 5:2).
- O se lagona e sa’o se mea (tagai MF&F 9:8).
- Lagona o le mafanafana (tagai Ioane 14:26).
- Lagona e “faalauteleina [lou] agaga” (Alema 32:28).



O LE A LE MU I LE LOTO?

“O le a le uiga o le ‘mu i le loto?’ Mata e manaomia ona avea ma se lagona o le vevela, e pei o le mu e mafua mai se afi? Afai o le faauigaga lena, ou te le i maua lava se mu i le loto. E moni, o le upu ‘mu’ i tusutisiga paia ua faailoa ai se lagona o le mafanafana ma le filemu. O le molimau lena e maua e le toatele. O le auala lena e galueaiina ai faaaliga.”

Elder Dallin H. Oaks, o le Korama a Aposetolo e Toasefululua, “O Le Aoao Atu ma le Aoaoina i le Agaga,” *Liahona*, Me 1999, 14.

E FAAPEFEA ONA OU ILOA PE AFAI O SE MANATU E MAI IA TE AU PO O LE AGAGA PAIA?

"E tatau ona tatou galulue. Ona tatou iloa lea pe o sau mai ia te au pe o le mana o le Atua. . . . O mea uma e valaaulia ma faatosinaina i tatou ia faia mea lelei ma ia lelei e mai le Atua.

"Elder David A. Bednar o le Korama a Aposetolo e Toasefululu, "Mamaru o le Malamalama: Iloatinoina o le Malamalama" (video), LDS.org. Matamata i le vitio atoa i le lds.org/go/patternL6.



- O mafaufauga e "faamalamalama ai [lou] malamalamaaga" (Alema 32:28).
- O se galala mo nisi upumoni (tagai Alema 32:28).
- Lagonaina o le uunaia (fautuina) ia faia se faatinoga pe taofia (toe taofi) mai le faia o se mea (tagai 1 Nifae 7:15; 2 Nifae 32:7).

O Auala e Mafai ai ona Oo Mai Nei Mafaufauga ma Lagona

E mafai ona oo mai mafaufauga ma lagona mai le Agaga Paia:

- "Galue vave ma malosi."
- "Faifai malie ma le le gaoia."
- "E matua'i maaleale lava atonu o le a e le malamalama lelei i ai."³

Aoao atili e uiga i lenei mea e ala i le matamata i se vitio i le lds.org/go/revelationL6.

E mafai ona oo mai mafaufauga ma lagona mai le Agaga Paia i:

- Aumaia ia mea i lo tatou manatuaga (tagai Ioane 14:26).
- Puipuia i tatou mai le faaseseina (tagai MF&F 45:57).
- Molimau atu i le Tama Faalelagi ma Iesu Keriso (tagai 2 Nifae 31:18).
- Fesoasoani ia i tatou e aoao atu (tagai MF&F 84:85).
- Tuiina mai meaalofa o le Agaga (tagai MF&F 46:11).
- Aumaia se faamagaloga o agasala (tagai 2 Nifae 31:17).

Vaavaai mo le Lelei

Pe a e taumafai ia iloaina le Agaga, mafaufaufau i uunaiga o taunuuga faamoemoeina: pe o taitai e le mafaufauga po o lagona oe e faia mea lelei? Ua faapea mai le Moronae 7:16, "O le mea lea, ou te faaali atu ai ia te outou le ala e faamasino ai; ona o mea uma e valaaau mai ia fai le lelei, ma faatauanau mai ia talitonu ia Keriso, ua auina mai i le mana ma le meaalofa a Keriso; o le mea lea e mafai ai ona outou iloa ma le malamalama atoatoa ua mai le Atua."

Na saunoa mai Peresitene Gordon B. Hinckley (1910–2008), "E faapefea ona tatou iloa le uunaiga a le Agaga? Ou te le manatu e faigata tele, e moni lava. . . . Pe na te faatauanau se tasi e fai mea lelei, ia tulai ae, ia tu maualuga, ia faia le mea sao, ia



AISEA E FAIGATA AI ONA ILOA LE AGAGA PAIA?

"Ua faamoemoe mai lo tatou Tama Faalelagi ia e aoaoina le auala e te maua ai lena fesoasoani faalelagi, e ala i le faaaoga o le faatuatua ia te la ma Lona Alo, o lesu Keriso. Afai na e mauaina le taitaiga i le na o le ole atu e aunoa ma se isi mea na fai, o le a oo ina e vaivai ma saga faalagolago ai lava ia te i La'ua. Ua La silafia o le a oo mai le tuputupu ae taua faaletagata a o e tauivi e aoao pe faapefea ona taitaia e le Agaga."

Elder Richard G. Scott o le Korama a Apo-setolo e Toasefulua, "la Maua le Taitaiga Faaleagaga," *Liahona*, Nov. 2009, 6.

agalelei, ia lima foai? O le Agaga o le Atua lava lena. Afai e pogisa, taufaa-matau, mataga, le lelei, ona outou iloa lea o le fili."⁴

Afai o e mafaufau pe na e lagona-inia le Agaga pe leai, fesili ifo ia te oe lava pe o le mafaufau po o le lagona o valaauiua oe e faia le mea lelei. Afai o lea, ia e mautinoa e mai le Atua.

Vaavaai mo se Avanoa e Faaaoga ai Lou Faitalia

Afai e te agavaa ma o loo faigata pea ona e iloaina le Agaga Paia, ia faia se faatinoga. Ua faamanuiaina oe e le Tama Faalelagi i le faitalia, ma o nisi taimi o le a Ia manaomia ai oe e galue e aunoa ma Lana taitaiga. O le a Ia fetalai mai ia te oe e faaaoga lou faatuatua e ala i le faia o se faatinoga e aunoa ma le iloaina o le taunuuga. Na saunoa Peresitene Boyd K. Packer, Peresitene o

le Korama a Apo-setolo e Toasefulua, "I se vaega o lau sailiga mo le malamalama faaleagaga, o loo i ai lena 'laasaga tele o le faatuatua.' . . . O le taimi lea e te oo atu ai i le faatausiusiuga o le malamalama ma laa atu i le pogisa ma e iloa ai o loo malamalama foi le ala i luma atu mo na o se laa se tasi pe lua foi."⁵ Afai e te galue ma le faamaoni i le malamalama ua e mauaina, e aunoa ma le iloaina o uunaiga mai le Agaga Paia, o le a faamautinoa atu e le Tama Faalelagi e te le se ese lava. ■

E alala le tusitala i Iuta, ISA.

FAAMATALAGA

1. David A. Bednar, "O Le Agaga o Faaaliga" *Liahona*, Me 2011, 90.
2. David A. Bednar, "O Le Agaga o Faaaliga," 88.
3. David A. Bednar, "O Le Agaga o Faaaliga," 90.
4. *Teachings of Gordon B. Hinckley* (1997), 260–61.
5. Boyd K. Packer, "O Le Sailiga mo le Malamalama Faaleagaga," *Liahona*, Jan. 2007, 18.

E FAAPEI LAGONA O LE AGAGA?

"E le o ia i matou ni upu . . . lea e faamatala atoatoa ai le Agaga" (Boyd K. Packer, "The Candle of the Lord," *Tambuli*, Tes. 1988, 34). Ona e faigata ona faamatala lagona o le Agaga, o le a faamatalaina e tagata uma i se auala e ese mai ai. Ae e ui lava i nei eseesege, e mafai ona tatou aoao ni mea se tele pe a faamatalaina e nisi le auala e fetalai mai ai le Agaga Paia ia i latou. Matamata i nisi o tagata ao faamatalaina auala e latou te lagona ai le Agaga Paia i le lds.org/go/powerL6.



MULIMULI i Musumusuga LAITI

O musumusuga uma mai
le Agaga Paia e taua le
faalogo i ai.

Afai e ato atu e se asiosio se ogalaau tele i luga o lou moega i le po, masalo e te manao ia iloa ao lei tupu. O Wilford Woodruff (1807–98), lea na avea mulimuli ane ma Peresitene lona fa o le Ekalesia, na tofa i fafo i lana taavaletoso ma lona faletua ma le la tama ae musumusu atu le Agaga, “Nofo i luga e aveese [lau] taavale solofanua lena.”¹ Na mafai lava ona ia teena e avea o se manatu ese, ae peitai sa ia usitaia. I le afa itula mulimuli ane, na gaulele ai e se asiosio se laau tele ma lele atu i le ea. Na pau tonu lava le laau i le mea lea sa i ai le taavaletoso.

O le tele ia o ia ituaiga faataitaiga o vavega ia na tutupu o se taunuuga o le mulimuli i musumusuga.

Ae a se musumusuga lea e unaia ai oe e valaau atu i se uo i le na o le fai atu lava talofa? Po o se musumusuga e tuu se isi pea totini i totonu o lau atofaafafa mo leisi au savaliga sopo? O le mulimuli i unaiga faapena e foliga mai ai o le a le taitai atu ai i taunuuga matautia, ae e taua lava i latou.

Mafai e lelei le aso o le uo lea sa e valaau atu i ai. E mafai ona faafafia o ia i le valaau atu i le telefoni. I le savaliga sopo, e mafai ona faauigaina le isi pea totini faapea o le eseesega lea i le va o se tafaoga mafana ma ni manuaga tiga pe afai na faafusei ona susu ou vae.

Na aoao mai Peresitene Thomas S. Monson faapea: “Tatou te vaavaai. Tatou te faatalitali. Tatou te faalogo mo lena leo filemu ma itiiti. Pe a talanoa mai, e usitaia e alii atamamai ma tamaitai. Aua nei faatuai ona tatou mulimuli i musumusuga a le Agaga.”²

O nisi taimi, o unaiga e faanatinati. Peitai, i le tele lava o taimi, e toofilemu. Na folafola mai e le Tama Faalelagi e faatonuina i tatou i “lea fuaitau i luga o lea fuaitau, ma lea mataupu i luga o lea mataupu, o sina mea itiiti i i ma sina mea itiiti i o” (2 Nifae 28:30).

Na aoao mai Elder David A. Bednar o le Korama a Aposetolo e Toasefululuia: “O le tele lava o taimi, e oo mai faaaliga i nai faaopoopoga laiti mo sina taimi, ma e tuuina mai e tusa ai ma o tatou manaoga, agavaa, ma tapenapenaga.”³

Atonu lava, o le a leai se tasi o i tatou o le a manaomia le ‘alo mai se ogalaau na atoina mai ia i tatou e se asiosio. Ae e mafai ona tatou mautinoa o le a i ai lava iina ni mea lelei itiiti ma faatauvaa e mafai ona tatou faia ao tatou gauai atu i le Agaga. ■

FAAMATALAGA

1. *Aoaoga a Peresitene o le Ekalesia*: Wilford Woodruff (2011), 49.

2. Thomas S. Monson, “The Spirit Giveth Life,” *Ensign*, Me 1985, 68.

3. David A. Bednar, “O Le Agaga o Faaaliga” *Liahona*, Me 2011, 87.

O SE FAAMANUIAGA MO LOU USO

Saunia e Jesse Jones

Sa ou aoao e uiga i le mana ma faamanuiaga o le perisitua i se taimi faanoanoa. I ni nai tausaga ua mavae, ao 14 tausaga o lou uso laitiiti, sa lavea lana pasika ma gaulele ai le afa o lona vae. Na valaau mai lou tama ma tau mai ia te au o loo latou aveina o ia i le falemai. Sa i ai se lagona le lelei i lou manava ao ou alu atu faatopetope i le falemai. Ina ua ou taunuutu atu iina, sa ou vaaia se tasi o tama o lo matou aiga. Sa ia tau maia ia te au le tuga tele o le faalavelave.

O le fefe i le mea o le a ou vaai i ai, sa ou tatalaina le faitotoa i le mea lea sa i ai lou uso ma laa atu i totonus o le potu. Sa ou laa tasi atu, moeiini ou mata, ma faafuasei lava ona maua le filemu. E pei lava foi ona le galo ia te au le lagona le lelei lea sa ou lagonaina, o le a le galo foi ia te au le lagona o le filemu ma le mafanafana lea na lofutuina ai au. Sa ou iloa le lagona—o le lagona o le Agaga.

Ona ou faalogoina lea o le talanoa a lou tama. Sa la tuuina atu ma le tama o lo matou aiga se faamanuiaga faaleperisitua i lou uso. Sa ia faamanuiaina ma le agamaulalo lona atalii i le suafa o Iesu Keriso ina ia manuia, ia faamaloloina, ina ia toe lelei lona vae.

Ina ua maea le faamanuiaga, sa filemu tagata uma mo sina taimi. Sa ou iloa i lena taimi e tatau ona ou ola agavaa ina ia maua le Perisitua

Mekisateko ma ia mafai ai ona faia faamanuiaga mo lau fanau o i le lumanai.

Ina ua matou potopoto i le potu tele i fafo atu o le potu o lou uso, na amata ona talanoaina e ou matua le mea e tatau ona la faia. Sa la fesiligia pe tatau ona tuua Mekisiko ma ave o ia i se fomai i le Iunaite Setete pe fai le taotoga iinei. Po o le a lava se filifiliga na la lagona e sili ona lelei mo lou uso, sa ou iloa ua uma ona ia maua le tausiga sili e mafai ona ia mauaina. Ua ia mauaina se faamanuiaga e ala mai i alii se toalua o umiaina le perisitua, o lea la po o le a lava le mea e filifili i ai ou matua, o le a manuia lou uso.

Sa la filifili e nonofo i Mekisiko mo le taotoga. Sa tuuina e fomai i totonus o le vae a lou uso se uamea ma ni faosikulu e 10. Na manuia lelei, ma i ni nai masina mulimuli ane sa ia auai atu i se au soka. Na taunuutu le faamanuiaga e pei lava ona tau mai e lou tama.

Ou te iloa o le perisitua o le mana ma le pule a le Atua ua tuuina atu i alii. O se meaalofa maoae lea ua Ia tuuina mai ia i tatou. ■

E alala le tusitala i Chihuahua, Mekisiko.



"A tatou maua le perisitua, tatou te maua le pule e galue ai i le suafa o le Atua, ma taitai ai i ala o le upumoni ma le amiotonu. O lenei pule o se punavai taua o le mana amiotonu ma le faatosinaga mo le manuia o le fanau a le Atua i le fogaeleele, ma o le a oo i tala atu o le veli."

Elder L. Tom Perry o le Korama a Apostolo e Toasefululua, "O Aoaoga Faavae ma Mataupu Faavae o loo I Ai i Mataupu Faavae o le Faatuatua," *Liahona*, Nov. 2013, 47.



“O le a le mea e tatau ona ou mafaufau i ai i le taimi o le faamanatuga?”

Eui tatou te tutu o ni molimau mo Iesu Keriso i taimi uma, i mea uma, ma i nofoaga uma (tagai Mosaea 18:9), o nisi taimi e tautava mai ai faatosinaga o le lalolagi o siomiaina i tatou mo lo tatou gauai atu. E aumaia ia i tatou e le faamanatuga se avanoa e taulai atu ai o tatou mafaufau i le Faaola e aunoa ma ni mea faalavefau.

O le taimi o le faamanatuga, e mafai ona e mafaufau i le uiga ma le matagofie o le sauniga. O le aai ma feinu i faatusa o le tino ma le toto o le Faaola e mafai ona fesoasoani ia te oe ia toe mafaufau ai i Lana taulaga togiola ma lē iu. Pe a e tagofaina le faamanatuga, o loo e faafouina lau feagaiga o le papatisoga. Ao e faia lea mea, o le a mafai ona e toe tautino atu o le a manatua peoa o Ia ma tausi Ana poloaiga.

E mafai ona e faaleleia ou aafiaga o le faamanatuga e ala i lou saunia o oe lava faaleagaga. I le aluga o le vaiaso, mafaufau e suesue i ni lauga o le konafesi aoao po o fasifuitau o mau e fesoasoani ia te oe ia taulai atu i le taulaga a le Faaola ma lou lava tulaga faalesoo. I le taimi o le viiga ma tatalo o le faamanatuga, taulai atu i upu o e usuina ma faalogoina, ma mafaufau i o latou uiga.

O le taimi o le faamanatuga, faaaoga se taimi e mafaufau ai i suiga o e faia i lou olaga faaletagata lava ia ina ia avea atili ai faapei o Iesu Keriso. A maea ona tagofia ma le agavaa le faamanatuga, o le a mafai ona e lagonaina le mama ma le mama a'ia'i, e pei lava ona e lagonaina i le aso o lou papatisoga.

Liliu Atu Ou Mafaufauga i le Togiola

O le taimi o le faamanatuga, na liliu atu ou mafaufauga ia Iesu Keriso ma Lana Togiola. O le faigata ia mo au le faaalia o ou lagona i le taimi o le faamanatuga pe a ou manatu e uiga i le Togiola a Iesu Keriso. Ou te iloa o Iesu Keriso na filifilia e avea ma o tatou Togiola. Ou te iloa o loo soifua o Ia.

Nephi B., 20 tausaga, Brazzaville, Ripapelika o Congo

Manatua le Taumafataga Mulimuli



E tatau ona tatou mafaufau e uiga i le taulaga togiola a Iesu Keriso ma le taua o le fetagofi atu ma le agavaa i faatusa o Lona tino ma Lona toto.

E mafai foi ona tatou mafaufau e uiga i le taimi na Ia faamanuia ai faatasi ma Ana Aposetolo e Toasifululua le falaoa ma le uaina.

Jonás A., 18 tausaga, Morelos, Mekisiko

Mafaufau ia Iesu Keriso



O le taimi o le faamanatuga ou te mafaufau ai e uiga i le mea na oo i ai le Faaola ina ia mafai ona tatou salamo i mea sese na tatou faia. Ou te mafaufau foi i faamanuiauga uma ua Ia tuuina mai ia te au faapea ma vavega ofoofogia ua Ia faataunuina ma o le a faataunuina. Ua matua faamanuiaina i tatou i le mafai ona tagofia o le faamanatuga ina ia mafai ai ona tatou salamo mai a tatou agasala ma tautino atu ina ia lelei atili.

Andee B., 13 tausaga, Iuta, ISA

Mafaufau Loloto i Upu o Viiga o Faamanatuga



E aoao mai e viiga o faamanatuga ia mea e tatau ona tatou mafaufau i ai i le taimi o le faamanatuga. Mo se faataitaiga, o le pese faamanatuga e sili ona ou fiafia i ai, "I Le Lotomaualo, Faaola e" (*Viiga*, nu. 95), o loo fai mai, "Nei galo ia au, le Faaola e, na E maliu mo au nei; Ma lou loto sa momomo, i le satauro i Kalevaria." O le manatuaina o upu o le viiga faamanatuga i le taimi o lenei sauniga paia e fesoasoani

lea ia te au ia lagona le filemu ma faateleina lou lotofafetai mo le Togiola a Iesu Keriso.

Austin B., 15 tausaga, Alberta, Kanata

Avatu ia Faafetai mo Faamanuiaga



O le taimi o le faamanatuga e tatau ai ona tatou mafaufau e uiga i le maoae o le taulaga na faia e lo tatou Faaola mo i tatou ma ia tumu o tatou loto i le agaga faafetai. Pe a ou tago atu i le faamanatuga, ou te fia faafetai i le Tama Faalelagi ma Lona Alo Pele, o Iesu Keriso, mo faamanuiaga ua ou maua.

Elen S., 16 tausaga, Paraíba, Pasila

Taofi Lou Mafaufau mai le Fealualuaisolo



E i ai sau tamai kata e teuina i totonus o au tusitusiga paia lea ou te tosoina mai i fafo i Aso Sa uma i le taimi o le faamanatuga. O loo faailoga ai le Mosaea 18, lea o tauina mai a i Alema feagaiga o le papatisoga. O loo i ai i le kata ni tamai faamatalaga, e pei o le "Ia lotofafetai mo le Togiola," o tusia ai i luga e fesoasoani ia te au ia manatua le faamoemoega ma le paia o le faamanatuga. O le toe iloiolina o faamatalaga o le a fesoasoani ia te au ia tausia lou mafaufau e taulai atu i le faamoemoega ma le paia o le faamanatuga.

Alisha M., 19 tausaga, Texas, ISA

Manatua ma Iloa

O le faamoemoega o le faamanatuga o le toe faafouina lea o a tatou feagaiga ma lo tatou Tama Faalelagi ma ia faamamaina mai agasala ua uma


ona tatou salamo ai. O le taimi o le faamanatuga, tatou te manatua ai le taulaga a Keriso mo i tatou ma mafaufau loloto ai i le ala o tatou faaaogaina ai i o tatou olaga. Ou te taumafai e mafaufau i mea sa ou faia i le vaiaso ua tea ma le auala na ou tausia ai au feagaiga ma lou Tama. Na ou iloaina agasala sa ou faia ma taulai atu i le auala e mafai ai ona ou faaaogaina le Togiola e foia ai i latou. A ou faia lenei mea, e avea le faamanatuga ma se aafiaga malosi musuia ma faaleagaga.

Abigail P., 14 tausaga, Arisona, ISA

Toe Manatunatu i Au Feagaiga

Ao ou laitiiti, e na o le pau lava le mea sa ou mafaufau i ai i le taimi o le faamanatuga pe faapefea ona ou filemu. I lou umia ai nei o le perisitua, ua ou malamalamai a o le mauaina o se uiga o le faamanatuga ma ia fesoasoani ia te au i lou tuputupu ae faaleagaga, e tatau ona ou manatunatu i ai i le taimi ao faia ai. Ou te mafaufau e uiga i le Togiola a le Faaola ma le auala na Ia faaalia ai le alofa mo i tatou. Ou te mafaufau foi i le auala e mafai ai e le tagofia o le faamanatuga ona faamlosia ai lou faatuatua ma manaoga e faataunu lau feagaiga o le papatisoga.

Levi F., 19 tausaga, Abia, Nigeria



TUUESEINA LE LALOLAGI

"A o ou laitiiti, sa tataina ai se musika matagofie i le taimi e tufa ai le faamanatuga. E

lei leva ae talosaga mai le Usoga ina ia taofi lena faiga aua ua faaaantu o tatou mafaufau i le musika nai lo le taulaga togiola a lo tatou Alii ma le Faaola. I le taimi e faia ai le faamanatuga, tatou te tuueseina ai le lalolagi. O se taimi o le faafouga faaleagaga a o tatou iloaina le loloto faaleagaga o le taua o le sauniga ua ofoina mai ia i tatou taitoatas. Afai tatou te faatalale i le fetagofii atu i le faamanatuga, o le a tatou le mauaina le avanoa mo le faatupulaia o le faaleagaga."

Elder L. Tom Perry o le Korama a Apostolo e Toasefululuu, "A O Tatou Fetagofii Atu Nei i le Faamanatuga," *Liahona*, Me 2006, 41.

FESILI O LE A SOSOO MAI

"Ua manao se tasi o au uo e faataitai i se mea le lelei i le na o le faatasi lava ina ia mafai ona ia faasoa atu pe a talanoa i ai tagata. E mafai faapefea ona ou fesoasoani atu ina ia ona iloa e le o se manatu lelei lena mea?"

Auina mai lau tali ma se atapue sili ona manino, pe a manaomia, a o lei oo i le aso 15 lulai, 2014, i le liahona.lds.org, e ala i le imeli i le liahona@ldschurch.org, po o le meli (tagai i le tuatusi i le itulau e 3).

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) urota po o le paranesi, (4) siteki po o le itu, (5) lau faatagaga tusitusia, ma, afai e itiiti ifo i le 18 ou tausaga, o le faatagaga tusitusia a ou matua (e talia foi i le i-meli) e lolomiina ai lau tali ma lou ata.

E ono faapupuuina tali mo le uumi po o le manino.



**Saunia e Elder
Anthony D. Perkins**
O Le Fitugafulu

E TUUINA MAI E LE SEFULUAI SE MALOSIAGA I TOTONU

Filifili nei loa e totogi se sefuluai faamaoni. O le faia o lena mea o le a fesoasoani ia te oe ia iloa e tausia e le Alii Ana folafolaga.

Na aoao mai Peresitene Thomas S. Monson “o le totogi ma le faamaoni o le sefuluai e maua ai e se tagata se malosi i totonu, ma se tautinoga e usitai i isi polo-aiga.”¹ Sa faamanuiaina au i le mauaina o se molimau o lenei mataupu faavae ao avea au ma se tama talavou.

Ina ua 14 ou tausaga, sa amata lau galuega muamua, e maua ai le 2 tala amerika i le itula e avea ma se leipa faufale. O le aofaiga o le siaki mo lou vайaso muamua e 80 tala. Sa ou manao e faatau se laau pese e valu fata, o se tekinolosi fou tau musika i lena taimi. O le laau e atoatoa uma ona vaega lea sa ou manao i ai e 320 tala le tau. Sa ou faasoatatu ma le fiafia ia Tina ma Tama lou naunautaiga e faatau le laau pe a maea ia vайaso e fa o le galuega.

Silia ma le Fa Vайaso

Na aoao mai ma le poto ou matua, “E silia ma le fa vайaso e maua ai se tupe ia lava e faatau ai lena laau pese. E tatou ona e faaalia le agaga faafetai i le Atua mo Ana faamanuiaga e tele e ala i

le totogina o le 10 pasene o lou totogi e avea o se sefuluai. O le a manaomia e te totogia i le malo pe a ma le 10 pasene i lafoga. Ma e tatou ona e aoao ao laitiiti ia usitai i fautuaga a perofeta i le saunia o mea tautupe mo le lumanai, e aofia ai lau misiona; ma te fautua atu ina ia e tuueseina le 30 pasene o au tupe maua i se teuga tupe.”

Na faatopetope ona fuafuaina e lou mafaufau faatalavou faapea afai ou te

faia le mea na aoao mai e ou matua, e na o le 40 tala lau tupe i vайaso taitasi e faaaoga, o lona uiga e tatau ona ou faigaluega ia le itiiti ifo ma le lua masina e faatau ai le laau pese lea ou te manao i ai. Sa ou oo i se tulaga fai-gata o le filifiliga—mata o le mauaina o meatotino faaletino o sau mea lea e faamuamua, pe o le a ou ositaulaga e totogi le sefuluai ma tuuese se tupe e teu?

Totogi Muamua le Sefuluai

Ua fautua mai le *Mo Le Malosi o le Autalavou*: “Ia totogi muamua [le sefuluai], e tusa lava pe e te manatu e le lava au tupe e faafetaiaia ai isi o ou manaoga. O lou faia o lea mea o le a fesoasoani ia te oe e atiae ai se faatuatua sili atu, faatoilalo ai le manatu faapito, ma talia atili ai le Agaga.”²


Sa ou filifili i le 14 tausaga e totogi ma le faamaoni le sefuluai mo lou olaga atoa. Sa ou naunautai lava e mulimuli i le perofeta i le sefeina o tupe mo lau misiona faapea ma le aoga i le lumanai. Na aoaoina foi au e



O LE A IA TATALAINA LE ALA

“E mafai e i tatou uma lava ona totogi le sefuluai. I se tulaga moni, e leai se tasi o i tatou e le mafai ona ia totogia le sefuluai. O le a faamalosia e le Alii la tatou faaiuga. O le a ia tatalaina mai se ala e gauai ai.”

Peresitene Thomas S. Monson, “Ia Fai Oe ma Faaaoao,” Liahona, Ian. 1997, 52.



lenei aafiaga ina ia iloa le eseesega o mea e mananao ai ma mea e manao-mia. Sa ou manao i le tekinolosi sili ona fou, ae ou te le manaomiaina. O lea sa ou filifili loa e faatau se laau e le taugata tele ma e itiiti ifo ona ki, ma o loo aoga pea i le taimi na ou aluese ai mo lau misiona.

O Folafolaga na Tausia

A o ou aoao e ala i le totogiina o le sefuluai o le a tausia e le Alii Ana folafolaga, na tuputupu ae malosi lou faatuatua ma faapea foi ma lou manao ia tausia isi Ana poloaiga. Sa ou aoao afai ou te tuuina atu se taulaga anapogi limafoai, o le a Ia taliina au tatalo ma taitaiina au e le aunoa (tagai Isaia 58:6–11). Sa ou aoao afai ou te faitauina le Tusi a Mamona, o le a Ia faaalia mai ia te au le moni e ala i le mana o le Agaga Paia (tagai Moronae 10:4–5). Sa ou aoao afai ou te usiusitai i le Upu o le Poto, o le a Ia aumaia ia te au le ola maloloina, poto, ma le malamalama ina ia mafai ai ona ou “taufetuli ae le vaivai” (tagai MF&F 89:18–21). Ma sa ou aoaoina afai ou te tausia le

tulafono o le legavia, o le a avea le Agaga Paia ma au soa e le aunoa ma o le a aumaia e le Faaola le lototele ou te tu ai ma le le pona i Ona luma (tagai MF&F 121:45–46).

O le isi auala ua faateleina ai e le totogiina o sefuluai ma taulaga lou malosi i totonu, e ala atu lea i feagaiga o le malumalu. Ua aoao mai le *Mo le Malosi o le Autalavou*, “Ina ia mafai ona e ulu i le malumalu, e tatau ona avea oe ma se tasi e totogi atoa le sefuluai.”³ Pe a ou ulu atu i le malumalu paia, ou te lagona le i ai o le Atua ma Lona alofa. Ou te molimau atu o sauniga o le malumalu, tatou te maua ai le “mana mai luga” (MF&F 95:8) e fetaiai fiafia ai ma foia ia luitau o le olaga faaletino.

O Se Faamanuiaga o loo Faapolopoloina

O le totogiina o sefuluai ma taulaga ua faateleina ai lou faatuatua e faapea o le a faataunuina e le Alii Ana folafolaga. Ua Ia tautino mai, e ala mai i le perofeta o Malaki, “Ina aumaia mea e sefulu ai . . . ma ia tofotofo mai ai ia

te au i lenei mea, . . . pe ou te le toina pupuni o le lagi mo outou, ma sasaa atu le manuia mo outou, ina seja sili-sili ona tele” (Malaki 3:10).

I lou olaga atoa, e oo lava i taimi o tofotofoga o mea tautupe i le amataga o lau faaipoipoga, na tatalaina e le aunoa e le Atua ia pupuni o le lagi ina ia maua e lo matou aiga ia mea faaletino e manaomia o le olaga. Ou te molimau atu o le usiusitai i le tulafono o le sefuluai, o le a faatupulaia ai lou faatuatua i se punavai sili o le malosi i lou olaga.

Ou te valaau atu i talavou taitasi—ma tagata uma o le ekalesia—inia ia faalogo ia Jesu Keriso ma Ana perofeta e ala i le totogiina atoa o le sefuluai ma se taulaga anapogi limafoai i lou olaga atoa. Ou te folafola atu o le a faamalosia oe ma faamanuia oe e le Alii i le faataunuina o ou manaoga amiontu e tusa ai ma Ona faamoe-moega paia. ■

FAAMATALAGA

1. Thomas S. Monson, “Ia Fai Oe Ma Faaaaoao,” *Liahona*, Jan. 1997, 52.
2. *Mo Le Malosi o le Autalavou* (2011), 38.
3. *Mo Le Malosi o le Autalavou* 38.

OLE MAUAINA OLOU AUALA ETOE FOI AI ILE EKALESIA

Sa ou taumafai e saili ni tali i fafo atu o le talalelei, peitai pau lava le mea sa ou maua o le leai o se faamoemoega.

Saunia e Doug Boyack

Sa ou ola ae i Le Eklesia a Iesu Keriso o le Au Paia o Aso e Gata Ai, ae i le kolisi sa ou filifili ai ou te le toe manaomia le Eklesia. Na amata lau sailiga papau ma manatu faapito mo le “upumoni” i isi nofoaga. O le le mauaina o ni tali e aumaia ai ia te au le filemu po o le olioli, sa ou pau atu ai i se pouliuli loloto faale-agaga. Sa ou lagona faapea o le a ou le toe maua lava le fiafia.

Ae peitai, sa iloaina sa sili atu lou fiafia ao ou toaga i le Eklesia. Sa amata ona ou galue ina ia toe malosi i le Eklesia, ma faamoemoe o le a maua ni toomaga mai le faanoanoa lea o loo faatonutonuina lou olaga. Peitai e lei tele ni mea na ausia e ou taumafaiga vaivai. Sa ou taulai atu i au suesuega, faamoemoe o le a latou aveesea mai au mai le tuulafoaia lea sa ou lagonaina. Sa maua se fesoasoani le tumau mai lenei mea, peitai sa lei maua ai se tali moni.

Ina ua mavae le tautevateva ma le iloaina e leai se mea o ou agai i ai, sa ou filifili loa e malolo mai le aoga mosina taimi ma alu i se malaga. Sa ou sefeina se tamai tupe ae sa lei lava e oo atu ai i se taimi umi. Ae ou te lei malaga, sa ou filifili e faatino le faatuitua moni ma totogi le sefuluai mai au tipe laiti ia na sefe. E le’i faigofie lenei mea. O le a ou mamao ese mai le aiga, ma e le umi ae ou mativa. Peitai, sa ou faamoemoe lava o loo i ai se Atua, ma sa ou iloa o le a ou manaomia Lana fesoasoani.

Sa ou tusiina se siaki mo lau sefuluai, auina atu i lou epikopo, teu lau Tusi a Mamona, ma malaga loa. I le taimi lava lena sa ou lagonaina ai le mafanafana o le Agaga. Sa ou ofo i le suia o ou lagona masalosalo ma le faanoanoa i le malamalamama ma le fiafia. Mai Idaho i Uosigitone, D.C., na aapa mai tagata o le Eklesia ia te au ma, o le mea e sili ona taua, na

fesoasoani ia te au ina ia atiina ae le faatuatua ma manaoga amiotonu. Na foliga mai ua siomia atoa au e le aiga.

Ina ua mavae sina taimi puupuu, sa ou iloa o le a faapuupuu lau malaga—e le o le lava o tipe ae ona o loo i ai se faigamalaga sili atu o loo faatalitali mai mo au. O le toe foi atu i le aiga, sa ou feiloai ai i lou epikopo ma le peresitene o le siteki. Faatasi ai ma le la fesoasoani, e lei umi ae ou auauna atu i le Alii i se misiona.

O taimi uma lava ou te totogia ai nei lau sefuluai pe feiloai ai ma taitai o le Eklesia, ou te manatuaina le “amataga” o lou liua moni. Talu mai lena taimi na ou oo i ni taimi lelei ma taimi le lelei, peitai sa ou galue ina ia tumau malosi faaleagaga. Ou te faafetai ai pea mo le taliaina e le Tama Faalelagi o lau taulaga itiiti o le faatuatua ma le faalauteleina mai o Ona aao alofa ia te au. ■

E alala le tusitala i Kalefonia, ISA.



E LE MAFAI ONA SOLIA

"E le mafai ona tatou solia ia
Poloaiga e Sefulu. E na o le tatou
solia ai o i tatou lava."

(Cecil B. DeMille, American film director
and producer, "Commencement Address"
[Brigham Young University, Me 31, 1957], 5;
[speeches.byu.edu.](http://speeches.byu.edu/))



O Se Faamanuiaga mo Mamá

Saunia e Susan Barrett

E faavae i se tala moni

"Ua toefuatai mai o le perisitua, ua fetalai mai o le Atua, lona mana ua i ai nei" (Tusipese a Tamaiti, 60).

Ua maea le Peraimeri, ma sa sue e Reupena e 10 tausaga ia fai-faualalai. E faapea o le a la savavali ma ia i le fale. Na aoaoina e Elder Sánchez ma Elder Rojas Reupena ma lona uso matua, o Diego, i lesona a faifeatalai ma sa papatisoina ma faamauina i laua. O lea la ua mafaufau ai Reupena o i laua o ana uo mamae.

Sa autilo atu Reupena i le faamalama o se faitotoa o le potuaoga o loo tapuni. A i laua na! Ae o le a le mea o loo la faia? Sa tuu o la lima i luga o le ulu o se tama i le uarota, ma sa foliga mai o loo la faia se tatalo e pei ona la faia ina ua faamauina Reupena.

Ina ua la o mai i fafo o le potu, sa ia fesiligia faifeatalai, "O le a le mea sa lua faia?"

"Sa ma tuuina atu se faamanuiaga o le perisitua ia Uso Mendoza," o le tala lea a Elder Sánchez. "E pei lava o se tatalo faapitoa, ma e mafai ona tuu atu ai le faamafanafanaga, fesoasoani i se tagata ia iloa le auala e foia ai se faaletou, po o le faamaloloina foi o se tasi o loo mai."



Na toe saili foi Reupena mo faifeautalai i le Aso Sa na sosoo ai ina ua tuua le lotu. "E mafai ona lua o mai i lou fale ma tuuina atu i lou mamá se faamanuiaga?" na ia fesili mai ai. "O le tiga soo ia o lona tua."

Sa latou faatopetope uma atu loa i le fale o Reupena. Sa talanoa Elder Sánchez ma Elder Rojas i le mamá a Reupena O ia o se tagata o le

Ekalesia, peitai e lei toe auai i le lotu mo se taimi umi lava.

"Ua ma iloa e te le o malosi, Tuafafine Garcia," o le tala lea a Elder Rojas.

"O le tele ia o vaiaso na matua tiga ai lou tua," sa ia tauina mai. "Sa ou feiloi i le tele o fomai, ae e lei mafai ona latou fesoasoani mai ia te au."

"Sa talosagaina i maua e Reupena ma te o mai ma tuuina atu ia te oe se faamanuiaga o le perisitua," o le tala lea a Elder Sánchez. "E te manao ma te faia lena mea?"

"Oi, ioe, faamolemole," o le tala lea a Mamá.

Ao tuuina e faifeautalai o laua lima i luga o lona ulu ma tuuina atu ia te ia se faamanuiaga, na tafe mai i lalo o alafau o Mamá ia loimata. Ina ua uma, na fusiina o ia e Reupena. "Ou te iloa o le a fesoasoani le faamanuiaga ia te oe," o lana tala lea.

O le tolu o aso mulimuli ane na toe foi ai faifeautalai ina ia vaai po o a mai le mamá a Reupena. "Ou te matua fiafia lava e vaai ia te oulua," o lana tala lea. "Na amata ona aluese atu le tiga o lou tua ina ua uma ona lua tuuina mai le faamanuiaga ia te au, ma ua matua leai lava se mea i le taimi nei!"

"Ua faamaloloina oe, Tuafafine Garcia, e le Tama Faalelagi" o le tala lea a Elder Sánchez. "Ma sa Ia faatagaina i maua e fesoasoani atu ia te Ia i le faaaogaina o le pule o le perisitua ua ia i maua e faamanuiua ai oe."

O le Aso Sa na sosoo ai—ma Aso Sa uma ina ua mavae lena mea—na o ai Mamá ma Reupena ma Diego i le lotu. Na ia iloa e moni le mana o le perisitua, ma na faapena foi Reupena. ■

E alala le tusitala i Iuta, ISA.



O LE A LE PERISITUA?

O le perisitua o le pule lea e galue ai i le suafa o le Tama Faalelagi.

E mafai e tama i le Ekalesia ona umia le Perisitua Arona pe a latou agavaa ma ua tai 12 tausaga le matutua. E mafai ona latou umia le Perisitua Mekisateko pe a latou agavaa ma ua tai 18 tausaga.

O tofi o le Perisitua Arona e aofia ai le tiakono, aoao, ma le ositaulaga. O tofi o le Perisitua Mekisateko e aofia ai le toeaina, faitaulaga sili, peteriaka, Fitugafulu, ma le Apostetolo.



O nisi nei o mea e mafai e e umia le Perisitua Arona ona faia:

Saunia le faamanatuga (aoao ma ositaulaga), faamanuiaina (ositaulaga), ma tufatufaina atu (tofi uma) la avea ma faiaoga o aiga (aoao ma ositaulaga) Papatisoina (ositaulaga)
Aoina o le taulaga anapogi (tiakono, aoao, ma ositaulaga)
Faauuina isi i le Perisitua Arona (ositaulaga)

O nisi nei o mea e mafai e e umia le Perisitua Mekisateko ona faia:

Fai mea uma e faia e e umia le Perisitua Arona, faaopoopo atu i ai:
Faamauina o tagata o le Ekalesia pe a maea le papatisoga
Tuuina atu o faamanuiaga o le perisitua
Taitaia sauniga o le Ekalesia ma tuuina atu ni valaauga



Saunia e Elder
Neil L. Andersen

O Le Korama a
Apostolo e Toasefululua

*O sui o le Korama a Apostolo
e Toasefululua o ni molimau
faapitoa a Iesu Keriso.*

E mafai faapefea ona ou avea ma se faifeautalai **I LE TAIMI NEI?**

Tatalo mo ni auala e
faasoa atu ai le talalelei.

Tatalo ia iloa po o ai e mafai
ona e valaaulia i le lotu.

Afai e le o oe o se faifeautalai
faamisiona e i ai se pine
faifeautalai e faamau i lou
pelaue, e mafai lava ona e avea
ma se faifeautalai i lou loto.

Tatalo mo faifeautalai
faamisiona.

Tuu i luga lau lamepa ma ia
avea ma se faataitaiga a lesu.

*Mai le, "O Se Vavega Lava,"
Liahona, Me 2013, 79.*





Saunia e Elder
Scott D. Whiting
O Le Fitugafulu

O Le Tamai Mamoe Migao

TAMAITI

*"Ou te tuuina atu ia
te outou le manuia,
o lo'u manuia ou te
avatu ai ia te outou"
(Ioane 14:27).*


Pe tusa ma le fitu o ou tausaga, na manao ai lou peresitene o le Peraimeri e fesoasoani i tamaiti ina ia migao atili i la matou Peraimeri. Sa ia faia se laupapa puletini lapoa e foliga

pei o se mamoe. Soo se taimi lava e migao ai se tamaitiiti, na te tuuina i luga o le laupapa puletini se sitika e foliga pei o se mamoe i autafa o lona igoa. Sa ou matuai manao lava i se tasi o na sitika mamoe. I se tasi la o aso i le Peraimeri, sa ou nofo filemu ai ma piilima ou lima ma sioa atu i le peresitene o le Peraimeri ina ia ona matauina au o loo migao. Sa nofo i ou luma se tamaitiiti e umi atu, o lea sa ou faasee ai i lalo o le nofoa ina ia ona iloa mai au.

Ao ou nofo ai iina ma migao, na amata ona tataina e le tapiano se pese Peraimeri malie ma malu. Ao ou faalogologo atu i ai, na oo mai

i ou luga se lagona toofilemu, ma amata ona tafe mai i lalo loimata i ou alafau. Ou te le iloa pe aisea na ou lagona ai le matuai fiafia lava ma le filemu i totonu.

Ina ua uma le Peraimeri sa ou tauina atu i lou tina ou lagona, ma sa ia tauina mai ia te au o le Agaga. I lena aso, sa ou aoao ai pe faapei le lagonaina o le Agaga. Soo se taimi lava ou te manaoomia ai le faia o ni filifiliga taua ma manaoomia ai le taitaiga mai le Agaga, ou te manatuaina le filemu lea sa ou lagonaina i lena aso, ma sa ou iloaina le auala o talanoa mai ai le Agaga ia te au. ■





UO I LE SALAFA O LE LALOLAGI

*Ciao, amici!**

Mai i se faatalatalanoaga saunia
e Amie Jane Leavitt

Mata e i ai se igoa tauvalaau o le nuu o e nofo ai? O le nuu lea e nofo ai Loredana e ta'ua i nisi taimi o le Aai e Faavavaau. O Loredana e nofo i Roma, Italia. E tele nofoaga mananaia o lenei nuu matagofie ma taua e asiasi i ai, e pei o le nofoaga tele mo taaloga ma faafiafiaga [Colosseum] ma le Trevi Fountain.

O taeao uma o le aoga, pe a uma ona faitauina faatasi ia tusitusiga paia, e aai faatasi ai Loredana ma lona aiga i le 'aiga o le taeao (e masani lava o le sirio ma le susu). Ona alu lea o ia i le aoga. E matuai fiafia lava o ia i vasega tusiata ma le komepiuta. A oo i le fale, e fiafia o ia e taaalo ma lona tuagane laitiiti, o Francesco. ■

E alala le tusitala i Iuta, ISA.

* "Talofa, uo!" i le faaItalia.



O Au o LOREDANA mai Italia



O lou tina e faitau maia le Tusi a Mamona ia te au i po uma, e oo lava i le taimi e lei auai ai o ia i le Ekalesia. Ina ua filifili lou tina e aoao i matou e faifeautalai ma sa ou faalogo ia i laua o faitauina le Tusi a Mamona, sa ou iloaina.





O lou tina na te tausia se tina matua e igoa ia Angelina. O nisi taimi i Aso Toonai ou te faamatala ai ia Angelina ni tala ma usuina ni pese o le Peraimeri ia te ia. Ou te fiafia e fesoasoani i lau uo o Angelina.

E fiafia lou aiga e o i le matafaga, asiasi i nofoaga anamua i Roma, pena o le taaalo lava i le malae taalo.

I taimi o le Kerisimasi ma le Eseta, ou te fiafia e avatu i au uo ma aiga ni meaalofa e gaosi i ou lima. Ou te faia ni au lava kata ma faavaa o ata e tuu ai ni ata faapitoa i totonu.




E masani ona ou fesoasoani i le toalua o lou tina [stepdad] e fai le pasta Amatriciana mo le taumafataga o le afiafi.

OU TE FIA VAAI I LE MALUMALU

O loo fuafua lou tina ma lona toalua e faamau i le Malumalu o Roma Italia pe a uma ona faapaiaina. Ou te fiafia foi mo lena aso. O le a avea ma se aso matuai faapitoa lava mo lo matou aiga atoa!

SAUNI E O!

Ua uma ona teuina le ato a Loredana ma o loo i ai nisi o mea e sili ona ia fiafia i ai. O fea o nei mea o le a e teuina i lau ato?



Massimo mai Italia

O loo ofuina e Massimo lona toniga soka, ae e mafai foi ona e faaofuina o ia i ona ofu lotu po o lana toniga faaItalia. Faapipii le itulau lenei i luga o se pepa mafiaia ae e te lei valiina ma otioti i ni fasipepa. ■





Ia Fesoasoani



O Le Mea na Aoao mai e Iesu

I se tasi aso na aoao mai Iesu e uiga i le mea e tatau ona tatou faia pe a talosagaina e se tasi sa tatou fesoasoani. Na Ia fetalai mai e tatau ona tatou faia pe tuuina atu ia sili atu nai lo le mea o talosaga mai ai se tagata. Saili pe aisea ua ta'ua ai lenei mea o le "o . . . i maila e lua" i le faitauina lea o le fetalai a Iesu i le Mataio 5:40–42.



O Le Mulimuli ia Iesu i Lenei Vaitaimi




I se tasi po sa amata ona matou tapenaina ma lou tuagane ma lou uso le fale atoa. Ona sau lea o lou tama i totonusi ma fai mai ua oo i le taimi e momoe ai. I le taeao sa ou ala ae ae fai ma lou tina, "Faafetai mo le tapenaina o le fale."

Elizabeth C., 8 tausaga 8, Alberta, Kanata

Ou te fiafia e fesoasoani i tagata. Pe a auai atu lou tina i se gaoioiga auauna atu, ou te manao ma te o ma fesoasoani i ai.

"Lima Fesoasoani," Luis N., 6 tausaga, Chihuahua, Mekisiko



O Le Luitau o Lenei Masina:

- Vaavaai mo ni auala e fesoasoani ai i lau faiaoga Peraimeri i le taimi o le vasega.
- Fesoasoani i se uso/tuagane po o se uso/ tuafafine i se meaaoga po o se feau.
- Faafifo se matua e ala i le tapenaina o se potu e aunoa ma le tau faatonuina.
- Ua ou luiiina au lava ina ia . . .

Fatuina o Musika i Lukana

*Taitai le musika i luma o tagata uma?
E mafai ona taitaia e Siaosi.*

Saunia e David Dickson

Mekasini a le Ekalesia

Ele tele ni tamaiti e galulue i se valaauga o le Ekalesia ao lei faauu mai le Peraimeri. Peitai o Siaosi N. mai Uganda sa na o le lima tausaga le matua ae valaauiua e avea ma taimipese i lana paranesi.

O le taimipese o le tagata lea e tu i luma o tagata uma i le taimi o le sauniga faamanatuga e taitai le usuina o le pese. O se galuega taua!

“Sa masani ona ou popole tele ao ou laitiiti,” o le tala lea a Siaosi. Ae e oo lava i lena taimi na te faia lava le mea sili. Sa faaleleia o ia i vaiaso uma. E lei uma ae ua ia taitaiina ma le to'a le musika.

E fiafia Siaosi e galue i lona valaauga. “Ua ou maua se lagona lelei,” na ia fai mai ai. “Ua ou lagona e pei ua i ai le Agaga i totonu o le potu.”

O le musika o se vaega tele lea o le olaga

o Siaosi. Na te taina foi le piano ma le kitara. Ioe, e fesoasoani le sau o Siaosi mai se aiga musika. Latou te fiafia uma lava e pepese faatasi—o Siaosi, ona matua, ona tuafafine e toaono, ma lona uso e toatas. Mai le ulumatua e oo i le uii o o latou igoa o Rosila, Miriama, Nancy, Ashley, Siaosi, Chayene, Onidah, ma Kitiona. O le latou pese e fiafia e usuina faatasi o se aiga “O Le Tatalo a le Tamaitiiti” (*Tusipese a Tamaiti*, 6).

I le taimi la lenei ua 12 ai tausaga o Siaosi, e pisi o ia i le taimi o le vaega o le sauniga faamanatuga pe a ia fesoasoani i le tufaina o le faamanatuga. O lona uso laitiiti, o Kitiona, e 5 tausaga, e fesoasoani i le taitaiina o le musika i nisi o taimi. Na aoao e Siaosi Kitiona i le auala e taitaia ai.


E ataata fiafia uma le auso pe a la taitaia le musika. Ua la iloa o loo la fesoasoani i le aumaia o le Agaga i le sauniga. ■





E UIGA IA SIAOSI

- E ese mai le musika, o se tasi o mea e fiafia i ai Siaosi o le taalo lakapi.
- O meaai e sili ona ia fiafia i ai o le araisa, pateta suamalie, pi, ma pinati.
- O mataupu e sili ona ia fiafia i ai i le aoga o le Igilisi ma le matematika.
- E fiafia Siaosi e taalo i taaloga laupapa ma lona aiga. O le taaloga laupapa e sili ona ia fiafia i ai e ta'ua o le Scattergories.




Tala o le Tusi a Mamona

Key signature: F major (one sharp) circled in red. Time signature: Common time (4/4). Key signature: G major (one sharp) circled in blue. Tempo: L = 84 - 92. Key signature: C major (no sharps or flats).

AUALA E TAITAI AI LE MUSIKA

E mafai foi ona e aoao e taitai le musika! O le auala lenei e taitai ai "Tala o le Tusi a Mamona" (*Tusipese a Tamaiti*, 62):

1. Tagai i numera e lua i le amataga o le pese. O le numera pito i luga e tau atua ia te oe pe fia paō o loo i ai i vaega taitasi po o vaega laiti o le pese. E fa paō o vaega taitasi o le pese lenei.
Faaalu i lalo lou lima.
Faaalu lou lima i le ituagavale.
Faaalu lou lima i le taumatau.
Faaalu lou lima i luga.
2. Sii lou lima ma taofi e pei o malolo ae tuufaatasou tamatamailima.
3. Toe fai le faataitaiga lea mo vaega taitasi o le pese.
4. Faataitai pea, ma o le a vave ona e saunia e taitai se pese mo le afiafi faaleaiga!



O Sauniga o le Perisitua ma Galuega o le Malumalu ua Faamanuiaina ai Lo'u Aiga

Saunia e Jennifer Maddy

Na tamoe atu Karl i le mea o taula ai vaa, ua fafia e vaai i lona tama. O le tama o Karl o se faifaiva, ma e masani lava ona tamoe Karl e faafetaui o ia i le vaa i le faaiuga o le aso.

“Tope mai, Papa!” o le valaau atu lea a Karl. “Ou te manao e faaali atu ia te oe se ata sa ou tusiaina mo oe i le asō!”

“Lelei tele!” o le tala lea a Papa. “Ae e tatau ona ou taulaina muamua le vaa.”

Na matamata atu Karl ma le

mataalia ao nonoaina e Papa i se maea mafafia le vaa i le uafu. “Aisea e tatau ai ona matua mau le nonoaina?” O le fesili atu lea a Karl ao tosaina e Papa se faapona tele.

Na tusi Papa i le vaa i luga o le matafaga lea sa tele se pu i le pito i lalo. “E lei lelei le nonoaina o le vaa lena. O le afa lea na tea, na matala ai ma taia ai i papa.”

Na faalapopoa atu mata o Karl.

“E mafai ona e mafaufau i le auala o fesoasoani mai ai le Tama Faalelagi ia i tatou ina ia noatia ai pea ia

te Ia ma ia tatou saogalemu ai?” Sa fesili atu ai Papa.

“O Tusitusiga Paia?” o le taumate-mate mai lea a Karl.

“E sao lena,” o le tala lea a Papa. “Na Ia tuuina mai foi ia i tatou ia sauniga o le perisitua e pei o le papatisoga ma le faamanatuga. Na ma faaipoipo ma Mama i le malumalu ina ia mafai ona noatia faatasi e faavavau lo tatou aiga.”

Na toso mai e Karl le manoia ma fesoasoani ia Papa e tuuina atu i ai le toso faaiu. “Ua ta faia se nonoa sili ona mau i nonoa uma lava!” ■


E alala le tusitala i Iuta, ISA.

MAU MA LE PESE

- Mataio 18:18
- “Ou te Fia Vaai i le Malumalu,” (*Tusipese a Tamaiti*, 99)

MANATU MO TALANOAGA FAALEAIGA

E mafai ona faitau e lou aiga le Mataio 18:18 ma talanoa po o le a le uiga o le mauaina o se mea e “fusifusia i le lagī.” I le faaaogaina o se fasi manoia umi, e mafai ona tou auauai i le nonoaina o se faapona i le manoia ma faamatala pe na faapefea ona faamanua e sauniga o le perisitua o outou olaga.





Faamanuiaga o le pepe

Papatisoga e ala
i le faatofu

Faamanuiaga o e mamai



Faamanuiaga o e mamai

TUMAU LE FESOOTAI MA LE TAMA FAALELAGI


Aveese le itulau lenei ma faapipii i se fasi pepa lanu. Otiese ia kata ma faafao i luga o le laulau po o le fola. Feauauai i le liliuina o kata tailua e sue ai ni mea e tutusa. A maua e se tagata se mea e tutusa, fai atu ia te ia e faamatala le auala na fesoasoani ai ia i tatou ia sauniga o loo faaalia i luga o kata ina ia faalatalata ai i le Tama Faalelagi.



Faamanatuga





Faamanuiaga o le pepe

Papatisoga e ala
i le faatofu

Faamanatuga



Faamauga

Faaipoipoga
i le malumaluFaaipoipoga i le
malumalu

Faamauga

O LA TATOU ITULAU



Merari C., 11 tausaga, El Salvador

O Paulo ma Carlo D., e tai 10 tausaga, mai Filipaina, o ni auso masaga. Ua la naunau lava ina ia matutua ia maua le perisitua ma tufa le faamanatuga. La te fiafia e aoao isi e uiga i le talalelei, ma ua la saunia e auauna atu i ni misiona. E tau e Carlo i tagata uma na te iloa le perofeta soifua, ao Paulo e fiafia e ave lana Tusi a Mamona i le aoga ma faiatua faatasi ma ana uo. La te iloa e taua le faiatua o tusitusiga paia i aso uma ma o i le lotu i le Aso Sa. E lua gagana e lelei tele ai le tautatala a Carlo ma Paulo—Takaloka ma le Ilokano—ma o loo la aoaoina le Igilisi i le aoga. La te fiafia e taaalo pasiketipolo ma a laua uo.



O Faifeautalai, saunia e Maria Clara A., 9 tausaga, Pasila



I se tasi aso i le aoga sa faaosoooina ai au e au uo e ee atu se upu leaga i se potuaoga gaogao. Ina ua ou fai atu leai, sa latou taufaalilili ma ulagia au. Ona ou fai atu lea ioe, ma sa ou tau atu lemu ma faatopetope le upu. Sa ou matua salamo lava i lena taimi mo le mea sa ou faia. Sa ou tatalo i lena po ma lou loto atoa ma salamo mai le tauina o le upu leaga. Ou te iloa e mafai e le aunoa ona ou liliu atu i le Tama Faalelagi ina ia iloa le mea sao, ma afai o se mea sese, o le a ou fai atu leai, e tusa lava pe fai mai au uo ia te au e fai. Ou te faafetai mo le salamo!

Paola L., 10 tausaga, Mekisiko

TAUMAFAI IA AVEA FAAPEI O IESU

I lau aoga sa matou sauniuni talu mai le amataga o le tausaga mo se gaoioiga sili e ta'ua o le Festidanza. E pei lava o tausaga uma, o le a faia i se Aso Toonai. Ona oo lea i se tasi aso na faasilasila mai e le matou taitai o le a suia i le Aso Sa. Sa ou tauina i lou tina o Aso Sa matou te o ai i le lotu, ma ou te fiafia e faamamalu le aso Sapati.


Isaías R., 6 tausaga, Peru





O le aafiaaga sili o lou olaga o le aso lea na ou papatiso ai. Na aoao atu e lou tina o le taimi ou te papatiso ai, o le a ou tali atu mo au amioga uma. Na oo mai le aso, ma sa ma ofu papae uma ma lou tama. Sa ou popole, ae ina ua ou uuina le lima o lou tama e alu atu ai i totonus o le faatanoa, sa ou iloa o le a lelei mea uma. Ina ua faia e lou tama le tatalo o le papatisoga ma ave au i lalo o le vai, sa ou lagona ni mea matagofie i totonus o lou loto e faigata ona faamatala. Ona faamauina lea o au ma tuuina mai le mealofo o le Agaga Paia. Ou te matua fiafia ua papatisoina au. E pei lava ona setiina e lesu Keriso se faataitaiga mo au, o loo ou setiina se faataitaiga mo lou uso laitiiti. Ou te iloa o loo soifua lesu Keriso ma e alofa ia i tatou.

Richard H., 8 tausaga, Kuatemala



Agustina B., 10 tausaga, Atenitina



Marianella B., 7 tausaga, Atenitina

Ou te fiafia i le vaega a tamaiti i le *Liahona* aua e fesoasoani tala ia te au e aoao ai e uiga i le Tama Faalelagi. E masani lava ona ou talosaga i lou tina e faitau mai ia te au ni tala. Ou te fiafia i paso, mazes, valivali, ma faamatalaina o tala. Ou te fia aoaoina ni mea fou i le Peraimeri. Ou te iloa e alofa le Tama Faalelagi ia te au, ma e alofa foi o la ia te oe. Ou te taumafai i taimi uma ina ia manatua o la ma filifili le mea sao.

Jocelyn C., 4 tausaga 4, Nicaragua



**O Santiago ma Iona
uso laitiiti, o Iairo**

Talu mai lava lou laitiiti, sa ou manao lava e maua le Perisitua Arona. A ou maua le perisitua, o le a mafai ona ou tufaina le faamanatuga, ma o le a tatalaina faiototoa o le malumalu ia te au. O se avanoa matagofie le auai i lenei Ekalesia toefuataiina, ma ou te iloa e moni le talalelei. E le toe umi ae ou tuua le Peraimeri, lea na ou aoaoina ai le tele o mea, ma auai i le autau o le autalavou i Alii Talavou.

Santiago P., 11 tausaga, Ekuatoa

"Ma sa faaalia mai se tagata i ou luma, o lona ofu talaloa sa sili ona papae nai loo so se mea ua ou vaai i ai. O lona igoa o Moronae."

(Tagai Iosefa Samita—
Talafaasolopito 1:30–33.)

**Erick H., 9 tausaga,
Mekisiko**



FAASOA ATU MA LE LIAHONA

E mafai ona e auina mai sau atatusi, ata, po o se mea na tupu i le initonet i le liahona.lds.org, i le imeli i le liahona@ldschurch.org ma o loo i ai le "Our Page" i le laina o le mataupu, pe meli mai i le tuatusi i le itulau 3.

E tatau ona aofia mai i mea o auina mai le igoa atoa o le tamaititi, itupa, ma le matua (3 e oo i le 11 tausaga) faapea foi ma igoa o matua, uarota po o le paranesi, siteki po o le itu, ma le faatagaga tusiusia a matua e faaaoga ai le ata ma mea na auina mai a le tamaititi (e talia foi pe a auina mai i le imeli). Faamolemole, e leai ni atatusi o le Faaola. E ono faapupuuina tala mo le uumi po o le manino.

O Le Manatu Maoae a Vili

Saunia e Lynn Greenway

E faavae i se tala moni

Na manao Vili i se ata o le malumalu. Na manao na te tuuina i totonu o lona potu. Na ia faalogo o saunoa mai le perofeta o se mea lelei mo tagata uma le i ai o se ata.

“Tina, na e aumaia se ata o le malumalu mo au?” Na fesili atu ai Vili.

“Leai,” o le tali atu lea a Tina. Sa pisi o ia i le tausiga o le pepe fou.

“Lelei la,” na fai mai ai Vili.

E fiafia Vili i le malumalu. Na ia iloa o se nofoaga faapitoa lea e faa-mauina ai aiga.

Na i ai sina lagona faanoanoa o Vili. Ua pisi tele Tina. E faapefea ona ia maua se ata o le malumalu?

Ona maua lea e Vili o se aitia lelei. E le tatau ona faatali o ia mo Tina!

Na tamoe Vili e sue ana valigao ma ni pepa. Ona ia saofai lea i lalo o lana kesi ma amata ona tusi le ata.

Ina ua mavae sina taimi umi lava, na tuu i lalo e Vili ana valigao. Na ia tamoe atu i le umukuka ma tuu i luga lana ata ma faaali ia Tina.

“Oka se manaia o le ata o le malumalu,” o le tala lea a Tina.

“Ta o e tautau i totonu o lou potumoe,” o le tala lea a Viliamu.

“O se manatu manaia tele lena!” Na fai atu ai Tina. ■



E alala le tusitala i Penisilevania, ISA.



O LE MANA O LE O AFEA


Saunia e Kelly Louise Urarii

Na faafusei lava ona ma'i lou toalua. I se tasi taeao sa ia moaina le vao, ma o le mea na sosoo ai na matou iloa ua ma'i o ia. E oo atu i le aso na sosoo ai ua faamanava e le masini. Ao matou siitia ese mai le potu o faalavelave faafusei i le potu e fai ai taotoga, na talanoa mai se tasi o fomai talosia pe *afai* e mafai ona latou sefeina o ia.

Talu ai ona o le faamai lea ua maua ai o ia e le taatele, o lea e itiiti lava se avanoa e toe ola ai. Sa ou le talitonu i le ofooftogia o le suiga o mea ua tutupu. Sa ou lagona le lofituina i le leai o se faamoemoe.

O le mea e faafetai ai, na sao mai Pierre i lona taotoga muamua ma taofia ai i le iunite e tausia ai ma'i tigaina (ICU). O le a umi se auala o i luma atu, peitai na faaleleia ona avanoa i le aluga o itula taitasi. O le taeao ina ua maea le taotoga muamua na talanoa mai ai ia te au se teine tausimai muamua mai le tele o isi. Sa ia talanoa e uiga i le *o afea* o le a oo ai Pierre i le isi laasaga o lona togaftiga. Sa ou tu i aafiaga o lena upu. Sa matua tele le faamoemoe i le *o afea* nai lo le *afai*—o loo fesootai mai ai le mautinoa ma le faamoemoe. Sa ou faafetai ia te ia mo le filifilia o le upu, ma sa ia ataata mai ma le iloa.

Na maua e Pierre le tele o faamanuiaga o le perisitua, lea na maua ai le faamalosiauga sili. Na matou iloa ia vaavaai mo le aao o le Alii i o matou olaga, talu ai o Lana aafiaga sa le o se tulaga o le *afai* ae o le *o afea*. O taimi uma lava e faaletonu ai le soifua maloloina o Pierre, ou te faamanatuina ia te ia ia faamanuiaga ma e manaomia le faaalia o lo ma faatuatua i



*Na matou iloa
ia vaavaai mo le
ao o le Alii i o
matou olaga, talu
ai o Lana aafiaga
sa le o se tulaga
o le afai ae o le
o afea.*

le Alii. O se malaga paia lenei mea, ma o aso taitasi sa o se meaalofa.

O le faamoemoe o le *o afea* na matou maua ai le faamalosiauga. Ae peitai, o le 18 aso o le aluga o le malaga, na le sologa lelei ai. O le taimi o le taotoga lona fitu, na iloa ai e ana fomai ua matua faateleina le sosolo o le faamai. Na faailoa mai ma loimata e le au fomai lo latou faanoanoa ao latou tau maia ia te au e le aulia e Pierre le po.

Sa mafai ona ma faatasi ma lau soa e faavavau ao ia pasi atu i le veli. Sa faamanuiaina i maua i le i ai o lona atalii e toatasi mai lana faaipoipoga talu ai i luga o le telefoni e tau mai lona alofa mo lona tama. Na maliu filemu Pierre.

I le tele o vaiaso mulimuli ane, i lona tuugamau, na oo mai ai ni upu faamafanafana mai ia Mosaea 2:41: “Ia outou manatunatu i le tulaga manuia ma le fiafia o i latou o e taus i poloaiga a le Atua. Aua faauta, . . . *afai* latou te tutumau i le faamaoni e oo i le iuga, e talia i latou i le lagi, ina ia mafai ona latou mau faatasi ma le Atua i se tulaga o le fiafia e le gata” (faaopoopo le faamamafa).

Na ou naunau lava e le aunoa ma Pierre o le *afai* i lena mau o le a avea ma o *afea* mo i maua. Na ma iloa o le tumau ai i le tuuto i a tatou feagaiga, o le a tatou toe faatasia—sa na o se fesili lava o le *o afea*. Ma te faatuatua i le fuafuaga a le Alii o aiga faavavau ma le ola faavavau. O le mana o le *o afea* lea e faatumauina i tatou i le agai i luma. ■

*E alala le tusitala i Peretania Kolomupia,
Kanata.*



ATA NA TUSA E ROBERT T. BARRETT

GORDON B. HINCKLEY

Na tuputupu ae **Gordon B. Hinckley** e fiafa i le natura. O le laau uolonati lea na ia totoina ao tamaititi na faaaoga e fausia ai le pulelaa mo le **Maota Autu mo Konafesi**. Na masani lava ona faatusaina e Gordon le alofa o le Faola i le **Polar Star** taiala, o se fetu na ia aoao ia iloa ao tamaititi. Sa ia **faimalaga** i le silia ma le lua miliona maila (3.2 miliona km) ao galue i le Ekalesia. Na faasalalauina e **satelite** lana molimau i le lalolagi. Ua silia ma le 70 malumalu na faapaiaina ao avea o ia ma Peresitene, e aofia ai le toefausia o le **Malumalu o Navu Ilinoi**.

E I Ai Foi i Lenei Lomiga

MO TALAVOU MATUTUA




Mulimuli i le Ala o le **FIAFIA**

Na aoao mai e Epikopo Gérald Caussé ni mataupu faavae se tolu lea o le a fesoasoani ia te oe ina ia pulea lou fiafia, e tusa lava po o a o outou tulaga.

i. 42

MO LE AUTALAVOU



i. 52

Ae a Pe Afai Ou Te Le Lagona se **MU** i totonu o le **LOTO**?

Aua le popole. E sili atu nai lo le tasi
le auala e lagona ai le Agaga Paia.

MO TAMAITI

O Le Manatu Maoae a Vili

Manaomia se ata o le malumalu
e tautau i totonu o lou fale?



i. 78